

LUKA

Ciig Beer Naa Agweed Lukae

Rob Ke Nying Kitaab

Kitaab gihr Luka e ne nyoadh ngo kejea Jeacuu e naa ngaa anaa aceg piny kejea ubeehn ne boadh yaa Yijarael kedea uboadhe nyoge cang ne dug. Ngo agweed Lukae piny kejea Jeacuu acuohn Wahy Juoge ne “puohny Ciig Beer yihr yaa angoohng.” Kitaab gihr ni yea naa amahr gihr me nyoadh ka beehn Juoge ucube wihe ne kony yaa nii gihr bahng me thoohdh me be room. Luka arubo keraahyo thiow ke nying med cwihny, adoohnge yihdh ngol muu umodho gihr kitaab ge rubo ke nying beehn Jeacuu. Luka arubo tiehd yi gug kitaab ke nying med cwihny, maano e ngo kwaan kaa amon Jeacuu Paar Maalo. Luka arubo yi kitaab gihr Jo Oohr ke nying kaa anyaay lum Juoge ujwage ree batien mon Jeacuu Paar Maalo.

Kaa Acaan Luube

Lum umodho 1:1-4

Kaa anyuol Joon Ngad Luogwahy kedea Jeacuu kedea nihn thihno gihr gen 1:5-2:52

Tiihy Joon Ngad Luogwahy 3:1-20

Luogwahy kedea utum gihr ayug rih Jeacuu 3:21-4:13

Tiihy Jeacuu kiin nyoge yi piny Gaalili 4:14-9:50

Aay yi geen Gaalili ne ci geen Jeruucalem 9:51-19:27

Nihn abiihberiow gihr dhe caahn naa anahg yi geen Jeruucalem kedea buude 19:28-23:56

Cahro, nyoadh rog kedea mon Paar maalo gihr Waahd Juog 24:1-53

1 ¹Yihr Thiopiuhluj.

Nyoge me thoohdh ge agweehdo ke nying gihr anaa ayug rog gen kiin wan kan. ²Gihr agweed gene, ge naa gihr anaa arob kwaan yaa anaa nyum wane naa aniid gen ke nying gen kedea gen naa yaa anaa acub piny ne yaa puohny Ciig Beer. ³E an awaahn ni yih ngaan duohng, wa kwaan kaa aboara gen ne cohng, unghaya kwaan gihr ne yihdh gen ke dhe yoohn kaa anaa athub gihr ni kedea kaa ayug gene rog gen e wiha abeehna ne paro kejea moogo e ngo beehda gihr me beer ugweeda gen piny neehn kaa atiihy gene rog gen. ⁴Ngo apara wa maano ugweeda gen piny yihri, beere ather gihr yihdh gen ngahyi ngahyo neehn kaa apuohny gen yihri.

Kar Rob Dhe Yoohn Kaa Anyuol Joon

⁵Athubo ke wa gihr, umodho maano e Jeacuu poohd kuu anyuol, ngad lam gihr kweehr anaa anudo me nyinge Jakarya. Yihdh nihn nu e ruohdh me nyinge Eroade e naa amag Judea ke kare cang. Jakarya gihr ni anahg ngad goan dhe wod yaa lam gihr kweehr ke kur mar Abihja. Abea Elijabedh anaa anahg cihr Jakarya. E thiow anahg ngad dhe wod yaa lam gihr kweehr. ⁶Ge noon ni ariow ni ge abeehdo kaa beehdo me beer ne cohng nyum Juog. Umag gene loohng Juog keter beer mee. ⁷Abea nyethiin maa anudo yihr gen atooro, bang gihr Elijabedh anaa agaahg kedea ge anaa agwag keraahyo.

⁸Cahng ni arumo e Jakarya anaa ne yug tiihye yi Wod Juog e ngo cub gihr kweehr yi wod kwaj gihr Jeruucalem, bang gihr nihn nu anahg nihn tiihy gihr dhe wod gihr ge Jakarya. ⁹Beehda en naa anaa akwany ne ngad cub gihr kweehr wong cahng nu. Jakarya anaa akwany kaa dhe yoohn thoohr gaay wa ka yuge paar gen ne waang adung dung wihi abar mar adung dung. Abea ge athub Jakaryae keehd tiihye yi Wod Juog ¹⁰nyoge anaa amahdo yi laaro gihr Wod Juog e ge kway Juog.

¹¹Kaano arumo e wuohnjuog anaa celang, ucuunge kur kwiihy abar gihr waang adung dung. ¹²Naa aniid Jakaryae ngo, e Jakarya apaahw oogo umag lwahre ngo kwaade tooro. ¹³Muudhe e wuohnjuog ake rubo yihre kea, “Yih keá tudo Jakarya! A akahl dhog me beer yihri! Kwaj gihr alihrng Juoge cang kedea Elijabedh cihi uyihdi keehd nyethiin unyuole yihri keehd nyethiin cuow abea nyinge ucagi ne Joon. ¹⁴Nea anyuol arumo, e yihn maa cihi kedea nyoge me thoohdh cwihnyu umihni keter. ¹⁵Thiow nyethiin ni unahg ngaa me duohng keter ke nying tiihye gihr agwiir Juoge yihre. Koongo buu ukuonge kaa belo kedea kuohme uyaahng Wahy Juoge ke ka thube e ngo poohd kii yea men. ¹⁶Unahg e nuu uduu thoohdh yaa Yijarael bang Juog ge beehda Ruohdh gen ni. ¹⁷Kedea unahg en nuu umoon wong maalo nyum Ruohdh gihr ubeehn ni. Umoon keehd dhe yoohn teeg cwihny puohny mare, wa kwaan mar Elija agamloohngjuog naa abeehno umodho. Unahg en nuu uweehg jo doonge nyaar nyethen gen kedea uweehge yaa wudh gen teeg duog cwihny gen caahn ubeehd gene ne nyoge maa abiohgrwaal, beere rog gen gwiir gene gwiir ne koar beehn Ruohdh.”

¹⁸Naa athum wuohnjuoge ke rob, e Jakarya wihi lum nu abeehre beehro kobe, “Gihn e ne meehg an yihi gihr arobi? Kea maany an do, kaa agwaga kii ngo maa cihi thiow rune ge acidho!”

¹⁹Maa abeehr wuohnjuoge ngo yihre kobe, “A naa ngaan cuung nyum Juog. Nyinga Gabriel. Wa ka niidi an awaahn ni, beehda Juog ke ngude e naa aohr an bangi, ubeehna yihri keehd dhog gihr beer ni. ²⁰Abea naa abahng luma kii yihi awaahn ni e kar rob utooro yihri, yih ubeehdo wa miing e dhii atuohj ree uwahdhe ka upahdh gihr aroba yihri kar gen. E thiow roba robo yihri kejea kwaan gihr aroba yihri ni, ge beehda gihr muu udhiil rog gen ke yugo wa kar gen neehn kaano ateeda gen yihri nu.”

²¹Abea nye wong kaano ayug gihr nu rog gen, e nyoge ge anaa yi laaro gihr Wod Juog e ge koar Jakarya. Gihn nu e nyoge anaa agaahg bang gihr agaahg Jakaryae yi Wod Juog. ²²Naa abeehne oogo, e kar rob maa arube keehd nyoge

tooro, e ngo aguo kaa angeyo kejea gihn maa aniide nud yi Wod Juog. Naa atoor ka maa arube yihr nyoge e cinge now e naa atihnge maalo ne rob keehd gen.

²³ Naa abeehn nihn tiijh giie yi Wod Juog ne thumo e ngo adoo paare. ²⁴ Abea yi dooe paajo e Elijabedh ciie nyethiin ake ngeyo ree. Noono ubeede ke kar bahbe paajo keehd kar dwaahde abiihj. ²⁵ Muudhe e Elijabedh acaa ne rob ke cwihnye kobe, "Ngo ngahya awaahn ni ne cohg kejea Juog a kaa akonye ne! Deeh yaahr guohbo naa ne riha ke bang yea paajo ne dug akahl Juoge oogo yi guohba arumo yihdh nihn ni."

Ka Rob Kaa Anyuol Jeacuu Kii Ngo

²⁶ Batiene dwaahde abiihjbeciel arumo naa angej nyethiin rih Elijabedh, e Juog wuohnjuog me cuohn ne Gabriel aohre geen Gaalili me nyinge Naajaread. ²⁷ Dhog e naa akahle bang nyaan maa tongo maa anaa atuohj yihr nyin me nyinge Jocebe ne nyuomo. Jocebe gihn ni anahg ngad dhe wod gihr Deabid Ruohdh. Abea nyaan ngo nyinge anahg Maarya. ²⁸ Naa abeehn wuohnjuoge bang Maarya e ake rubo yihre kobe, "Maahdh rihi ya! Yih beehda ngaa maa adooj Juoge keter. Juog Ruohdh ke yihn."

²⁹ Gihn nu e Maarya cwihnye ake daag ke nying luub nu kedea kwaad maahdho me wa gihn nu. ³⁰ Maa arob wuohnjuoge ngo yihre kejea, "Maarya yih keá tudo! Juog cwihnye amihno rihi keter. ³¹ Awaahn ni yih uyajo unyuoli ke nyethiin cuow, ucagi nyinge ne Jeacuu. ³² Ngo unahg ngaa me duohng keter kedea ngo ucuohn ne Waahd Juog. Uyug Juoge thiow ne ruohdh me duohng ne mag koom gihr dhaahr kway e nyinge Deabid ³³ Ke nying run beehd, e nuu upiuh ukoom kway e cuohn ne Jeakob umage joe. Abea ruohdhe noono padh ruohdh muu ugug ne weey weey."

³⁴ Batiene arumo e Maarya ake rubo keehd wuohnjuog kobe, "Gihn nu ree uyuge kaa dhe yooh me ngihde e kihd dhecuow kwihya?"

³⁵ Maa abeehr wuohnjuoge ngo kea, "Beehda Wahy Juog e nuu ubeehn rihi. Teeg Juog thiow ke ngude ubeehn wihi, e naa gihn ucuohn nyethiin ne Waahd Juog ke nyinge noono. ³⁶ Keehd Elijabedh wadu ge ngahyi kejea beehda dhaago maa agaahg kedea agwag, ngo yaaj awaahn ni adhaahr yihre ne dwaahde abiihjbeciel. ³⁷ Bang gihn, gihn me goohg Juog beehde tooro."

³⁸ Batiene arumo e ngo abeehr Maaryae beehro yihr wuohnjuog kobe, "Gihr nyinga beehde tooro. A beehda nye baahng Juog now. Yuge ree wa kaa arobi." Kaano e wuohnjuoge ake aay.

Maarya Liew Elijabedh

³⁹ Batiene e Maarya ree alaare kaa agwiuro kaano, ucea ke geew paar Jakarya me nii piny goode yi Judea. ⁴⁰ Abea naa awahnhe paajo e Elijabedhe amaahdhe maahdho. ⁴¹ Arumo naa alihng Elijabedhe duon Maarya ne ngio e nyethiin ake gweehyo keehd med cwihny. Kaano thiow e kuohm Elijabedh ake miehnd naa ayaahng Wahy Juoge kuohme. ⁴² Maa arube yihr Maarya e duone atihnge maalo kobe, "Naa! Yih ke wuoro keew maahn ne dug. Maa me wuor nyethiin gihn unyuoli ni. ⁴³ Kaa nying gihn ge abeehn kwaad gihn me wa gihn uyuge ree yihra! Adhaahr miih ruohdha ke ngude, e ne abeehn ne liehw an ne? ⁴⁴ Kaa alihnga yedh duoni naa amaahdhi an e nyethiin ake buo ne nihg ke med cwihny. ⁴⁵ Mihn cwihny yihri, bang gihn ayihi ngo kejea giuh arob Juoge yihri ni ge ubeehn naa ather ne dug."

Wahy Poong Giih Maarya

⁴⁶ Noono arumo e Maarya ake wahr kobe,

"Cwihnya beehde e moar wiuh Juog ruohdh.

⁴⁷ Cwihnya med keter ke nying Juog e naa Ngaa Boadh an.

⁴⁸ Bang gihn Juog wiie kuu awul riha,
ngaa maa nye baahng me gihr nyinge tooro.

Thube ke nye kaa awaahn ni, uwahdhe cahng moogo nyoge cang ke bang
upiny a ucuohn gene ne ngaa me yihre ne med cwihny,

⁴⁹ bang kwaad giuh teeg naa ayug Juog Aciehe yihra,
Juog ge nyinge leej ka me laaj ni.

⁵⁰ Juog cwihnye aduue caahn bang nyoge me wuor en,
ne thube ke rog jo umodho uwahdhe bang jo uluuny.

⁵¹ Juog bade alwaaye piny ke maalo.

Maa ayoade kwaad yaa nyaam uwere ge piny.

⁵² Kwaad thoohn ruohdhe giuh doong doong ni, ge akahl Juoge oogo
wudh koome giuh gen cang
maa ayoade ke kwaad yaa gihr nyinge gen tooro
ge naa atihnge maalo.

⁵³ Thiow maa ayoade kwaad yaa abang kahje, upaahng yihdh gen keehd giuh
me beey.

Abea kwaad yaa alonge ge urieme ke cing gen now.

⁵⁴ Thiow Juog wiie kuu abeehn ne wulo rog kwaad giuh anaa acege piny yihr
ge kuowo naa acoon.

Noono ubeehn Juoge ukonye yaa Yijarael ge beehda baahng giie.

⁵⁵ Juog wiie kuu awul ne weey weey thiow,
bang gihn med cwihny anyoadhe

yihr Abraahm kedea yihr kwaay Abraahm cang ne raj

wa kaa anaa ateede ngo yihr ge kuowo ni.”

⁵⁶ Maa aceng Maaryae paar Elijabedh kaano keehd dwahde adahg batiene e adoo paar gen.

Kaa Anyuol Joon Ngad Luogwahy

⁵⁷ Naa abeehn kar nyoohdo gihr Elijabedhe, e ngo ake nyuol keehd waahde. ⁵⁸ Yaa wong akeew gihr gen maa nyoge maa waahd gen ngo alihng gene kejea Juog cwihnye aduue caahn rog gen. Umihn cwihny gene wa mar Elijabedh thiow.

⁵⁹ Yi bedahg nihn, e peen nyethiin ake wedo uthoame thiow. Nyinge adaahd ke caa ke nying wahn Jakarya. ⁶⁰ Maa akweer Elijabedhe kobe, “Kare tooro ucag nyinge ne Jakarya wahn. Cag nyinge ne Joon.”

⁶¹ E nyoge ake rubo yihr Elijabedh kob gene, “Ngad tien paaru maa acag ke nying nu tooro.”

⁶² Batiene e nyoge cing gen ayahng gene yahngo ke rob yihr wur nyethiin, upeehnye ke ka daahde ucag nying nyethiin kii ngo. ⁶³ Kaano e ubango gihr gweed apeehny Jakaryae peehnyo maa agweehd Jakaryae yi ngo wa gihn, “Nyinge ke caa ne Joon.” Yaa wong akeew naa anaa abeehno cang, ge agaahy maa acwaahng gene kwaade tooro.

⁶⁴ Batiene arumo ke wong kaano e Jakarya leebe ree agoonye goonyo, uguoe ke rob maano e ngo puoj Juog. ⁶⁵ Keehdo yaa wong akeew, yihdh ge abeehn lwahre ne pogo maa atud gene ke nying gihn me wa gihn nu. Kwaad giith ni ayug rog gen ni, ge abeehn ne lihng cang unyaay gene ke bang yihdh miehy ugood gihr Judea ne raj. ⁶⁶ Kwaad yaa alihng giith ni, wudh ge acoar gene e ge peehny rog gen kob gene, “Nyethiin ni, unahg kwaad nyethiin me ngihde?” Maa aguo nyoge ngo ke ngyeyo thiow kejea teeg Juog ne rih nyethiin gihn ni.

Giih Dhe Caahn Naa Ateed Jakaryae

⁶⁷ Gihn nu e naa abeehn Jakaryae wur Joon naa apahng guobe keehd Wahy Juog umiehde maa arube ke kwaad giith adaahd Juoge ke robo kobe,

⁶⁸ “Wuor Juog Ruohdh, Juog
Yijarael!

Juog abeehn ne kony joe
ulunye gen oogo.

⁶⁹ Deeh ngad kony me duohng, me teeg keter,
acub Juoge yihro
adiehr muon kaa bang yaa dhe wod Deabid, ge anahg baahng Juog me ne cohg.

⁷⁰ Gihn nu ree ayuge wa kaa anaa arob Juoge ngo kuu umodho ke dhog yaa agamloohngjuog

⁷¹ E naa akoohb gene kejea, ‘Juog won nea konyo ubodho yi cing jo mahn giitho
kedeaa yi cing yaa maan
won.’

⁷² Anaa arob Juoge thiow kejea duu cwihny caahn nea nyoadoho yihr ge kuowo naa acoon.
E thiow akob Juoge kejea wiithe kuu awul ne par kwaad giith anaa amade keehd gen.

⁷³ Naa angweel Juoge ngo piny yihr kuowo Abraahm kejea

⁷⁴ won nea lwahg oogo yi cing
yaa maan won
beere dhe yooh ne yoado utiihyo yihre
e lwahr tooro rogo.

⁷⁵ Kedeaa udoohngo ne nyoge maa abiohgrwaale nyume
yihdh nihn kuowo giitho ne beehdo upiny kan.

⁷⁶ Abea yih nyethiina, yih ucuohn
ne agamloohngjuog, Juog ge Duohng.

Unahg yihn nuu umoon wong maalo nyum Ruohdh gihn ubeehn ni,
ne gwiir yooh yihre beer mee.

⁷⁷ Unahg yihn nuu urob ngo yihr nyoge
kejea ge ubodh
kaa dhe yoohn ka ubeehn Juoge uwuunye anyoohne giith gen oogo yihr gen.

⁷⁸ Juog maro beehda Juog me cwihnye duue ke caahn.
E thiow puol cwihnye beehda gihre.
Kar kuow me nyaahn me bodho kii ngo unyoadohe yihro umeenye won wa gihn na moohl cahng.

⁷⁹ Kwaad kar kuow gihn nu, une beehd wudh kwaad nyoge me beed yi muudho
kedeaa umeeny wudh nyoge me beed yi tub thoo,
thiow tieno ka caahdho kii ngo e nuu ucohg yooh yihro
ne ci kar doohr.”

⁸⁰ Batiene arumo e nyethiin ake doongo e wahye beey mee kedeaa lum Juog ngahye. Muudhe e ngo acaa ne beehdo yi ukang dom, uwahdhe cahng agwiir Juoge ne nyoadoh ree yihr yaa Yijarael.

Jeacuu Anyuol

(Mat 1:18-25)

2 ¹ Yihdh nihn nu, e Jaah Agojtiino, amor gihr gweed nying nyoge bang akweehn akahle ke oogo ke bang yi dhaahr Roama cang ke kare ne raj. ² Akweehn gihn ni anaa anahg akweehn mar umodho ge ayug e Kwiihrinoj e naa anahg muudiihr gihr Ciithrya. ³ Nyoge cang ge abeehn ne gweed nying gen piny, e kwaad dhaano caa yi geen mar paar gen.

⁴ Kaano e Jocebe ake aay geen Naajaread yi Gaalili, e caa geen Bedhlehem yi Judea ge anahg geen Deabid ni. Jocebe aci Bedhlehem bang gihn ngo beehda ngad dhe wod Deabid. ⁵ Ngo anaa aci Bedhlehem beere nying gen beehn ne gweed piny en maa Maarya, bang gihn Maarya anahg nyaakow maa atuohj yihre. Maarya a'aay Naajaread e yea adag keehd nyethiin. ⁶ Ge anahg gene Bedhlehem, e kar nyooohde anaa acahngo. ⁷ Kaano e Maarya ake nyuol ke kanye maa nyethiin cuow. Maa abahje ngo keehd waaro upiehle ngo yi kwaad adyaany gihn nyahm laahye yea ke lum ni. Ayuge wa gihn nu bang gihn kar piih anaa atooro yihr gen yi wod weehle geen Bedhlehem.

Jo Kwaah Keehd Wuohdjuog

⁸ Buud kaan ni anyuol Maaryae yea ni, jo kwaah mooge ge anaa anudo maa anaa ne kwaag laahy giih gen naa amaang gene maango nying bare. Nye kaano piny anahg dewaahr. ⁹ E wuohnjuog acielo abeehn bang gen. Yi beehne noono abeehne nu, e kaano ane jo kwaah yea nu, ree ameenye meenyo ne dahr keehd daahr gih Juog. Ubeehn lwahre umage jo kwaah giih ni kwaade tooro. ¹⁰ Kaano e wuohnjuog ake rubo yihr gen kobe, "Wu keá tudo! A kahl dhog me beer yihru. Ngo beehda dhog muu ukahl med cwihny yihr nyoge ke bang wiih piny cang ne dug. ¹¹ Ngad Boadh nyoge naa Ruohdh, ge ngad boadh wun ni, ngo anyuol tihn noon ni yi geen Deabid. ¹² Abea dhe yoohn ka ungey wune ngo e gen: nyepelaal uyoadu e ngo apiehl yi adyaany gih nyam laahye ke lum yea kedea ngo abahj ke waaro."

¹³ Ke yi reehg acielo ne ngio, wuohdjuog ge ake waahdo ne mor mor kii maalo umahd gene rog gen bang wuohnjuog gihn bang jo kwaah ni. Maa athub gene tiehd e ge wahr wahy puoj Juog kob gene,

¹⁴ "Puoj yihr Juog maalo
kedea upiny kan Juog dhaahre acube yihr joe
naa amihn cwihnye keehd gen."

¹⁵ Batiene naa abeehn wuohdjuog uaay gene udo gene maalo, e yaa kwaah ge adog ne rob ke rog gen kob gene, "Coa Bedhlehem ne maany giih ni ayug rog gen ni, naa arob Juoge ke dhe yoohn wuohdjuog yihro."

¹⁶ Uaay gene kaano ke laahdo, uyoad gene Maarya keehd Jocebe kedea nyethiin maano e ngo ne yaa adyaany gihn ni. ¹⁷ Naa aniid jo kwaah nyethiin arumo, e gihn anaa arob wuohnjuoge yihr gen ke nying nyethiin, abeehn gene ke ne robo yihr nyoge cang. ¹⁸ E nyoge cang naa alihng gene giih nu e ge ake cwaahng kwaade tooro. ¹⁹ E Maarya giih ni ayug rog gen ni, ge abeehne ne maa ke wiihe ke kwaan gen cang. Noono ucoare wiihe rog gen kedea upahre keraahyo ke cwihnye. ²⁰ Maa abeehn jo kwaah arumo udoog gene e ge uwahr e ge puoj Juog bang kwaad giih ayug rog gen ni kedea muu alihng gene, uniid gene gen thiow ke nying gen. E thiow, giih ni rog gen atiihy gene ne cohg wa kwaad kaa arob wuohnjuoge yihr gen.

Kaa Acag Nying Jeacuu Ukedhe Yi Wod Juog

²¹ Yi bedahg nihn, naa abeehn cahng thoame yea thiow, e nyinge ake caa ne Jeacuu, anahg nying anaa ateed wuohnjuoge, e poohd tooro yi yej.

²² Naa athum dhe yoohn luog rog wa kwaad kaa anaa agweede piny yi loohng Juog ni, e Jocebe kedea Maarya nyethiin akaab gene ucidh gene geen Jeruucalem, beere ngo cub yi cing Juog. ²³ Gihn ni ayug ree wa kwaad kaa anaa agweede yi kitaab Juog kejea, "Kwaad kayo maa nyethiin cuow dhiil kaa kedh yi wod Juog, ucube yihr Juog." ²⁴ Maarya ge keehd Jocebe ge abeehn geen Jeruucalem thiow beere ge beehn ne nahg kar akuy ariow wale amaame ariow me thene piny yi Wod Juog wa kwaad kaa ateed Loohng Juoge.

²⁵ Nyin moogo anaa anudo yi Jeruucalem me nyinge anahg Cimon. Ngo anahg dhaano maa abiohgrwaal maa abeehdo e ree anaa agwaaye yihr Juog ke coon. Yihdh rune noono abeehdo e ngo koar ka ubeehn Juoge uohre Kriihjto ne boadh yaa Yijarael. Thiow Wahy Juog anaa ree, ²⁶ kedea anaa arob Wahy Juoge yihre kuu umodho kejea ngo buu uthow e Ngad Boadh nyoge keá niido. ²⁷ Kaano e ngo abeehn Wahy Juoge ke ne kedh yi cwihny Cimone, ubeehne yi laaro gihr Wod Juog cahng ni. Anahg cahng nu ke ngude e naa abeehn Maaryae ge keehd Jocebe ukahl gene nyethiin beere kwaad giih anaa arob loohng Juoge, ge beehn gene ke ne tiihyo ke nying nyethiin. ²⁸ Muudhe, e Cimone nyethiin akaabe maa aboame ngo yi koohre ukwaye Juog e muohj koohr Juog kobe,

²⁹ "Juog Ruohdha, me neehn kaa
anaa ateedi ngo yihra
kea noono wii cingi riha a ge beehda baahngi
uthowa arumo.

³⁰ Bang gihn awaahn ni, dhe yoohn ka boadhi nyoge kii ngo aniida arumo ke wonga.

³¹ Dhe yoohn nu ngo agwiiri ke nying thaahy cang,
ke bang wiih piny ne dug.

³² Nyethiin gihn e nuu ubeehn ne meeny piny yihr thaay aduuno
udoohng wudh yaa Yijaraele mor keehde
uyahb wong lwaage ne dug."

³³ Wur nyethiin kedea men ge abeehn ne gaahy ke nying giih arob Cimone ke nying nyethiin yihr gen. ³⁴ Batiene maa adooj Cimone gen urube thiow yihr Maarya kobe, "Nyethiin gihn, beehd e ngo akwahny Juoge oogo, beere thoohdh nyoge kiin yaa Yijarael ge urwaahny kaa nyinge kedea thoohdh mooge ge ubodh ke bange. Maa thiow nyethiin gihn, beehd e nuu unahg kihd gihn maa abeehno kaa bang Juog. Keehd maano dahng nyoge me thoohdh ge urubo ree keehd kwaad giih me reje. ³⁵ E thiow giih roam gene ke cwihny gen, giih ngo rog gen unyoadh gene oogo uniid gen ne tang gay. Abea yih Maarya ke ngudi, kwaad raahm aduulo me teeg yih uyoade udoohng wa aduuni akaw piny kaa pala."

³⁶ Nyekihj me nyinge Ana anudo thiow maa anahg ngad agamloohngjuog thiow. Ngo anahg nyaar nyin me nyinge Panwel, ngad tien paar nyoge mooge me cuohn ne yaa Acer. Ngo anaa abeehdo keehd cuore ke kar run abiihberiw

cog kaa anyuom cuore ngo nyuomo. ³⁷ Batiene keehdo e cuore noono anaa aguo thoo maa adoohnge piny ne gulo uwahdhe kaa adoohng rune ne jiehangween wonge angween e ngo beed yi laaro gihr Wod Juog keede cog, e kway Juog ke bang decahngo keehd dewaahr. Mare anahg kway Juog kedea kweehr cam. ³⁸ Cahng ni abeehn Maaryae keehd Jocebe yi laaro gihr Wod Juog, dhaar ni anaa abeehno thiw. Noono maa amuohje koohr Juog kedea urube ke nying nyethiin yihr yaa anaa ne koar ka beehno Juoge ukahle dhe yoohn boadh wahy yihr yaa Jeruucalem.

³⁹ Naa athum Jocebe ge keehd Maarya ke yug giih daahd loohnge yihr gen, e ge adog geen Naajaread yi piny Gaalili. ⁴⁰ Maa abeehn nyethiine arumo udoonge e teeg mee kedea e nyepinye ge ngahye. Maa adooj Juoge ngo thiw keehd dooj me ne cohg.

Jeacuu Nii Wod Juog E Dhoohg

⁴¹ Jocebe ge keehd Maarya ge na beehdo e ge caa geen Jeruucalem ke nying wong yi nihn Yaan Amono. ⁴² Cahng Yaan Amono maan ni arumo, e Jeacuu rune ge apaar wonge ariow, e ge ake cidho Jeruucalem wa kwaad ka ne kwaay gene ngo ke yugo. ⁴³ Naa athum nihn Yaan Amono, e ge miih Jeacuu maa wahn ge adog paajo udoohnge ke Jeruucalem e kwihy gene. ⁴⁴ Wudh gen anaa apar gene kejea moogo e ngo anaa ake caahdho ke yaaj mooge maa yaa akuud gen. Uthum bad decahngo acielo e Jeacuu kuu awahnh bang gen. Gihn nu e ge ake thubo ke daahd ngo keew nyoge maa wad keehd gen kedea keew gome giih gen. ⁴⁵ Naa abahnge ngo kuu ayoad gene, e ge adog Jeruucalem ne daahd ngo. ⁴⁶ Yi dahg nihn arumo e naa ayoad gene ngo yi laaro gihr Wod Juog, e ngo apiih keew yaa puohny giih Judea. Anaa apiih now e lihng luub gen naa arob gene robo kedea ge apeehnye peehnyo keehd kwaad luube mooge. ⁴⁷ Yaa aliing giihe naa arobe kedea kaa apeehye kii ngo, wale dhe yoohn kwaad kaa aduoge wudh luube kii ngo, ge agaahy. ⁴⁸ Kaa ayoad Maaryae ngo ge keehd Jocebe e ge thiw ge acahng gaahy ne cohg. Maa arub Maaryae mene yihre, “Nye waahda gihn! Kwaad gihn noono ayugi rog wan nu? Maahny an kedea wuru kaa abuhj wane ke daahd yihn e wudh wan ane cohnd kii ngo!”

⁴⁹ Maa abeehr Jeacuu ngo kea, “Gihn e naa anahgu rogu ke daahd an? Beehde kwihyu kejea an naa yihdh giih wura ne?” ⁵⁰ E kwaad dhe yoohn ni abeehr Jeacuu ngo yihr gen yea ngo kuu adead gene beer mee ne cohg.

⁵¹ Batiene, e Jeacuu ake aay keehd gen ubeehn gene Naajaread tiehd. Thiw maa acube wiihe ke ne lihng gihr gen cog. Noono e Maarya men kwaad giih ayug rog gen wudh gen amage mago kii cwihnye. ⁵² Maa abar Jeacuu maalo keehd doohngo ke guohbe kedea ke ngahy luube thiw, e Juog kedea nyoge arumo cwihny gen ake mihno ree keter.

Puohny Joon Ngad Luogwahy

(Mat 3:1-12; Mak 1:1-8; Jon 1:19-28)

3 ¹ Yihdh nihn nu, e ngaa me nyinge Tiberio e naa anahg Jaah gihr Roama gihn duohng naa amag paajo keehd kar run apaar wonge abiihj. Yihdh run nu thiw e Poantya Pilaato anaa anahg muudiihr gihr muudiihrya mar Judea. Kedea Eroade e anaa anahg ruohdh naa amag Gaalili ke kare maa Pihlihb umen e naa amag Yiturea kedea piny Tracoanitiy. E thiw Licanaj e naa amag piny Abilen. ² Yi wong nu thiw e naa anahg Anaj kedea Kaaypaj jo doohng yaa lam. Yihdh run nu e naa abeehn Juoge unyoadhe luube yihr Joon waahd Jakarya, maano e Joon anaa yi ukang dom. ³ Batiene arumo e Joon ake aay e kaahn yihdh miehy dhe naam Joohrdan e puohny nyoge kejea maan gene anyoohne giih ayug gene kedea umuoj wudh gen ke luogwahy beere anyoohne giih gen wii piny yihr gen. ⁴ Gihn nu apahdh kare wa kaa anaa agweede yi kitaab mar Yicaaya agamloohngjuog naa,

“Nud ke duol me kwaag yi ukang,

‘Gwiiru yooh yihr Ruohdh,

gwiir yooh me ne cohg cohg yihre.

⁵ Yoadu kwaad kuohn beehda aluungo ni,

dhiilu yihdh gen ke paahngo une wudh gene yiiw yiiw.

Maa kuohn thoohny ni,

kedea kuohn beehda goode ni,

laahyu wudh gen piny cang.

E thiw dahng yoadu dhog yiehdhe

giih ne ngool ngool ni,

tienyu gen udoohng gene ne cad cad.

E kwaad yiehdhe muu yihdh gen ne cony cony ni,

ge dhiilu kaa puuyo udoohng gene nong mee.

⁶ Lwaag cang ke bang upiny,

dhe yoohn ka ubeehn Juog ne boadh nyoge kii ngo

udhiil gene ke niido ke nying gen.’”

⁷ Kaano arumo e naa abeehn amahr nyoge me thoohdh uwaahd gene oogo ubeehn gene bang Joon beere wudh gen ke muojo keehd luogwahy. Noono e Joon ake rubo keehd gen kobe, “Wu nyoge me reje me neehn thoohne maa wu beehda yaa waal. Gihn daahdu ngahj! Wu daahd ukoolu rahny cwihny Juog ge beehni, abea cwihnyu kuu arahnyo rog anyoohne giihu! ⁸ A teed lubo maa athiir yihru: thubu kaa awaahn kan ke tiihy giih me beeye beere ngo ke ngeyo rogu kejea anyoohne giihu ke alogu ngahdhu. Kaano e kare nud umuoja wudhu ke luogwahy. Yaage wudhu keá paru kejea ne nahgu nyethen Abraahm e Juog wu buu ukihme. Wu kihm Juoge kihmo keehd maa akwanye wun ne joe. Kare nud yihr Juog ukaabe wey leele giih ni uloge gen udoohng gene ne kwaay Abraahm. ⁹ Ukihm mar Juog muu uroomo wa ley maa apaage me ngod yen piny keehd biey gen agwiire ke nyingu. E kwaad yaadh gihn nyuol keehd nyethen me be cam dhiil kaa ngod piny cang uthoohre yi maaj ne waang.”

¹⁰ Batiene arumo e nyoge Joon apeechny gene peechny kob gene, "Abea yug wane gihn arumo?" ¹¹ E ngo abeehr Joone kobe, "Ngaa yihre ne waare ariow, dhiile acielo ke cubo yihr ngaa yihre tooro waahro. E ngaa yihre ne gihn me cam, nywaage cam nu keehd ngaa yihre tooro cam."

¹² Yaa gwaay cuol thiow, ge abeehn bang Joon beere wudh gen ke muojo keehd luogwahy. Maa apeechny gene kob gene, "Ngad puohny, yug wane gihn?"

¹³ Kob Joone yihr gen kea, "Jwaaru ajweehr gihn daahd akuume cog."

¹⁴ Kaano thiow e acaakere mooge ge ake peechny yihre kob gene, "Yug wane gihn?"

Kob Joone kea, "Ngiihny nyoge keá peeju ke bad. Gihn maa toohd thiow, keá tahrú piny yi kuohm dhaano ke dhieny. Rom dhaane kaa koohg mare cog ne kooge ke ngo."

¹⁵ Amahr nyoge me thoohdh thiow ge anaa ake kuro kejea Juog ka oohre Ngad Boadh nyoge yihr nyoge adoohng cahng. Gihn nu arumo e nyoge cang cwihny gen aroam gene roamo kejea ka moogo e buu unahg Joon e nuu unahg Ngad Boadh nyoge keree? ¹⁶ Maa abeehr Joone ngo yihr gen cang, "Yaage luogwahy mara ge cuba yihru kan ni, beehda luogwahy mar piih now. Ngaa me teege akaal wiih teeg mara muu ulog beehno ke batiena nud. Ngaan nu e naa ngaan duohng riha, gihn me a be rom goony thool giih wuoy tiene. Wahy Juog ke ngude e nuu uwuoje wudh nyoge ne muoj gen ke luogwahy beere nyoge cwihny gen unghamo kedea uteehng yiiho gihr gene wa ngiihnyo e thaahdh ke maaj. ¹⁷ Ataaj me wa gihr kuor beel nii cinge, noono e nyoge ge kuore kuoro wa beel ukedhe liil yi gala. Abea coang ge ucwinye keehd deeh maaj me waang e ngo be gug." ¹⁸ Joon nyoge anaa puohnye keehd Ciig Beer keehd dhog yiehdhe me thoohdh keter uwiide wiih lume piny yihr gen thiow kejea dhiil gene dhe yoohn kar kuowo mar gen ke waaro.

¹⁹ Eroade, ge anahg maamuur, abeehn Joone ne cayo ke nying Eroadaj ciuh umen, bang gihn ngo akedh Eroade wod ne dhaago yihre. Ngo acay Joone ke nying kwaad giih me reje mooge maa atiihye cang. ²⁰ Maa abeehn Eroade uyuge deeh awuohj moogo me duohng umage Joon udiile ngo wod yi karkoohn.

Luogwahy Acub Yihr Jeacuu

(Mat 3:13-17; Mak 1:9-11)

²¹ Nye kaano amuoj Joone wudh nyoge muojo, e Jeacuu wiihe ake muojo thiow keehd luogwahy. Abea nye kaa anaa apoochde e Jeacuu anaa ake kwahyo, e maalo yea ree ayabe yabo, ²² ubeehn Wahy Juoge wa kihd akuur upiihe wiih Jeacuu. Kaano e duol ake lihngo kii maalo kobe, "Yih naa waahda maa anhyaara kedea cwihnya med rihi."

Ka Kwaan Batién Jeacuu

(Mat 1:1-17)

²³ Ge anaa athub Jeacuu ke tiihy mare ni, e rune ge anahg kar dhaano aduuno wonge apaar. Ngo anaa acuohn kejea ngo beehda waahd Jocebe now. Jocebe ge waahd Ehli ni. ²⁴ Abea wur Ehli anahg Mathahd.

Mathahd wahn anahg Leabi,
wur Leabi anahg Malagi.

Malagi wahn anahg Janaa,
e wur Janaa anahg Jocebe moogo.

²⁵ Jocebe gihn anahg waahd Mathiiatyaj.
Amoj ge anahg wur Mathiiatyaj.

Wur Amoj anahg Nahum,
e Nahum wahn anahg Ejli.

Nagai wur Ejli.

²⁶ E Nagai waahd Maadh.
Maadh waahd Mathiiatyaj moogo,
wur Mathiiatyaj gihn ni naa Cemean.

Cemean wahn anahg Joceg.
Joda wur Joceg.

²⁷ E Joda wahn anahg Joanan.
Rehja naa wur Joanan.

Jerubaabel wur Rehja.
Cealtiel wur Jerubaabel,
e wur Cealtiel beehda Neri.

²⁸ Neri waahd Malagi moogo keehdo.
E Malagi gihn wahn beehda Adi.

Adi waahd Kojam,
e Kojam waahd Elmadam.
Elmadam waahd Er.

²⁹ E Jocwa moogo e naa wur Er.
Eliejer wur Jocwa.

Jorim wur Eliejer.
Mathahd moogo keehdo e naa wur Jorim,
e Leabi moogo e naa wur Mathahd gihn ni.

³⁰ Leabi gihn wahn anahg Cimon.
E Cimon wahn anahg Juuda.

Juuda wahn anahg Jocebe moogo keehdo.

Jonam e naa anahg wur Jocebe gihn ni.
 Elyakihm anahg wur Jonam.
³¹ Ubeehn Melea unahge wur Elyakihm.
 Melea keehdo wahn anahg Mena.
 Wur Mena Mathaadha moogo dahng.
 E Mathaadha gihn ni wahn anahg Nathan.
 Nathan wahn anahg Deabid Ruohdh.
³² Deabid wahn anahg Jeci.
 E Obed e naa anahg wur Jeci.
 Buoj wur Obed.
 Calmon wur Buoj.
 Naacohn wur Calmon.
³³ Aminadaab wur Naacohn.
 Admin wur Aminadaab.
 Wur Aminadaab e naa Arini.
 Ejron wur Arini.
 Perej wur Ejron.
 Perej wahn Juuda moogo.
³⁴ Juuda gihn wahn anahg Jeakob.
 Jeakob waahd Yijaag.
 Yijaag waahd Abraahm.
 Abraahm waahd Tearah.
 Tearah waahd Nooh.
³⁵ Wur Nooh e naa Cerug.
 E Cerug wahn anahg Rio.
 Peleg wur Rio.
 Peleg keehdo wahn anahg Eber.
 Wur Eber anahg Ceala.
³⁶ Ngad batien Kaayn wur Ceala.
 Arpagjad wahn anahg ngad batien Kaayn.
 Ceam e naa wur Arpagjad.
 Nooh wur Ceam.
 Lamej wur Nooh.
³⁷ Methucala wur Lamej.
 Enog wur Methucala.
 Enog wahn anahg Jared.
 Maahlaalel wur Jared.
 Kaayn moogo e naa wur Maahlaalel.
³⁸ Enoj e naa wur Keanan gihn ni.
 Cedh naa wur Enoj.
 Adam e naa wur Cedh.
 Abea Adam, e naa waahd Juog.

Jeacuu Atum Atiihb Ukeehge

(Mat 4:1-11; Mak 1:12, 13)

4¹ Kaano arumo maa aduu Jeacuue ke yoohn naam Joohrdoan kaa anaa amuoj Joone wiihe yi ngo keehd luogwahy. Ubeehn kuohm Jeacuu ne romo keehd Wahy Juog cang. Maa akaab Wahy Juoge ngo ukedhe ngo kar keede yi ukang, ² kaa atum atiihb ukeehge ngo ke nihn jiehariow. Gihn maa acame tooro yihdh nihn nu maa anahg kahje ngo batien nihn nu. ³ Maa arob atiihb ukeehge ngo yihre kobe, “Nea yih beehda Waahd Juog ne cohg, kea log leen ni naa amono.”

⁴ Maa abeehr Jeacuue ngo yihre kea, “Bekihde! Wa ngo agweed yi kitaab Juog naa, ‘Padh amono cog e ne bodh nyoge keehde.’” ⁵ Maa akaab atiihb ukeehge ngo ukedhe ngo maalo ka me baahr mee, unyoadhe kwaad giih nud upiny kan cang yihre ke kwaan gen ke nye wong kaano. ⁶ Urube yih Jeacuu kobe, “Yih uyuga ne ruohdh yihdh giih nu cang. Giih anyoadha yihri ge beehda giiha maa acub yihra. Caahn e beehda kar cwihnya ucuba gen yih ngada me daahda me nhyaar cwihnya. ⁷ Awaahn ni nea wiihi kuuli ke piny nyuma kan uwuori an e ge cuba cubo yihri cang.”

⁸ Maa abeehr Jeacuue ngo yihre kea, “Wa ngo agweed yi kitaab Juog naa, ‘Nahge ke Juog keede e ne wuor kede e ne gihre tiij.’”

⁹ Jeacuu akaab atiihb ukeehge ukedhe ngo geen Jeruucalem ucube ngo alidh Wod Juog. Maa arube yihre kobe, “Nea yih naa Waahd Juog ne cohg, kea thoohr rihi piny ke kan. ¹⁰ Bang gihn ngo agweed yi kitaab Juog naa, ‘Juog Wuohdjuog giihe, e koar yihn, ge uohre bangi urihng gene ukoal gene yihn beer mee.

¹¹ Yih uboam gene uthaang gene yihn kii cing gen beer mee, utoor leelo me cwaany tieni.’”

¹² Maa abeehr Jeacuu ngo yihre kea, “Wa ngo arob kitaab Juoge kea,
‘Juog e ge naa Juog Ruohdh,
ngo keá tum now ke dhieny.’ ”

¹³ Naa athum atiihb ukeehge ke tum Jeacuu keehd dhog yiehdh ni thoohdh, e ngo awiie ne koar cahng moogo.

Jeacuu Apuohnyo Gaalili

(Mat 4:12-17; Mak 1:14, 15)

¹⁴ Batién gihn nu, e Jeacuu adoo Gaalili, e teeg Wahy Juog ne ree keter. E dhog ke nying giih atiihye akeedho ke bang yi paajo, ubeehn nyinge uwiihje. ¹⁵ Jeacuu apuohnyo ke bang yiehdh kuohn amaade giih yaa Judea maa apuoj nyoge ngo keraahyo.

¹⁶ Keehdo e Jeacuu acahg aay ucea Naajaread kaa adoonge yea. Batiene yi cahng Cabadh man arumo, e ngo acaa yi wod amaad gihr yaa Judea wa kwaad ka ne kwaaye ngo ke tiihyo. Uyedhe wiih abar maalo ne kwaan kitaab Juog.

¹⁷ Batiene e kitaab Juog gihn agweed Yicaaya agamloohngjuoge, ake cubo yihre. Maa alare kood warga arumo uyale kaa agweede yea kejea,

¹⁸ “Wahy Juog Ruohdha abeehn wiha ne niim,
bang gihn Juog a akwahnye oogo,
beere Ciig Beer ni,
kahla kahlo yihr nyoge maa angoohng.

Juog thiow a akwahnye oogo,
ubeehna ne luny jo amag oogo kedea thiow,
a aohre uyaba nying yaa acoor,
uniid gene piny.

A aohr Juoge keehdo thiow,
ulunya yaa guum bahng oogo.

¹⁹ Juog a aohre keehdo thiow,
ne teede yihr nyoge

kejea cahng boadh Juoge nyoge yea, adoohng cahng.”

²⁰ Noono e Jeacuu kood gihr wargahng kitaab Juog adole dolo, urwaage ngo yihr ngaan cuung buud ngad kwaahno. Ucea ne piih kur yaa puohny. Amahr yaa anaa anudo wod amaad nying ge atal ne many bang Jeacuu. ²¹ Noono maa acahge rob yihr gen kobe, “Tihn gihn agweed yi kitaab ni ngo apahdh kare.”

²² Noono arumo e nyoge adog cwaahng ke nying luub beey ni naa arobe maa apeehy gene ke rog gen kob gene, “Ngahda beehda waahd Jocebe e gihn ne?”

²³ Maa arob Jeacuu ngo yihr gen kobe, “Ngo beehda gihn me ngahya ngo urobu yihra ke ucaale kejea, ‘Akiim kuong rihi ke thiehdho umodho.’ Thiow urobu yihra kejea, ‘Tiihy kwaad giih anaa alihng wane e ge ke robo kejea ge ayugi Kaparnaam yi geen wan!’ ”

²⁴ Ubar Jeacuu ke maalo ke rob kobe, “Ngahyu ngo jo wan kejea agamloohngjuog beehda ngaa me be kuong ke wuoro yi geen paar gen kaa anyuole yea. ²⁵ Teeda teedo yihru kejea yiehdh nihn Eliija gule me thoohdh ge anaa anudo tien paar yaa Yijarael ge anaa abeehn kodhe ukweere ke cwii keehd kar run adahg ke nuuj ubeehn kahje me duohng upahdhe paajo. ²⁶ Abea keehd maano e Juog Eliija anaa aohre ke bang gulo acielo maa anaa piny Ciihdoan yi geen Jarepadh. ²⁷ Thiow, nyoge mooge ge anaa anudo me rog gen anaa dhoobo yi piny Yijarael, yiehdh nihn Elica agamloohngjuog. Abea wong dhaano acielo keew gen maa anaa athiehdhe atooro unahge ke dhoohb Nyaamaan, ngad Ciihrya e naa athiehdhe.”

²⁸ Naa alihng yaa anaa amahdo giih ni arob Jeacuu, e yiehdh gen ake kuohd ke ngeeny. ²⁹ Noono upaahr gene ke maalo upahdh gene ke rih Jeacuu, ujob gene ngo jooob, ukedh gene ngo oogo yi diih buur geew, beere ngo kedh gene ke ne thoohr piny ke wiid alidh good. Good ageer geew wiie. ³⁰ Abea Jeacuu ake kahnho ke kiin gen uaaye ke waahdhe.

Jeacuu Dhaano Athiehdhe Kaparnaam

(Mak 1:21-28)

³¹ Naa a'aay Jeacuu, e ngo abeehn Kaparnaam, geew me nii piny Gaalili, kaa abeehne nyoge ne puohnyo yea yi cahng Cabadh. ³² Nyoge anaa agaahy cang bang gihn ngo apuohnyo wa ngaa me yihre ne teeo.

³³ Yi wod amaad gihn anaa apuohny Jeacuu nyoge yea ni, nyin moogo anaa anudo kaano me wiie anaa atiihb ukeehg. Kaano, e nyin ni amaahr piny keehd lalo, e duone atihnge maalo, abea e ngo urubo kobe, ³⁴ “Caay! Ngahda yih Jeacuu ngad Naajaread e gihn ne? Gihn keree e ne daahdi rog wan? Yih abeehn ne nahg wan ne? Kedea yih ngahya ne cohg! Yih naa waahd Juog naa aohr Juoge.”

³⁵ Maa acuow Jeacuu ngo kea, “Lengi! E thiow beehd oogo yi kuohm nyin.” Noono e atiihb ukeehg nyin abaahle ke piny nyum nyoge kaano ubeehne ke oogo yi guohb ngo, abea gihn me raaj maa ayuge rih nyin tooro.

³⁶ Nyoge ge atud kedea ucwaahng gene maa arub gene kob gene, “Beehda puohny me ngihde e gihn? Maahnyu kaa agoohd atiihb ukeehge oogo rog nyoge ge arube yihr gen keehd duol me teeg!” ³⁷ Gihn nu arumo e rob ke nying Jeacuu yi paajo amore ke bang yiehdh miehy cang.

Jeacuu Miih Ciih Piihter Athiehdhe

(Mat 8:14-17; Mak 1:29-34)

³⁸ Gihn nu e Jeacuu wod amaad gihn ni awiie ke piny ucea paar ge Cimoane. Miih ciih Cimoane anaa amag jwaahy me teeg maa arobe yih Jeacuu kejea konye ngo. ³⁹ Noono e Jeacuu acaa wod bange, ucuunge buude, urube yih jwaahy kobe, “Kaa aay ree keehdo!” Maa a'aay jwaahye oogo ree. Ubeehn dhaar ni uyedhe ke maalo piny piow piow uthube ke goong gen.

⁴⁰ Ge adoohnge e cahng kwaar piny ni, e nyoge yaa rog gen ne kwaad atwaanye me thoohdh ge akahl gene bang Jeacuu. Naa acube cinge wiuh ngaa atwaany e ngo athiehdhe thiehdho. ⁴¹ Nyoge me thoohdh thioh atiihb ukeehg abeehn oogo rog gen e ge uyuog kob gene, “Yih beehda Waahd Juog.” E Jeacuu dhog gen adume piny ucuowe gen kede a ge keá meehg rob bang gihn ngo ngahy gene kejea ngo beehda Ngad Boadh nyoge.

Jeacuu Upuohnyo Yihdh Wuud Amaade

(Mak 1:35-39)

⁴² Ke nyang coon e piny adoohng ne waany arumo, e Jeacuu a'aay oogo yi buur geew ucea kar keede. Nyoge ake thubo e ge daahd ngo, naa ayoad gene ngo arumo, e waahdhe adaahd gene kaa areehdho. ⁴³ Abea arob Jeacuu yih gen kejea, “A dhiil cidho wudh geedhe mooge upuohnya Ciig Beer bang gihn e naa tiihy mara naa acub Juoge yihra ne beehn ne tiihyo.” ⁴⁴ Arumo maa abare maalo ke puohny ke bang yihdh wuud amaade giuh piny Judea.

Jo Waahdh Acuohn Jeacuu Umodho

(Mat 4:18-22; Mak 1:16-20)

5 ¹ Cahng man Jeacuu anaa ke cuungo dieng agan baaw gih Geneajared maano e nyoge ge anaa doohng ne yong yong buude e ge lihng lum Juog bange. ² Kaano, e naa aniide baabuure ariow maa amag piny dhe waadh abea ge anahg baabuure giuh yaa maay me luog booy giuh gen. ³ Maa apaahre yi baabuur acielo. Baabuun ngo anahg gih Cimoane. E Jeacuu ake rubo yihre kea, “Kiiw baabuur ka me thiin oogo dhe waadh.” Kaano e apiih upuohnye nyoge e nii baabuur.

⁴ Naa athume ke puohny e arobe robo yih Cimoane kea, “Kiiw baabuur yi diehr kud, uyoadi booy uthoohri gen yi baaw ne maay.”

⁵ Gihn nu e ngo abeehn Cimoane ke ne beehro yih Jeacuu kejea, “Ruohdh! Wa abuhj ke maay keraahyo ke bang dewaahr ke kare. Abea kihd wong reehyo acielo now maa amag wane tooro. Abea bang gihn nahge yihn e naa arob ngo wa maano e booy ge uthoohra yi kud.”

⁶ Arumo maa athoohr gene booy maa amag gene amahr rej me thoohdh ne cohng, me booy apud gene ke ne yiey piny. ⁷ Muudhe yaa gen mooge maa anaa ka me lied keehd gen, acuohn gene beere ge ubeehno ne kony gen. Maa apaahng gene baabuure giuh ariow ni keehd rej upud baabuure ne diih piny.

⁸ Naa aniid Cimoane gihn ni arumo, e ngo apahdh wudh conge nyum Jeacuu urube yihre kobe, “Aay oogo buuda kan, Ruohdh! Bang gihn a beehda ngad adhemuohm now.” ⁹ Cimoane keehd yaae naa adiehno ge abeehn ne cwaahng keter ke nying alwaa amahr rej giuh amag ni. ¹⁰ Keehd waahd Jebeade, Jeamiy ge keehd Joon umen thioh, ge abeehn ne cwaahng. Ge noono ariow ge anahg yaa Cimoane tiehd.

Batiene maa arob Jeacuu ngo yih Cimoane kobe, “Cimoane gihn me tudi ke nyinge tooro! Ngahy ngo kejea ne thube ke wa awaahn ni, unahg nyoge ge naa giuh udaahdi daahdo ukahli gen banga wa kwaad gih rej ge amagi ni.” ¹¹ Batiene e baabuure giuh gen ateehl gene ke oogo dhe agala uwii gene giuh nyepinye piny cang, ubuodh gene batiene Jeacuu.

Jeacuu Ngad Dhoobo Athiehdhe

(Mat 8:1-4; Mak 1:40-45)

¹² Maano e Jeacuu anaa yi geew kiin geedhe e nyin me ree anaa dhoobo abeehno. Kaa aniid nyine Jeacuu niido e ree ariedhe ke piny thaahdh tien Jeacuu, uthube ke kwaj wonge e urubo yihre kejea, “Ruohdh nea cwihnyi ne bange kea yug kuohma kwel.”

¹³ Kaano e Jeacuu cinge arwaage bang ngo maa agweele nyin kede a urube kea, “Cwihnya ne bange! Beehn kuohmi doohng ke kwel.” Nye wong kaano arumo e dhoobo ake aay ree.

¹⁴ Maa arob Jeacuu ngo yihre kea, “Lihng gihn roba. Gihn ayug ree rihi awaahn ni kan ngo keá waay yih ngaa moogo. Abea aay awaahn ni ne nyoadho rihi yih ngad lam giuh kweehr umaanye kuohmi. Nea kuohmi amaany, kea yug giuh kweehr wa kaa anaa arob loohng Moaje ngo bang ne nyoadh ngo yih nyoge kejea dhoobo tooro rihi.”

¹⁵ Abea keehd maano, nying Jeacuu abeehn ne wiuh ubare. Noono e alwaa nyoge ake waahdo bange beere ge beehn ne lihng giuhe ne robe kede a beere yaa rog gen naa atwaanye ge thiehdhe thiehdho. ¹⁶ Abea Jeacuu ne kwaay aay ucea ke kar keede ne kway Juog yea.

Jeacuu Ngaa Maa Abab Piny Athiehdhe

(Mat 9:1-8; Mak 2:1-12)

¹⁷ Cahng man, maano e Jeacuu anaa ke puohnyo e nyoge mooge kiin yaa Paarijea kede a yaa loohng, ge anaa apiih thioh ne lihng. Ge anaa abeehno ke wudh miehr mooge giuh Gaalili cang kede a bang yi piny Judea maa ke bang yi geen Jeruucallem. Teeg Juog anaa rih Jeacuu ne cohng ne thiehdh amahr yaa atwaanye. ¹⁸ Kaano e nyoge mooge ake beehno e ge bien ngaa maa abab piny maa apiehle yi belo. Yaa ni cwihny ge anaa bange beere nyin kedh gene ke wod bang Jeacuu. ¹⁹ Abea naa atoor dhe yooh yih gen me kedh gene nyin abab piny wod bang Jeacuu, ke nying thoohdh

nyoge, e ge ayedh maalo ungaany gene wiih wod maa alwaay gene nyin piny yi wod ke belo gihre keew nyoge kedea ucub gene ngo ke nye kaa apiih Jeacuue yea.

²⁰ Naa aniid Jeacuue kaa ayiih gene kii ngo, e ake rubo kea, “Nyie! Adhemuohme gihi ge awiia piny yihri.”

²¹ Batiene lum nu e yaa loohng kedea yaa Paarijea naa anudo kaano, ge ake thubo ke ngoan kii cwihny gen kob gene, “Beehda ngad gihn noono dhahl Juog wa maan ni? Dhaano utaahngo me rom anyoohne ke wii piny nud ne nea padh Juog keede?”

²² Gihn nu angoan gene kii cwihny gen ke nying ngo aguo Jeacuue ke ngeyo maa apeeheye gen kobe, “Nye yaage! Gihn e ne ngoanu ke nyinge yaa aduunu? ²³ Maa aweehne e ne teeg ke tiihyo, ne rob ngo kejea, ‘Adhemuohme gihi ge awii piny yihri ne,’ wale ne rob ngo kejea, ‘Yedh maalo ucaahdhi!’ ²⁴ Awaahn ni, a ge adoohng ne dhaano utaahngo, a utiihyo ke gihr nyepiny kedea uniidu ngo, gihn me be rom ree tiihyo yihr dhaano utaahngo ne nyoadh ngo yihru kedea unghayu ngo kejea yihra ne tee wiih ngoom me wiia adhemuohme gihi nyoge piny.” Batiene urobe ngo yihr nyin abab piny arumo kejea, “Ateeda yihri, kaa yedh maalo ukaabi belo gihri uci paajo!” ²⁵ Ke wong kaano, e nyin a’aj maalo nyum nyoge cang, ukaabe belo gihre uaaye ne kew e ngo puoj Juog. ²⁶ Nyoge ge acwaahng maa apuoj gene Juog e ge urubo kob gene, “Wa kwaad gihi me teeg ge aniido tihn ne cohg!”

Leabi Acuohn Jeacuue

(Mat 9:9-13; Mak 2:13-17)

²⁷ Batiene e Jeacuu anaa ake caahdho ke waahdhe maa ayoade ngad gwaay cuol me nyinge Leabi e ngo apiih ne gwaay cuol. Maa arob Jeacuue ngo yihre kea, “A daahd udoohngi ne ngad waahdha!” ²⁸ Maa ayedhe maalo, uwiie gihe ke kaano, uaay tiehd ke Jeacuu.

²⁹ Kaano e Leabi cam abeehne ke ne gwiuro paare ke nying Jeacuu. Nyoge me thoohd maa yaa gwaay cuol kedea nyoge mooge maa now ge anudo kar cam. Noono maa apiih Jeacuue ne cam tiehd kehd yaa nu. ³⁰ Gihn nu e yaa Paarijea maa yaa loohng me ne kur Paarijea, jo waahdh Jeacuu apeeheye gene peeheyo kob gene, “Ke nying gihn e ne cahmu kedea umahdhu kehd yaa gwaay cuol kedea nyoge maa awaadh paaje?”

³¹ Maa abeehr Jeacuue ngo yihr gen kobe, “Padh yaa rog gen tooro atwaany ge ne daahd akiim abea beehda nyoge me tuu, gen ne daahd akiim. ³² A kuu abeehno kaa nying yaa koohbo kejea ge abiohgrwaale. A abeehno kaa nying yaa ayiih ngo kejea ge yaa adhemuohm uwii gene tihiy adhemuohme.”

Lubo Ke Nying Kweehr Cam

(Mat 9:14-17; Mak 2:18-22)

³³ Kaano maa akob gene ngo yihr Jeacuu, “Jo waahdh Joon ge beehde cam kweehr gene kweehro kedea ge ukwahyo. Thiw jo waahdh Paarijea ge utiihyo wa gihn nu abea jo waahdhi ge beehd kaa cam kedea ke maadh.”

³⁴ Maa abeehr Jeacuue ngo yihr gen kea, “Kare nud umeehg yaa acuohn athiehg ge nyuohme kweehr cam abea athiehg nud bang gen ne? ³⁵ Abea cahng ukaab athiehg oogo bang gen ubeehn. Yihd nihn nu e nuu ukweehr gene cam.”

Ucaale Ke Nying Puohny Jeacuu

³⁶ Maa ateede ucaal ni yihr gen, “Kare tooro uyiej dhaane waaro me nyaahn udhahbe ngo rih jwaahd waaro maa ayiej. Nea ngo yug dhaane yugo wa gihn nu, e waahr nyaahn e naa araany kedea waaro gihn nyaahn ge be roohm kehd jwaahd waaro gihn acoon. ³⁷ Thiw kare tooro yihr dhaano uyoade koongo me poohd kuu ayaahnyo upege ngo yi keej maa acoon maa akuoj. Bang gihn nea koongo caa ne yaahnyo e yi keej gihn akuoj ucoohdo ubeehn koongo naa tudo uwoje piny cang. ³⁸ Nea kare ne cohg, e koongo me poohd kuu ayaahnyo dhiil kaa peg yi keej me nyaahn! ³⁹ Dhaano maa amahdho ke koongo me keej be cahng yiho ulyaahbe ngo ke koongo me waj kehd, bang gihn me keej e ne med yi dhee.”

Lubo Ke Nying Cabadh

(Mat 12:1-8; Mak 2:23-28)

6 ¹ Cahng ni arumo e Jeacuu ake caahdho e ngo cor yihd puohd maa apuur kehd beel. Cahng ngo anaa anahg cahng Cabadh. Noono e jo waahdh Jeacuu ge ake thubo ke jag cwed beel, udwihny gene gen dwihnyo ke cing gen e ge nyam gene ke maalo. ² Gihn nu yaa Paarijea mooge apeeheyo kob gene, “Maany gihn tihiy jo waahdhi. Ge tihiy gihn maa acier loohng Moaje ke tihiy cahng Cabadh?”

³ Maa abeehr Jeacuue ngo yihr gen kejea, “Ka moogo e gihn anaa atiihy Deabid Ruohdhe naa anahg kahje en maa jo waahdhe anaa akwaanu? ⁴ Deabid anaa abeehn ne ci yi wod Juog maa acame amune gihi lam ne gihi kweehr kedea ucube mooge yihr yaae ne camo. Kwaad gihn ayug Deabide ni, anahg gihn maa anaa amahn loohng paaje ke tihiy yihr dhaano maa now me padh ngad lam gihi kweehr.” ⁵ Maa agooy Jeacuue wihi lume noono piny kejea, “A ge adoohng ne dhaano utaahngo a naa ruohd acub loohng gihr Cabadh yi cinga.”

⁶ Cahng Cabadh moogo kehd, e Jeacuu acahg beehn kar amaad gihr yaa Judea maa apuohnye yi ngo. Ngaa moogo anaa anudo kaano thiw me cing kwiihye anaa abaahl. ⁷ Yaa Paarijea maa yaa loohng ge adaahd dhe yooh me luom gene Jeacuu. Noono maa apiih gene ne boar ngo beer mee. ⁸ Abea gihn anaa yi cwihny gen ngo angahye maa arobe ngo yihr nyin cing abaahl kobe, “Yedh maalo ucuungi nyum yaa ni kan cang.” Maa a’aj nyine maalo ucuunge.

⁹ Kaano e Jeacuu arubo yihr gen kea, “Yaage, a daahde upeeheya wun! Kwaad gihn me ngihde, e naa gihn rob loohnge yihro kejea tihiy yi cahng Cabadh, tihiy gihn me beer ne, wale tihiy gihn me raaj? Kony dhaano me nii thoo, wale paahle oogo yi thoo?”

¹⁰ Maa amaahny Jeacuu bang nyoge, e maahny kun ke kun. Noono maa arube yihr nyin cinge abaahl arumo kea, "Nyieh! Riihy badi!" E nyin bade ariihye riihyo, ubeehn bade udoe kare ne rihb. ¹¹ Gihn nu e yihdh yaa ni ake kuohd keehd tiel kedea ngeenyoo maa athub gene ke gweehg ke keew gen ke gihn urom gene ke yugo rih Jeacuu.

Jo Jeacuu Ge Apaar Wonge Ariow

(Mat 10:1-4; Mak 3:13-19)

¹² Cahng man yihdh nihn nu e Jeacuu acaa wiih good maalo ne ci ne kway Juog yea. Maa anahge dewaahr e ngo kway Juog. ¹³ Naa aruu piny arumo, e Jeacuu jo waahdhe ge acuohne maa akwanye apaar wonge ariow oogo kiin gen kedea ucuohne gen ne jo oohr. ¹⁴ Yaa ngo ge anahg Cimoane ge acuohn ne Piihter kedea Andrya umen maa Jeamij ke Joon. Pihlihb ge keehd Bartholomeao. ¹⁵ Matheewo maa Thoamaj, Jeamij ge beehda waahd Alpaawo kedea Cimoan moogo.^a ¹⁶ Kedea Juudo waahd Jeamij moogo thiw maa Juudo Yijkaariod ngaan anaa abeehn ne luom Jeacuu.

Puohny Jeacuu

(Mat 4:23-25)

¹⁷ Naa abeehn Jeacuu piny ke wiih good keehd gen e acuungo ka maa alaahy ree piny. Thiw jo waahdhe me thoohdh ge anaa anudo kaano. Kedea amahr nyoge me thoohdh ge anaa awaahdo e ge beehn kaa bang yi Judea cang kedea ke bang yi geen Jeruucalem, e mooge ge abeehno ke bang dieng naam duohng gihr Taayr keehd Ciihdoan. ¹⁸ Jo ni ge abeehn bang Jeacuu beere ge beehn ne lihng luube e thiw beere atwaanee giin gen ge thiehdhe thiehdho. Yaa rog gen anaa atiihb ukeehg, ge athiehdh. ¹⁹ Nyoge cang ge adaahd ngo ke gweelo, bang gihn teeg me thiehdh nyoge abeehn oogo rih Jeacuu.

Giih Med Cwihny

(Mat 5:1-12)

²⁰ Gihn nu e Jeacuu amaahny bang jo waahdhe maa athube ke rob kobe,
 "Mihn cwihnyu, wu yaa nii ngoohngo
 bang gihn Dhaahr Juog beehda gihru.
²¹ Mihn cwihnyu, wu yaa abang kahje awaahn ni,
 bang gihn Juog gihn me beer ucube yihru.
 Mihn cwihnyu, wu yaa yuog awaahn ni,
 bang gihn unahg wun nuu ungeedhi.
²² Mihn cwihnyu, nea wu amaan nyoge maa ungol wun oogo kiin gen,
 uyeny gene
 wun,
 uraany gene nyingu
 ke nyinga a ge adoohng ne dhaano utaaahngo.
²³ "Cahng nu e kea mihn cwihnyu ne cohg kedea umielu thiw bang gihn akoohg nud yihru Paar Juog. Ngahyu ngo thiw kejea, kwaad giin nu reje yug gene rogu, ge naa dhe yoohn kwaad kaa anaa atiihy weehw gene kii ngo noono rog yaa agamloohngjuog.
²⁴ Abea nea maru, wu yaa alony ni,
 rob teeg ke nyingu jo wan.
 Gihn me ne wong maalo keehdo ke nyingu tooro,
 bang gihn wu anaa abeehdo upiny
 ka me ngej mee now.
²⁵ Abea wu yaa ayahng awaahn ni rob teeg keehd wun thiw jo wan!
 Wu ubang kahje kwaade tooro.
 E thiw wu kwaad yaa ngeedhi awaahn ni,
 rob uteeg rogu jo wan,
 lalo kedea kuumo ge nuu unahg kwaad giin uwul koohmu noono.
²⁶ Thiw rob teeg keehd wun,
 nea nyoge cang wu puoj gene puoj
 urub gene ke nyingu keehd kwaad giin me beey.
 Ngahyu ngo ne cohg kejea
 gen naa kwaad giin anaa atiihy weehw gene noono
 rog kwaad yaa padh nyoge maa yaa gamloohngjuog.

Kar Nhyaar Jo Mahn

(Mat 5:38-48; 7:12a)

²⁷ "Abea roba robo yihru wu yaa ayiih luma: Nhyaaru jo mahnu kedea tiihyu gihn me beer yihr jo maanu. ²⁸ Yaa lam gihn me raaj rogu kwayu Juog udooje gen, kwayu Juog ke nying jo mahnu. ²⁹ Nea yih dhoohng ngaa mooge dhoohngyo yi thaahngi kun acielo, kea log kun moogo yihre. Nea dhaano athoohr gihri akaabe, e melaayo gihri kea mahni yihre. ³⁰ Kwaad ngaa peehyo yihri keehd gihr nyepiny, e kea cub gihn ngo yihre. Nea dhaano gihn moogo akaabe yihri, e

^a6:15 Cimoane gihn ngahj kejea yaa Roama ge be daahde umag gene paar Judea

6:11 Jon 5:16, 18 6:12 5:16 6:14-16 Tiihy 1:13; Jon 1:40-44 6:19 Mat 9:20 6:20-49 Mat 5-7 6:20 Jeam 2:5
 6:21 Any 7:16-17 6:22 Mat 5:11; Jon 16:2; Tiihy 5:41; 1Pii 4:14 6:23 Mat 5:12 6:24 Mat 19:23-24; Jeam 5:1 6:25 1Kor 4:8
 6:26 Jeam 4:4 6:29 Rom 12:17; 1Kor 6:7

ngaan nu keá cahg ke peehnyo keehdo kejea duue gihn ngo yihri. ³¹ Kwaad gihn daahdu ke cwihnyu kejea yug nyoge mooge ngo yihru, tiihyu kwaad gihn nu thiw yihr nyoge.

³² “Nea wu nhyaar kwaad yaa nhyaar wun cog, e beehda gihn e nuu uyoadu yea kaano? Keehd yaa adhemuohm ngahda ge nhyaar yaa nhyaar gen ne? ³³ Nea wu yug giih beey yihr yaa yug gen yihru, e gihn e nuu uyoadi yea? Bang gihn keehd yaa adhemuohm e ge utiihyo wa gihn nu ³⁴ Abea nea amihdho cubu ke yihr yaa ngahyu keede kejea amihdhe giihu duu gene duuo yihru, e gihn e nuu uyoadu? Keehd yaa adhemuohm, amihdho cub gene cubo beere ngo ke duuo yihr gen thiw. ³⁵ Beehda gihn maa ne cohg, nhyaar jo mahnu. E thiw tiihyu yihr gen keehd kwaad gihn me beer. Cubu amihdho yihr dhaano abea ngo keá gaahnu kejea ngo uduu yihru keehdo. Kwaad akoohg me duohng mee uyoadu kaa dhe yoohn nu. Keehd dhe yooh ni thiw e naa ka uyugu rogu udoohngu ne nyoge maa nyethen Juog Aciehg. Bang gihn Juog beer thiw keehd kwaad yaa cwihny gen tooro ni, ge beehda kwaad nyoge me reje ni. ³⁶ Yugu ngeer yej bang nyoge mooge, bang gihn Juog Aciehg Wuru beehda ngad ngeer yej thiw.”

Nyoge Keá Kihmi

(Mat 7:1-5)

³⁷ “Lubo keá ngolu yi koohm nyoge mooge. E Juog thiw lubo buu ungole yi koohmu. Nyoge mooge ge keá kihmu, beere keehd Juog thiw gihn muu ukihme wun ke nyinge tooro. Wiiu luubo piny yihr nyoge mooge, beere keehd Juog thiw lubo wiie ke piny yihru. ³⁸ Cubu kwaad gihn nud yihru me romu ke cubo, e keehd Juog thiw e wu umuoje ke kwaad gihn acubu ni. Wiihe uduu Juoge yihru keehd amahr mooge me doong keter. Kwaad wan anaa amuuyu keehde, kwaad wal gihn nu thiw e ne wiihe uduu yihru keehd dhe yoohn kaa amuuyu kii ngo.”

³⁹ Kwaad ucaale mooge thiw ge arob Jeacuue ne caal yihdh kwaad giih apuohnye nyoge keehd gen. Maa arube arumo kobe, “Ngaa maa acuor ka me pieye ngaa moogo maa acuor wa en tooro. Nea ngo tume tumo, e gen ke kar ge ariow, ge dhiil pahdh yi buur. ⁴⁰ E thiw ngaa puohny, kare tooro yihre uyoohme wiih ngaan puohny ngo. Abea nea ngaa apuohny giih puohny yihre ge athume, e kare nud uroome ke ngad puohny.

⁴¹ “Beehda ater gihn ge kobi nye weehlo gihn thiin apahdh yi wong wadu ni e ne niidi ukwihyi deeh mari ge nii wongi ni. ⁴² Gihn e ne ngahmi ke nyinge adhaahr urubi yihr wadu noono kejea, ‘Nye umiiho! Beeh koda nye weehlo gihn apahdh yi wongi oogo, abea deeh mari nii wongi.’ Nye ngad waane! Kuong deeh mari ge duohng ke kahl oogo yi wongi batiene e mar wadu ge thiin niidi niido ukahli ngo oogo.”

Ucaale Gihr Nyethen Yaadh

(Mat 7:16-20; 12:33-35)

⁴³ “Yaadh me beer be nyuol ke nyethen me be cam. E thiw kwaad yaadh nyuol nyethen me cam be nyuol ke nyethen me be cam. ⁴⁴ Kwaad yaadh cang, beehde ngo ngey rog nyethene ne nyuole. Ka me beehn nyoge upon gene nyethen dhuuro wiih alwii nud ne? Wale nyethen akanyo wiih aduohng? ⁴⁵ Kwaad ngaa yea apahng ke luube me beeye e luube me beeye ge ne beehn oogo yi yea. Abea ngaa yea apahng ke luube me reje, luube me reje ge ne beehn oogo yi yea. Bang gihn, gihn yaa aduun dhaano e naa gihn beehn oogo kii dhee.”

Ucaale Gihr Yaa Geer Ariow

(Mat 7:24-27)

⁴⁶ “Beehda ke nying gihn e ne cuohnu an ne ruohdh, abea kwaad giih teeda yihru ge be lihngu, utiihyu keehd gen? ⁴⁷ Kwaad dhaano me beehn banga, ulihnge kwaad gihra ne roba utiihye gihn ngo, kwaad ngaan nu, gihn uroma ngo ree unyoada yihru. ⁴⁸ Kwaad ngaan nu uroomo keehd ngaa me daahd geer keehd wod yihre. Umodho, thar wode e naa akuonge ke koanyo piny thuudh mee ne cohg, e ngo koanye ke ka maa kar roohj roohj leelo. Naa aci piny ne boar ubeehn aboare thar wod, e wod ake cuungo ne kihr kihr. Gihn maa ayug aboare tooro rih wod, bang gihn ngo ageer nyine ke wuohbo ka me teeg. ⁴⁹ Abea kwaad ngaan kweer ke lihng luma kedea ukweere thiw ke tiihy kwaad gihn roba kejea tiihye ngo ngaan nu ngo uroomo keehd ngaa maa ageer wode piny e thar wod keá koany piny. Naa aci aboare ne beehno e wod gihre noono anaa abuoahb piny ke pahdho ke wong cahng abeehn aboare keehd kwaad deeh pahdho acielo me teeg.”

Ubaahng Jaabidh Gihr Roama Athiehdh

(Mat 8:5-13)

7 ¹ Naa athum Jeacuue ke rob giih ni yihr nyoge cang arumo, e ngo abeehn Kaparnaam. ² Kaano e jaabidh gihr Roama anudo me yihre anaa ubaahng acielo maa anahg ngad tiihj yihre maa anaa anhyaare keter. Ngo anaa amag atwaany me teege keter maa apude thoo keehd ngo. ³ Naa alihng jaabidhe bang Jeacuu, e ukij yaa Judea mooge ge aohre ke bang Jeacuu ne kwaj wong ngo ubeehne paajo yihre ne thiehdh ubaahng gihn atwaany. ⁴ Noono arumo e yaa anaa oohr ge abeehn bang Jeacuu maa akwaj gene wong Jeacuu kob gene, “Jaabidh gihn beehda ngaa me beer, nea kare nud e kea dhiil ngo ke konyo. ⁵ Bang gihn yaa paaro ge nhyaaare nhyaro keter, e thiw wod amaad ageere ke nying wan.” ⁶ Noono arumo e Jeacuu ake cidho keehd gen.

Abea naa adoohnge cahng ke paajo e jaabidh gihn nyoge mooge maa gome ge acahge kaa oohro bang Jeacuu e ngo poohd kii yooh ne robe yihre kejea, “Ruohdh! Rih kea laang ke beehn paara. A beehda ngaa uci paara. ⁷ Keehd an thiw kar beehna tooro bangi. Rob lumi uaay atwaany ubaahng gihra. ⁸ A ge niidi kan a beehda ngaa me duohng nyum acaakere kedea nud ke nyoge me doonge nyuma. Nea maano e lum roba ngo dhiil gene kaa tiihyo. Nea a urubo kejea beehn dhaane e ngo ubeehno, aay dhaane e ngo uaay. Thiw nea a urubo yihr ubaahng kejea tiihy gihn e gihn ngo tiihye tiihyo.”

⁹ Naa alihng Jeacuue lum ni arob nyine, e ngo ake cwaahng ugaahye ne cohg. Arumo ulog Jeacuue wiihe ke bang amahr nyoge naa awaahdo ke batiene maa akoohbe kejea, “Jo wan! Athiir e ne teeda yihru. Kwaad yiiho me duohng me teeg wa gihr ngaan padh Ujudea kaa kuong ke yoado keew yaa Yijarael.” ¹⁰ Batiene naa adoog yaa anaa aohr jaabidhe ni, e ge yuud ngo e atwaany ubaahng adoohng beer.

Jeacuu Waahd Gulo Maa Athow Atahng

¹¹ Batiene ka me thiin kaano e Jeacuu acahng aay keehdo ubeehne geen Nean keehd jo waahdhe tiehd maa nyoge mooge me thoohdh ge anaa anudo thiow. ¹² Nye wong kaano awahn gene yi geew nu, e Jeacuu ake roohmo keehd nyoge me beehn oogo yi geew e ge kaahn nyedhoohg maa athow. Anahg waahd acielo me men beehda gulo. Amahr nyoge me thoohdh yi geew ge anudo ke dhaar ni. ¹³ Kaa aniid Jeacuu Ruohdhe dhaar ni e yea ake ngeero bange ne cohg maa arobe ngo yihr dhaar ni kobe, “Yih keá yuog, mag cwihnyi!”

¹⁴ Batiene arumo e Jeacuu acaa bang ngaan athow ni umage gihn akaahne keehde maa acuung yaa abiehd ne dihl. Maa arub Jeacuue kobe, “Ngaa maa rihj, akoba yihri kaa yedh maalo!” ¹⁵ E nyedhoohg gihn athow a'aj maalo, uthube ke rob maa acub Jeacuue ngo yihr men.

¹⁶ Naa aniid nyoge gihn ayug ree, e lwahr me duohng apahdh rog gen urub gene kob gene, “Wa agamloohngjuog me duohng atuohl kiino! Beehda Juog e naa abeehn ne kony joe.” ¹⁷ Gihn nu e gihn atiihy Jeacuue ake nyaay ke bang Judea ke kare cang uwahdhe miehy wong akeewo.

Piehj Gihr Joon Kedeo Lum beer Naa Arob Jeacuue Ke Nyinge

(Mat 11:2-19)

¹⁸ Jo waahdh Joon ngad luogwahy giih atiihy Jeacuue cang ge arob gene yihr ngo. Kaano e Joon nyoge ariow kiin yaae ge acuohne ke bange ¹⁹ uohre gen bang Jeacuu Ruohdh ne peehny ngo, nea en naa ngaa akob kejea ngo ubeehn wale padh en beere ge bar maalo ke koar ngaa akob naa ngo ubeehn.

²⁰ Naa awahn gene bang Jeacuu, e ge ake rubo yihre kob gene, “Joon ngad luogwahy e naa aohr wan bangi kejea peehny wane yihn wale yihn naa ngaan anaa rob kejea ubeehn wale ngaa moogo nud me poohd koar?”

²¹ Anahg nye wong kaan ni anaa abeehn yaa aohr Joone ni, e naa athiehdh Jeacuue nyoge me thoohdh me yihr gen anaa atwaanye kedea atiihb ukeehg kedea nyoge maa acoor me thoohdh nying gen ayabe. ²² Batiene arumo maa abeehr Jeacuue ngo yihr yaa aohr kobe, “Doogu bang Joon, urubo gihn aniidu kedea gihn alihngu yihre. Nyoge maa acoor, nying gen ayahbo yaa adwaany piny ge ucaahdho yaa rog gen ne dhoob ge athiehdh uay dhoobe oogo rog gen, nyoge maa amiing yihd gen ayahbo ulihng gene, yaa athow ge acahr batiene thoo kedea Ciig Beer ke puohnyo yihr yaa angooohng. ²³ Med cwihny me duohng yihr ngaa me cwihnye be diiw ke nyinga!”

²⁴ Naa a'aay yaa anaa aohr Joone arumo, e Jeacuu alog rob yihr amahr nyoge ke nying Joon kobe, “Ge anaa cidhu yi ukang, wu anaa acaa ne maany gihn? Anahg ubeej me yahng yame yahngo? ²⁵ Nea padh ubeej e beehda gihn e naa acidhu ne maanye? Ngo anahg dhaano maa angahbo ke waare me ngien gen teeg? Bekihde! Yaa ngaab waare me ngien gen teeg kedea ge beed yi mow, ge beed yihd miehy ruohdhe. ²⁶ Abea wu anaa acidho ne maany ngaa me ngihde? Agamloohngjuog ne? Ayiih, ngo beehda agamloohngjuog. Ateed gihn maa athiir yihru. Joon duohng rih agamloohngjuog. ²⁷ Bang gihn anahg en naa arub Juoge ke nyinge kedea ugweed gihn arob yi kitaab naa, ‘Maany! Ngad wuohna uohra wong maalo nyumi

ne gwiir yooh yihri.’

²⁸ Teeda teedo yihru, kejea Joon beehda ngaa me ne wong maalo keter yihr kwaad dhaano utaahng maa anyuol dhaage. Abea keehd maano e ngaa wiihe ne dhe caahn yi dhaahr Juog e ngaan nu wiihe ne maalo rih Joon.”

²⁹ (Kaano arumo, e nyoge ke kar ge cang, keehd yaa gwaay cuol naa alihng gene luub Jeacuu e ngo ayiih gene kejea dhe yoohn anyoadh Juoge beehd athiir bang gihn ge anaa amuoj Joone ke luogwahy. ³⁰ Abea yaa Paarijea maa yaa apuohny keehd luub yi loohng, ge anaa akweer keehd dhe yoohn agwiir Juoge ke nying gen bang gihn wudh gen kuu anaa amuoj Joone keehd luogwahy.)

³¹ “Abea mar yaa upiny awaahn ni kwaad gihn noono e nuu roma gen ree? Ge room kaa gihn? ³² Moogo e ge uroma ke rog nyethen me luohng luube ke rog gen kar tuuo kob gene,

‘Cing wan apam wane,

beere cwihnyu umihno umielu

maa akweeru

kedea gumo agooj wane

maa akweeru ke meehdo.’

³³ Kwaad giih nyethen ni ge ne yugu. Maanyu Joon naa abeehne ke puohnye e beehdo e ngaa me cam baahny kedea giih maadh wa kuong ge thiir yi wiihe. Bang gihn giih nu thiir yi wiihe, e ngo akobu kejea beehda atiihb reje ge naa amag ngo. ³⁴ A ge adoohng ne dhaano utaahng, a abeehno ke puohny mara e keew caame maa kuong ge be kwanya maa akoohbu kejea a ngaa maa awaahdh yi cam kedea maadh koongo. Wu arubo thiow kejea gom maga kaa yaa gwaaj cuol kedea nyoge maa awaadh. ³⁵ Abea roba robo yihru kejea dhe yoohn adiehj tihiy Juoge keehde niid ke rog yaae ge tihiyo.”

Jeacuu Awiihr Ke Mow Me Ngwaahy

³⁶ Gihn nu e ngad Paarijea acielo me nyinge Cimoane Jeacuu acuohne paare ne cam. Noono ubeehn Jeacuue paar nyin ni maa apiih gene ne cam. ³⁷ Kaano e dhaago maa anudo yi geen ni me beehda ngad adhemuohm, alihng kejea

Jeacuu agoong paar ngad Paarijea. Maa akaabe udhoohmo me yea ne mow me ngwaahy. ³⁸ Batiene kaa abeehne wod kaa anahg nyoge yea e acuungo buud Jeacuu thaahdh tiene, e ngo uyuog. Piih wonge ge ameehge lwaar wudh tien Jeacuu uwuunye tien Jeacuu ke yiehy wiihe uciime gen, batiene e moan ni ngwaahy awuoge wudh tien Jeacuu.

³⁹ Naa aniid ngad Paarijea, gihn ayug dhaare rih Jeacuu, e ngo ake rubo ke cwihnye kobe, “Nea nyin ne nahg kwaad dhaano maa agamloohngjuog ne cohg, e dhaar ni agweel tiene nea ngeyo kejea beehda dhaago me beehda ngad adhemuohm!”

⁴⁰ Maa abeehr Jeacuu ngo kobe, “Cimoan! Ne gihra me daahda ke robo yihri!” Maa abeehr Cimoane ngo kea, “Ngad puohny, rob gihri.”

⁴¹ E Jeacuu ake thubo ke rob kobe, “Nyoge ariow ge anaa anudo maa akahbo kaa amihdho yih dhaano acielo maa ngad cub amihdhe yih nyoge. Dhaano acielo kiin yaa ni, anaa akaab kiihye abiihj naa amihdho keehd ngiihny denaar, e ngaan man anaa akaab jiehariow wonge apaar keede naa amihdho. ⁴² Batiene arumo e kar coal ngiihny nyin agoohg yih gen. Ubeehn ngad ngiihny arumo uwuunye nying gen oogo yi wargahng yaa akaab amihdhe beere ge be cahg gene ke coalo. Nea yih e ngaa kiin gen, e nuu unhyaar ngad ngiihny gihn ni keter?”

⁴³ Maa abeehr Cimoane ngo kobe, “Nea mara e beehda ngaan awiie amihdho me duohng piny yihre, e nuu unhyaar ngo.” Kob Jeacuu yihre, “Ngo angahyi ke beehro ne cohg.”

⁴⁴ Batiene arumo e Jeacuu wiihe aloge ke bang dhaar anaa bang gen urube keehd Cimoane kobe, “Dhaar kan aniidi ne? Maahny kaa abeehna paajo yihri tih, a kii goongo ke piih me luoga tiena. Abea tiena ge aluoge ke piih wonge kedea uwuunye gen ke yiehy wiihe. ⁴⁵ A kii naa aloro thiow, naa abeehna, umaahdhi an ke ciimo. Abea maany mar dhaar dhe keá cub piny ke deeh kaa atudo naa abeehna, e tiena ciime ciimmo. ⁴⁶ Mow maa acubi yihra tooro, beere wiiha reya reyo keehde, abea maany dhaar, tiena ge areje kaa mow me ngwaahy. ⁴⁷ Dhiila kaa arobo yihri ne cohg kejea anyoohne giie naa atiihye ge awuuny oogo yihre bang gihn nhyaaahro gihre duohng keter. Abea ngaan awii gihn me thiin piny yihre, yihre naa nye nhyaaahro me thiin mee.”

⁴⁸ Batiene maa arub Jeacuu keehd dhaar ni kobe, “Adhemuohme giie ge awuuny oogo cang.” ⁴⁹ Muudhe e yaa anaa anudo wod, ge ake rubo ke rog gen kob gene, “Beehda ngaa e gihn ge wuuny adhemuohme oogo ni?” ⁵⁰ Maa arob Jeacuu ngo yih dhaar kea, “Cidhi ke yoohm rihi. Yiiho mari yih aboadhe.”

Maahn Maa Akony Jo Waahdh Jeacuu

8 ¹ Batiene gihn ni arumo e Jeacuu acahg aay kaano, e cor yihdh geedhe kedea yihdh mieh e puohny Ciig Beer ge rubo ke nying Dhaahr Juog yih nyoge. Jo oohr kar gen apaar wonge ariow ge anudo keehde ² maa maahn mooge maa anaa athiehdh Jeacuu maa urieme atiihb ukeehg oogo rog gen. Maarya ge ngad geen Madaleana, me ree anaa atiihb ukeehge abiihberiow maa ariem Jeacuu oogo ree ³ kedea Joana ciij Kuja e beehda wajiihr gihr Eroade ruohdh. Cuujaana maa maahn mooge me thoohdh thiow maa anaa akony Jeacuu keehd jo waahdhe. Ge akony maahn giie kaa dhe yoohn acub gene nyepinye yih Jeacuu keehd jo waahdhe.

Ucaale Koohdhe Maa Ayor Dhaane

(Mat 13:1-9; Mak 4:1-9)

⁴ Kaano e amahr nyoge wudh gen acong gene kedea nyoge ake waahdo ke wudh geedhe beehde. Gihn nu e Jeacuu ucaale gihn arobe robo yih gen kejea, ⁵ “Umodho coon nyin moogo koohdhe anaa akaabe ne ci yi puohdho ne puur. Abea naa ayore koohdhe e mooge ge apahdho thaahng yooh, unyon nyoge ge piny ke tien gen maa abeehn winye uted gene gen. ⁶ Abea muu anaa apahdho kar leelo, naa atuuy gene e ge aguo waang bang gihn ngoom me thej atooro thaahdh gen. ⁷ Mooge ge apahdho yi piny dhyay kedea moodho. Abea naa adoong gene e ge ake juul bang gihn ge ateel dhyay piny. ⁸ Abea e koohdhe muu anaa apahdho ka me beer ne cohg, ge anaa acieg ke wuohbo beer mee, e beehlo acielo wiihe ne kar cwede me boab keter.”

Maa agooy Jeacuu wiih ucaale gihre noon ni piny ke rob kobe, “Nea ngaa yihdhe nud me lihngo e kea lihnge.”

Gihr Rub Jeacuu Kuu Ucaale Ke Nyinge

(Mat 13:10-17; Mak 4:10-12)

⁹ Batiene e jo waahdh Jeacuu, Jeacuu apeechny gene peechny ke lum yea ucaale gihn ni ateede ni. ¹⁰ E ngo abeehr Jeacuu yih gen kobe, “Ne ngej yihdh luub Dhaahr Juog beehda Juog e naa acub ngo yihru wu jo waahdha. Abea ngo rob yih nyoge maa anow kaa ucaale,

‘beere ngaan maahnyo keew gen, e gihn me nea niido ne tooro,
e ngaan ne lihngo ne ngio, e gihn me nea deado ne tooro.’

¹¹ “Gihn ne yea lum ucaale gihn aroba e gen. Koohdhe ge ne room keehd lum Juog. ¹² Koohdhe giie apahdh thaahng yooh, gen ne wa lum Juog yih nyoge me lihng ngo, abea ge alihng gene ngo ni, e atiihb ukeehg ubeehno ukahle ngo oogo yi cwihny gen. Kaano arumo e kar yih lum Juog ugahng yih gen utoor dhe yooh me boadh gene wahy gen.

¹³ Koohdhe giie apahdho kar piny maa leelo ni, ge ne room keehd lum Juog yih nyoge maa lihng ngo umodho keehd med cwihny nye wong kaano alihng gene ngo cog. Abea lum Juog kuu amono yi cwihny gen beer mee. Ayiih gene now nye wong kaano alihng gene ngo, abea naa aci kar guume ne beehno, e ge agoohd oogo ugweey gene lum Juog naa alihng gene piny. ¹⁴ Koohdhe giie apahdho yi piny dhyay kedea moodho gen ne wa lum Juog yih nyoge maa alihng ngo ne cohg beer mee. Abea ke nying gihn dier gene keter ke nying giie lonyo ni kedea cwihny ge acub gene rog giie wuohbo keede ni, e thiow, bang gihn nu dier gene keter nu, e lum Juog adeey giie dier gene keehd gene ke maalo wa gihr moodho keehd beel. Muudhe e ka me tiiny lum Juoge yi cwihny gen keehd gihn me beer tooro. ¹⁵ Abea koohdhe

muu apahdh kar piny me beer ge wa lum Juog yihr nyoge me lihng ngo uyih gene ngo ke cwihny gen beehde beer mee, udeehj gene cwihny gen yi ngo, uwahdhe ka beehn lum Juoge utihye yi cwihny gen keehd giih me beey.

¹⁶ “Gahng Ke ngaa me ahh lama ne meeny piny ucahge ngo ke wum piny kaa adiido. Wale ukaabe ngo ucube ngo thar agreehm. Nea kare ne cohg, e maaj gihn ahh ni, dhiil kaa cub maalo wiih baaya beere piny meenye meenyo yihr yaa beehn wod. ¹⁷ Wa maano e kwaad gihn tiij e ngo kan piny ni, gihn nu udhiil ke oohl oogo, ukahle ka me cang uniide ne gay. E thiow kwaad gihn me wiie awum piny, wiie dhiil kaa aal maalo uniide. ¹⁸ Cubu wudhu piny beer mee ne cohg yaage keehd dhe yoohn ka lihngu nyepinye kii ngo. Ateeda wa maano bang gihn ngaa me yihre ne giih me beeye me thoohdh, giih nu ge udhiil Juoge ke jwaa ke mooge me thoohdh. Abea ngaan yihre tooro nyepiny, keehd gihn anaa yihre ngo udhiil ke twahr oogo yi cinge.”

Yaa Wad Ke Jeacuu

(Mat 12:46-50; Mak 3:31-35)

¹⁹ Kaano e miih Jeacuu keehd ge wuud wahn ge abeehn ne maany ngo, abea kar cidh wod bang Jeacuu atooro yihr gen, bang gihn wod anaa apahng keehd nyoge. ²⁰ E ngaa moogo ake rubo yihr Jeacuu kobe, “Miihu kedea wuud wuru ge nii kala kan. Ge daahd yihn ke niido.”

²¹ Maa abeehr Jeacuu ngo kobe, “Miiha kedea wuud wura ge naa kwaad yaa lihng lum Juog ubahngge yi ngo be dhahl gene.”

Jeacuu Yamo Me Teeg Acuowe Unea Dihl

(Mat 8:23-27; Mak 4:35-41)

²² Cahng man keehdo, e Jeacuu arubo yihr jo waahdhe kobe, “Beeh ngudo loo baaw kun caadi.” Noono maa aci gene yi baabuur uthub gene ke ngol baaw. ²³ Abea ge akiw gene baabuur kiiwo, e Jeacuu wonge aguo niine kaa kwala unene. E yamo me teeg ree atihngge tihngo kwaade tooro umiide baabuur ke olo. Kaano e aniid gene e ge nii gihn me raaj ne cohg. ²⁴ Gihn nu maa agoohd gene bang Jeacuu utahng gene ngo, e ge urubo kob gene, “Ngad puohny, ngad puohny, wo umud!”

Kaano e Jeacuu ayedh maalo maa acuowe yamo kedea athewo ke duol me teeg, batiene e yamo ake cuungo maa adog athewo piny unahg piny leng. ²⁵ Naa aleng yame, e Jeacuu wiie aluue ke bang jo waahdhe urube yihr gen kobe, “Yaage! Ka yiho maa ne cohg tooro yihru ne?”

Gihn nu keehdo e jo waahdhe ge ake cwaahng keter umag lwahre gen thiow me keehne maa arub gene ke rog gene kob gene, “Beehda ngad gihn e gihn? Ngaan rubo keehd yamo kedea athewo ulihng gene gihre?”

Atiibh Ukeehg Gihr Graaja

(Mat 8:28-34; Mak 5:1-20)

²⁶ Keehdo e Jeacuu abar maalo keehd jo waahdhe maa angol gene baaw ubeehn gene piny cuohn ne Graaja loog baaw gihr Gaalili. ²⁷ Kaa anyuohn Jeacuu tiene ke wiie agala ne ngio, e ge aroohmo piny keehd nyin moogo me ree anaa atiibh ukeehg. Ke deeh ka me laaj e nyin ngo be ngahbo ke waaro kedea be beehdo paajo abea na beed dom wudh leehde now. ²⁸ Gihn nu arumo kaa aniide Jeacuu, e ngo amaahr piny ke lalo me teeg ne cohg. Maa ariedhe ree piny thaahdh tien Jeacuu e ngo urubo yihre kobe, “Jeacuu! Waahd Juog Aciehg ge Maalo! Gihn e ne daahdi riha? Yih akwaya a keá jooihri.” ²⁹ Gihn ni ateed atiibh ukeehge wa maano, bang gihn nye wong kaano aroohm gene ke Jeacuu nu, e anaa arob Jeacuu kejea beehne oogo yi guohb nyin. Nyin ni kuohme anaa ayihny atiibh ukeehge. Ngo na beehde e mage mago ke nying nihn. Keehd ne kobe kejea nyin toag yi karkoohn, utuohye piny teeg mee ke gele e ge coohde coohdo, ugoohde kii laaro dom kar keede.

³⁰ Noono maa apeehty Jeacuu ngo kea, “Nyingi ngaa?”

Maa akoohbe kejea, “Nyinga beehda Amahr.” Adiehr nyinge beehda Amahr bang gihn atiibh ukeehg me thoohdh ge anaa ree. ³¹ Arumo maa akway gene wong Jeacuu kejea nea kare nud e ge keá rieme yi buur thuudh cuohn ne Jaena ni.

³² Wong Jeacuu akway gene kejea ngweehn urieme gen rog amahr kudhrue maa anaa ake nyahmo dieng good. Maa ayih Jeacuu ngo yihr gen. ³³ Naa abeehn gene oogo arumo rih nyin, e ge amon yi koohm kudhrue. Maa abeehn kudhrue unahg gene ke rudh ke ngweej e ge loohn piny ke dieng good maa anahg gene thoahd yi baaw umud gene ne raj.

³⁴ Naa aniid yaa kwaahde gihn nu, e ge anaa rudh ke ngweej thiow, ugoohd gene kii buur geew ne kwaan kwaad gihn ayug ree yihr nyoge kedea maa arob gene ngo yihr nyoge me beed buud geew. ³⁵ Muudhe e nyoge awaahd oogo beere ge caa ne maany gihn ayug ree ni. Abea naa awahn gene bang Jeacuu kaa ayug gihn ni ree yi ngo, e nyin ayuud gene e ngo apiih thaahdh tien Jeacuu, e wiie adoohng kwel kedea angahbo ke waaro thiow. Gihn nu e nyoge ge amag lwahre mago keter. ³⁶ Muudhe e gihn ni ayug ree, aci gene ke ne teedo yihr nyoge mooge e ge kwaan dhe yoohn kaa athiehdh Jeacuu nyin kii ngo. ³⁷ Batiene arumo e yaa Graaja ge ake rubo yihr Jeacuu kejea dhiile aay, uwiie paar gen piny. Gihn nu arob gene bang naa atud gene ke nying gihn ayug ree. Ubeehn Jeacuu upaahre kii baabuur uaaye.

³⁸ Abea nyin anaa ariehme atiibh ukeehg oogo ree ni, anaa meen meeni kea e ucidho keehd Jeacuu maa arob Jeacuu ngo yihre kejea, ³⁹ “Doog paajo, urobi gihn duohng ayug Juoge rihi ni yihr nyoge.” Noono uaay nyine ucea ne keed gihn ayug Jeacuu yihre ke bang yi geew ne dug.

Nyaar Jearuuj Kedeä Dhaar Wuur Reme Ree

(Mat 9:18-26; Mak 5:21-43)

⁴⁰ Naa adog Jeacuuë caahn loo baaw keehdo e ngo acahg nyoge kaa loro ne cohg, bang gihn abeehde e ngo anaa koar gene ke piny. ⁴¹ Nye wong kaano e nyin me nyinge Jearuuj abeehno uthoohre ree thaahdh tien Jeacuu maa akwaye wong Jeacuu kea cidh Jeacuuë paare. Nyin ngo beehda ruohdh wod amaad. ⁴² Wong Jeacuu akwaye bang gihn nyaare ge acielo cog ngo atwaany kaa atwaany maa thoo. Nyaare rune ge anahg apaar wonge ariow.

Kaano naa acaahdh Jeacuuë caahdho nu e nyoge me thoohdh, ge anaa ake caahdho ne yong yong ke batiene e ngo pud gene ke ne jwang piny. ⁴³ Dhaago moogo anudo keew nyoge giih ni thoohdh ni, me ree anaa atwaany remo me wuur ree ke run apaar wonge ariow e ngo be cuung. Ke run nu e ngaa maa arom atwaany ke thiehdho atooro.

⁴⁴ Muudhe e dhaar ni abeehno ke ngahy Jeacuu ugweele dhe waaro gihr Jeacuu maa abeehn remo unea ke ne thihb ree ke nye wong kaano.

⁴⁵ Maa apeehy Jeacuuë kobe, “Ngaa e naa agweel an?”

Nyoge cang akweer, e ngaa man ukweer kea padh en. Muudhe e Piihter acaa ne rob yihr Jeacuu kobe, “Abea ruohdh, yih upeehny ngaa, maahny kaa adhihr nyoge yihn kii ngo do!”

⁴⁶ Maa arob Jeacuuë ngo kea, “Padh ne maano! Ngahya kejea dhaano maa agweel an nud, bang gihn tee maa a'aay oogo riha nud.”

⁴⁷ Ubeehn dhaar ni uguoe ngo kaa ngeyo thioh kejea gihn atiihye ni angej. Noono upahre oogo kiin nyoge e kuohme urihg ni, uthoohre ree ke thaahdh tien Jeacuu maa ateede gihn agweele dhe athoohr gihr Jeacuu ke nyinge nyum nyoge kaano cang kedeä kaa a'aay atwaany ree kii ngo ke wong kaano. ⁴⁸ Maa arob Jeacuuë ngo yihr dhaar ni kobe, “Nyaara! Cidhi keehd yoohm rihi. Yiiho mari yihn aboadhe.”

⁴⁹ Abea nye wong kaano apoohde e Jeacuu urubo nu, e ngaa moogo ake beehno ke yoohn paar Jearuuj maa arube yihr Jearuuj kobe, “Ruohdh, nyaari ataj. Wiih ngad puohny keä raam keehdo.”

⁵⁰ E gihn ni arob ngaan ni aguo Jeacuuë kaa lihngo, urube yihr Jearuuj kobe, “Jearuuj, yih keä tudo! Yiih ngo ke cwihnyi now, e nyaari uthiehdh ree.”

⁵¹ Naa awahn Jeacuuë paar Jearuuj arumo, e nyoge amahne ke bar wod keehde tiehd. Noono maa ayoadde ke Piihter kedeä Joon kedeä Jeamij maa wur nyethiin ge ke men, ge naa ameehge bar wod keehde. ⁵² E jo muu anaa ke yuog ke nying nyethiin ge acuow Jeacuuë kea, “Lengu do! Nyethiin kuu athow, gihre beehda niine!”

⁵³ Maa angier gene Jeacuu, bang gihn angahy gene kejea nyethiin athow muon. ⁵⁴ Batiene maa abeehn Jeacuuë umage bad nyethiin maa urube keehd ngo kobe, “Nyethiin! Aj maalo!” ⁵⁵ Maa aduu wahy nyethiine ree, uyedhe ke maalo piny ke wong kaano. Urob Jeacuuë ngo yihr nyoge kejea yoad gihn me cam cube yihr nyethiin. ⁵⁶ Batiene e wur nyethiin kedeä men thioh ge acahg cwaahng. Maa arob Jeacuuë ngo yihr gen kejea gihn atiihy ree, keä teed gene yihr nyoge mooge.

Jo Oohr Ge Aoohr Ne Tiihj

(Mat 10:5-15; Mak 6:7-13)

9 ¹ Naa acuohn Jeacuuë yaae kar ge apaar wonge ariow ka maa acielo, e tee acube yihr gen, me riem gene atiihb ukeehg oogo rog nyoge kedeä me thiehdh gene atwaanye giih nyoge. ² Maa aoohre gen oogo beere ge ucidho upuohny gene nyoge keehd dhe yoohn ka nweehd nyoge ke Juog Ruohdh kedeä ne thiehdh nyoge me rog gen naa atwaanye. ³ Noono urobe ngo yihr gen kobe, “Wu noono oohra nu yaage, cidhu abea aroba kejea keä ngaan kaahdo ke nyepiny kejea beehda gihr bang wod yooh. Keehd goohd, wale joogo wale amono wale ngiihny keä kaahnu kedeä waare ariow ge keä kaahnu. Giih nu ge keä kaahnu ke wun. ⁴ Kwaad paan toohngu yea kea beehdu yea kaano uwahdhe cahng uaayu. ⁵ Thioh nea nyoge nud me kweer ke goong wun ke nying tiihy nu ucuu ne tiihyo yihr gen, kea aayu uwiu geen gen piny, uteengu ngoom kaano oogo yi tienu ne nyoadh ngo kejea nea gihn me yoad gen, e maru tooro yi ngo.” ⁶ Noono upahdh gene yooh, ucaahdh gene ke bang yihdh mieh, e ge puohny Ciig Beer kedeä e ge thiehdh nyoge.

⁷ Muudhe Eroade naa anahg ruohdh, bang giih ni ayug rog gen ni, ge alihnge lihngo. Noono maa ane wiie ne cohnd ne cohg, bang gihn anaa alihnge bang nyoge mooge kejea ka moogo e Joon e naa acahr batien thoo. ⁸ Nyoge mooge kob gene beehda Eliija e naa atuohl keehdo, e nyoge mooge dahng kob gene beehda ngad agamloohngjuog moogo maa acoon e naa atuohl keehdo. ⁹ Gihn nu, Eroade ake rubo ke cwihnye kea, “Abea wa Joon wiie anaa ameehga ngol oogo uthowe. Beehde ngaa e gihn ni rob nyoge giih ni ke nyinge awaahn ni?” Maa abeehne yi cwihny Eroade kejea ngaan ni arub nyoge ke nyinge cwihnye ne niid ngo thioh.

¹⁰ Naa aduu jo oohre ke yoohn kaa anaa aoohr Jeacuuë gen yi ngo, e kwaad giih thoohdh naa atiihy gene, ge akwaan gene kwaano yihre.

Nyoge Alihbe Abiihj Ge Ayaahng Jeacuuë Kaa Amune Me Noog

Ubeehn Jeacuuë ukaabe jo oohr giie ubeehne keehd gen yi goan geew moogo me cuohn ne Bedhceada. ¹¹ Amahr nyoge bang Jeacuu alihng gene maa aluub gene ngo kaano. Gihn nu e ge angahy Jeacuuë kaa loro, urube yihr gen ke nying dhe yoohn ka nweehd nyoge ke Juog Ruohdh maa athiehdhe atwaanye giih yaa tuu kiin gen.

¹² Yi laahng cahng ke thiehno e jo oohr ge apaar wonge ariow, ge abeehn bang Jeacuu maa arub gene yihr ngo kob gene, “Ngaan duohng! Rubi keehd nyoge beere ge uaay uci gene ne daahd kar buudo yihr gen ke bang yihdh mieh giih cahng ke kan kedeä thioh beere ge udaahd yihr gen keehd gihn me cam gene. Ngahyi thioh kejea nyoge naa yi ukang dom.”

¹³ Kaano e ngo abeehr Jeacuuë beehro yihr gen kea, “Maa cubu gihn me cam yihr gen.”

Maa akoohb gene kejea, "Yihr wan naa amune abiihj cog kedea rej ariow. Nea padh ngiew e ne cidh wane ne ngiew cam yihr amahr yaa ni amahdo ni."

¹⁴ Yaa anudo cang ge anahg kar cuow alihbe abiihj.

Maa arob Jeacuue ngo yihr jo waahdhe kejea, "Kea noono, meehgu nyoge piih piny naa akuude. Cubu kar nyoge jiehariow wonge apaar naa akuud." ¹⁵ Gihn nu ayug jo waahdh Jeacuue wa kwaad kaano arobe ngo yihr gen nu maa apiih nyoge piny ne raahj. ¹⁶ Ukaab Jeacuue amune abiihj maa rej ariow naa atudo kedea umaahnye maalo maa umuohye koohr Juog ce thube ke toar amune. Maa acube gen yihr jo waahdhe kejea paahng gene gen yihr nyoge.

¹⁷ Arumo maa acahm nyoge cang ne dug, uyahng gene ne cohg. Naa athum nyoge ke cam, e jo waahdh Jeacuu, goan caame giih adoohng piny bang nyoge acong gene congo maa apaahng gene adiide apaar wonge ariow.

Gihn Arob Piihtere Kedea Rob Jeacuu Ke Nying Thone

(Mat 16:13-19; Mak 8:27-29)

¹⁸ Cahng man keehdo e Jeacuu, anaa ne kway Juog kar keede, abea e jo waahdhe ge anaa buude kaano thiow. Upeehnye gen kobe, "Lwaag rob gihn awaahn ni ke nyinga? Kob gene kejea a naa ngaa?"

¹⁹ E gihn nu abeehr gene beehro kejea, "Kob nyoge mooge naa yih Joon, Ngad Luogwahy, nyoge mooge naa yih Eliija e nyoge mooge dahng kob gene kejea yih beehda agamloohngjuog keew yaa agamloohngjuog giih acoon e naa acahr."

²⁰ Maa adog Jeacuue gen ke peehnyo kobe, "Abea nea maru, e kobu a naa ngaa?" E ngo abeehr Piihtere kobe, "Yih naa ngaan aohr Juoge ne boadh nyoge ge beehn ke bang Juog."

²¹ E ngo arob Jeacuue yihr gen kejea gihn nu keá teed gene yihr nyoge. ²² Ubar Jeacuue ke maalo ke rob kobe, "Ngaa adoohng ne dhaano utaahngo, guohbe dhiil raahm yihdh giih me thoohdh. E thiow jo doong paajo maa yaa doonge nyum yaa lam giih kweehr kedea yaa loohnge ge noono cang, ngaan ni ujaahy gene kedea ubeehn gene ne naah abea yi dahg nihn, e ngo ucahg Juog ke tihng maalo ucahre kar thone."

²³ Maa acahge rob yihr gen cang kobe, "Nea ngaa daahd ubuodhe batiena kea jaahye ree maa uguume giih raahm kuohm wa mara ce beehne ubuodhe batiena arumo. ²⁴ Kwaad ngaa kweer ke buodh batiena bang gihn be daahd uthowe e ngaan nu kuowo me guge tooro buu uyoade. Abea kwaad ngaan be dier ke thoo ke nyinga e ngaan nu kuowo me guge tooro uyoade. ²⁵ Gihn e ne kony giih wiih pinye yihr dhaano utaahngo, nea boadh wahy be yoade? ²⁶ Kwaad dhaano, me tud kejea guohbe uyaahr ke nying luube giiha e an thiow, a ge adoohng ne dhaano utaahngo utud uyaahr guohba ke nyinge cahng ubeehna e wiha amoar kedea ke dhe yoohn moar wihj mar Juog Wuur kedea wuohdjuog. ²⁷ A rob athiir yihru. Yaa nud kan ge buu uthow cang, nud ke nyoge kiin gen muu uniid Ruohdh Juog ke nying gen."

Jeacuu Kuohme Ree Aloge Keehd Teeg Juog

(Mat 17:1-8; Mak 9:2-8)

²⁸ Kar batien nihn abiihjbedahg kaa arob Jeacuue gihn ni, e Piihter keehd Joon kedea Jeamij umen, ge akaab Jeacuue uci gene wiih good maalo ne kway Juog. ²⁹ Kaano akwahy Jeacuue nu, e nyinge rog ge alog gene logo, e waaye naa anii guohbe thiow ge ake liel tar ne weej. ³⁰ Ke wong kaano e Moaje ge keehd Eliija, ³¹ ge anaa celang bang Jeacuu e koohm gen adoohng ne maar maar kwaade tooro naa awuohb gene. Noono uthub gene ke rob tiehd ke Jeacuu ke nying kaa adoohng kar aay gihr Jeacuue cahng kii ngo, ke kur thone nuu uyug ree ge ucea Jeruucalem ni. ³² Ubeehn Piihter ke jo waahdh Jeacuu ge ariow ni, uguo niine nying gen ke kwala. Ge atahng gene ni e kaa alog kuohm Jeacuue ree kii ngo kedea yaa ariow thiow naa ake cuungo keehd en aniid gene niido. ³³ Nye kaa athub Moaje keehd Eliija ke aay nu, e Piihter ake rubo keehd Jeacuu kobe, "Ngad Puohny! Ngo beer ubeehdo kan! Nea wa gihn nu kea wii wan ugeer wane abuwe adahg. Acielo yihri maa acielo yihr Moaje kedea acielo yihr Eliija." (Gihn ni arob Piihtere e ree kwihye).

³⁴ Nye kaa apoohde e Piihter urubo, e deeh lwahd abeehno wudh gen ne niilm, umag lwahre gen ge amoal lwahde gen piny. ³⁵ Batiene e duol abeehn oogo kii lwahd gihn ni, e ngo urubo kea, "Gihn e naa Waahda maa akwanya! Lihngu lume beer mee." ³⁶ Naa aleng duole, e Jeacuu e naa aniid gene e adoohng kar keede. Noono e gihn ni ayug ree ni, akan yaa ni ke piny, utoor ngaa maa arob gene ngo yihre.

Kaa Athiehdh Jeacuue Nyethiin Me Wiie Ne Juu

(Mat 17:14-18; Mak 9:14-27)

³⁷ Ruuwow, naa aduu gene, maano e ge loohn piny kaa wiih good maalo, e Jeacuu ake roohmo keehd akuud nyoge me thoohdh naa abeehn bange. ³⁸ Kaano e dhaano acielo ake cuohdo keew yaa nu e duone atihngge maalo kobe, "Ngad puohny, cedhree! Yih akwaya! Luu wongi bang nye waahda gen. Beehda nyethiin acielo cog yihra! ³⁹ Ngo beehd e ree naa atiihb ukeehg. Ngo beehdo e maahr piny ke lalo. E gihn ngo thiow nyethiin wiidhe wiidho, uyale nyinge yalo e dhe uthugi keehd aboohyo. Kar yuohmo tooro me yoade. ⁴⁰ Jo waahdhi ge anaa akwaya kejea riem gene ngo oogo rih nyethiin, abea agoohg ke riemo yihr gen."

⁴¹ E Jeacuu ake rubo kobe, "Wu kwaad nyoge me yiho tooro yihru? Wudhu paru paro kejea a ubeehdo keehd wun uwahdhe weehne? Kahl waahdi noono yihra kan!"

⁴² Nye kaano anaa akahl nyedhoohg bang Jeacuu nu, e atiihb ukeehg nyedhoohg ariedhe ke piny maa ayule ngo kwaade tooro. E Jeacuu atiihb ukeehg acuowe cuowo uthiehdhe nyethiin arumo, ucube ngo yi cing wahn.

⁴³ Ucwaahng nyoge ke nying teeg Juog naa aniid gene.

Nye wong kaano thiow apoohde e dhog nyoge atal nu, e Jeacuu ake rubo keehd jo waahdhe kobe, ⁴⁴ "Meehgu luube giiha gen mon yi cwihnyu, bang gihn a ge adoohng ne dhaano utaahngo a uluom ucub an yi cing nyoge me reje."

⁴⁵ Abea gihn ni arob Jeacuue, bekihd ngaa maa adead yea beer mee kiin jo waahdhe. Bang gihn yi lum gihn ateede ni akan ubahngge yi ngo kuu adead gene. Thiow ge atud ne peehny Jeacuu ke nying yi lum gihn ni arobe ni.

Ngaa Wiihe Ne Maalo

(Mat 18:1-5; Mak 9:33-37)

⁴⁶ Arumo kaano, e nye thar lubo ree acage caa kiin jo waahdh Jeacuu. Ngo acag ree e ngo beehda peehm ke rog gen, kejea ngaa kiin gen e naa ngaa me duohng, wale ngad wong maalo keew gen. ⁴⁷ Bang gihn giih par gene ge ngahy Jeacuue, e nyethiin me thiin akaabe ucube ngo ne cuungo ucinge. ⁴⁸ Maa arube keehd jo waahdhe kobe, “Kwaad ngaa beehdo beer ke nyethiin me wa nyethiin ni, e ngaan nu uroomo wa ngo abeehdo beer kaa an, padh an keeda abea ngo uroomo wa ngo beehdo beer kaa ngaa aoohr an. Kwaad ngaa goong an e beehda ngaan aoohr an, e naa agoonge thiow. Bang gihn ngad dhe caahn kiinu, e noono e naa ngad wong maalo ne duohng yihru cang.” ⁴⁹ E Joon ake rubo kea, “Ngad puohny, dhaano moogo anaa ayuud wane, e atiihb ukeehg ge rieme ke oogo rog nyoge e rob nyingi maa amahn wane ngo bang gihn padh ngado.”

⁵⁰ Maa abeehr Jeacuue ngo kea, “Keá mahnu. Bang gihn ngaa be yug gihn me raaj rogu, e ngaan nu beehda ngadu.”

Yaa Camaarya Akweer Ke Jeacuu

⁵¹ Naa abeehn kar thon Jeacuu udoohngge cahng arumo, e Jeacuu cwihnye acube ne cidh Jeruucalem. ⁵² Gihn nu maa aohre wuohde wong maalo. Maa abeehn yaa nu paajo me beehda paar yaa Camaarya, beere kar pih beehn gene ke ne gwiuro yih Jeacuu yi ngo. ⁵³ Yaa Camaarya ge abeehn ne kweer yih yaa aoohr wong maalo kejea Jeacuu keá pih paar gen yi waahdhe gihn cea Jeruucalem. ⁵⁴ Naa aniid Joone kedea Jeamij umene gihn ni e ge ake rubo keehd Jeacuu kob gene, “Ruohdh, cwihnyi ne bange, uoohr wane maaj wudh gen ke maalo uwaang gene ne?” ⁵⁵ Gihn nu e Jeacuu wiihe aloge ke bang gen maa acuowe gen ⁵⁶ maa acidh gene paajo moogo.

Luube Ke Nying Dhe Yoohn Ka Buodh Jeacuu

(Mat 8:19-22)

⁵⁷ Kaano anaa acaahdh gene caahdho kii yooh, e ngaa moogo ake rube keehd Jeacuu kobe, “Adaahde unahga ngad waahdhi, beere nea ka cii yea e an ucidho keehd yihn thiow.”

⁵⁸ Maa abeehr Jeacuue ngo yihre kobe, “Thoohe yih gen ne kuohn beed gene maa winy yih gen ne wuude me beed gene abea a ge adoohng ne dhaano utaahngo yihra tooro ka me piehla thaahnga yea.”

⁵⁹ Kaano e Jeacuu arubo keehd ngaa moogo kea, “Beehni ubuodhi an.”

E nyin ake rubo yih Jeacuu kea, “Ruohdh wura athow, meehga kuong ci ne koany ngo.”

⁶⁰ E ngo abeehr Jeacuue beehro yihre kobe, “Wii yaa acub wudh gen yihdh giih thunge ukoany gene yaa athow. Abea mari, beehn ne buodh an udoohngi ne ngada, cidhi urubi ke nying dhe yoohn ka roohm nyoge ke Juog Ruohdh kii ngo yih gen.”

⁶¹ Keehdo e ngaa moogo acahg rob kea, “Ruohdh meehg an kuong ci paajo uwiihwa yaa paar wan umodho ubeehna bangi arumo.”

⁶² Maa abeehr Jeacuue ngo yihre kea, “Ngaa maa akuong cinge ke mag rih kweer umodho ucahge maahny caahn, ngaan nu padh ngaa me miehr keehd dhe yoohn ka mag Juog Ruohdhe kii ngo kedea be miehr udoohngge ne nyethiine.”

Jo Waahdh Jiehadahg Wonge Apaar Wonge Ariow Ge Aoohr Ne Tiihj

10 ¹ Batien gihn ni arumo e Jeacuu nyoge kar ge jiehadahg wonge apaar wonge ariow mooge ge akwanye, uohre gen naa ariow ariow, beere ge ucidho wong maalo nyume ke bang kuohn daahde ucidhe ke yihdh gen. ² Maa ateede ngo yih gen kobe, “Tiihj puohny lum Juog yih nyoge ngo adoohng teeg keter, adhaahr ngo uroma ke rih deeh puohdho me puur. Noono e daahd nyoge me thoohdh me tiihy giih acieg yi puohdho. Nea wa gihn nu kea kwayu Juog ge room ke ngad puohdho, umuoje wun keehd yaa tiihj me thoohdh ubeehn gene ne tiihy yi puohdho gihre. ³ Cidhu! Wu noono oohra oogo nu, wa gihr nyethen roohme kiin urude. ⁴ Akoba kejea jenaadh wale joogo, wale wuoy tiel ge keá kaahnu. Wu keá cuungo ke bang yi yooh umaahdhu kwaad dhaano me roohmu keehde.

⁵ “Kwaad paan toohngu yea ne ngio, e kea kuongu rob umodho kejea, ‘Beehdu ke yoohm rogu, wu yaa paan ni!’

⁶ Gihn nu nea kwaad ngaa me nhyaar doohr nud kiin gen e doohr gihru noono arobu nu uyiih ngaan nu. Abea nea ngaa me nhyaar doohr tooro e doohr maru naa acubu udhiil duu yihru kare cang. ⁷ Thiow, beehdu paan upiihu yea kedea camu kwaad cam muu ucub gene yihru maa maadhu giih ucub gene yihru. Bang gihn ngad tiihj koog dhiil kaa cubo yihre ke nying tiihye. Wu keá dag ke bang yihdh miehr.

⁸ “Kwaad geen toohngu yea ne ngio, abea wu angahy nyoge ke loro, kea camu kwaad cam gihn cub gene nyumu ne camo. ⁹ Kwaad atwaanye muu uyoadu rog nyoge, thiehdhu gen. Kedea na rubu yih nyoge kejea, ‘Kar beehn Juog ruohdh ne nahge ruohdh kii ngo awahnh yihru.’ ¹⁰ Abea kwaad geen toohngu yea, ukwihy wun ke loro beer, kea cidhu ke bang yihdh yiehdh geen gen noono urubu yih gen kejea, ¹¹ ‘Wu yaa geen ni maahnyu now keehd lod gihr geenu naa amahg rog tien wan, dhiil wane kaa teeng rogu. Abea gihn nud gen, dhiilu nyepiny acielo ke ngahyo, kejea beehn Juog ne nahge ruohdh kii ngo awahnh yihru.’ ¹² Roba roba yihru kejea giih teeg naa ayoad yaa Codom cahng ukihm Juog ge uyoohd yi gihn uyoad yaa geen kwihy wun ke loro.

Jo Geedhe Me Yiiho Tooro Yihr Gen

(Mat 11:20-24)

¹³ “Beehda kwaad gihn ge raaj wa gihn ge apahdh wudhu wu yaa geen Korajin maa yaa geen Bedhceada! Alwaa giikh teeg ge gaahy nyoge, ge ayug yihdh geedhu ngahda ngweehn me ne yug gen yihdh geedh yaa Taayr kedea Ciihdoan, bang gihr yaa nu cwihny gen ne rahnyo rog anyoohne giikh gen naa ayug gene rih Juog. E thiw ge ne piih uthur e cuole angaab gene. ¹⁴ Ngahyu ngo kejea Cahng Lug Juog e yaa geen Taayr kedea yaa geen Ciihdoan ge ungwaahn Juoge yi lug gihre nu uluge gen. Abea wun lug gihre uteeg rogu keter. ¹⁵ Wu yaa Kaparnaam, wu keá nhyaam kejea paar Juog unahg gihr, Paar Juog be yoadu! Juog wu ukedhe yi buur thuudh cuohn ne Jaeena.

¹⁶ “Ngaa ulihng gihr e ngaan nu gihr e naa alihng. E kwaad ngaan kweer keehd wun, e ngaan nu akweer kaa an kedea akweer ke ngaan aohr an.”

Kaa Aduu Yaa Aohr Jeacuue

¹⁷ Yaa anaa oohr Jeacuue oogo kar ge jiehadahg wonge apaar wongo ariow, ge anaa aduu e cwihny gen amihno keter. Arumo maa arub gene yihr Jeacuu kob gene, “Ruohdh! Keehd atiihb ukeehg e gihr wan lihng gene lihngo ke nyingi!”

¹⁸ Maa abeehr Jeacuue ngo yihr gen kobe, “Ruohdh atiihb ukeehg aniida e pahdh kaa maalo e ngo beehn piny ne bliny bliny wa kwaad gihr maahny kodh! ¹⁹ Teeg acuba yihr beere keehd thoohne kedea yiidhe thiw ge nyuohnu ke piny ke tienu. Kedea tee gihr ruohdh atiihb ukeehg ge ngad mahn gihr thielu ke piny thiw beere gihn me raaj me rome ke kahl rogu tooro ne weey weey. ²⁰ Cwihny keá mihno kejea atiihb ukeehg gihr lihng lihngo, abea mihn cwihny bang gihn nyingu agweed piny paar maalo.”

²¹ Cahng ni keehdo arumo, e Jeacuu cwihny anaa mihno keraahyo ke dhe yoohn Wahy Juog e ake rubo kobe, “Abaa Wura! Yih naa Ruohdh maalo kedea wiih piny cang. Kooohri amuohja tihn bang gihn luube ke nying dhaahri ge ngahy ke yihne cog, ge kii nyoadho yihr yaa par wudh gen kejea ge nyoge maa apuohny. Abea ge anyoadhi ke yihr yaa ngahy rog gen kejea ge neehn nyethen gihn me ngahy gene tooro. Ayiih! E naa kaa agweehgi dhe yoohn ka yoad dhaahri kii ngo noono.

²² “Teeg wong ne ngahy giikh nyepinye cang ngo acub Juog wura yihr kedea beehda Juog wura cog e ne ngahy an me neehn man nahge an e ne ngahy Juog wura kedea yaa akwanya unghy gene Juog wura.”

²³ Batien gihn nu arumo e Jeacuu wihe aloge ke bang jo waahdhe maa arube keehd gen kobe, “Mihn cwihny yihr yaa niid giikh niidu ke nyingu! ²⁴ Bang gihn teeda teedo yihr kejea yaa agamloohngjuog kedea ruohdhe giikh acoon ge adaahd uniid gene giikh niidu, abea ge kuu aniid gene kedea ulihng gene giikh lihngu abea ge kuu alihng gene.”

Ucaale Gihr Ngad Camaarya Me Cwihnye Puol

²⁵ Muudhe arumo, e ngad loohng acielo ake peehyo e daahd gihn me mage dhe Jeacuu keehde maa apeehye kobe, “Ngad Puohny! Gihn e nuu utiihya beere kar wahy me be gug yoad yoad?”

²⁶ Maa abeehr Jeacuue ngo yihre kea, “Gihn e naa agweed yi kitaab Looohng? Giikh agweed ge kwaani ke naa diih?”

²⁷ Maa abeehr nyine ngo yihr Jeacuu kobe, “Ngo agweed kejea,

‘Nhyaar Juog Ruohdhi ke aduuni beehde,

ke wahyi beehde, ke teegi beehde

kedea ke wiihi beehde

kedea nhyaar wadu wa kwaad ka nhyaari rihi kii ngo.’ ”

²⁸ Kob Jeacuue yihre kea, “Wa angahyi ke beehro. Tiihyi wa gihn nu e kar bodh wahyi uyoadi.”

²⁹ Nyin adaahd unyoadhe ree ne ngaa me beer maa acahge Jeacuu ke peehnyo kea, “Beehda ngaa ne cohg e naa wad wan?”

³⁰ Ne beehr lume, e Jeacuu ake rubo kobe, “Nyin moogo anaa abeehn ne aay ke yoohn Jeruucalem e ngo caa ne weel geen Jeriiko. Yi yooh e ngo apahdho yi cing yaa kahw. Maa agoony gene waare giike oogo ree maa upuohd gene ngo keehd kwaad apooohdo me raaj, noono maa a’ay gene uwii gene ngo piny e nyin uluyo. ³¹ Ngad lam giikh kweehr, akahnho ke yoohn ni acielo. Abea naa awahnhe buud nyin uniide ngo, e nyin agaaje gaajo unaage ke dom, ubare ke yoohne. ³² Thiin keehdo e ngad tiih gihr Wod Juog ake kahnho keehd yoohn ni acielo. Abea naa awahnhe kaa apahdh nyine yea, uniide ngo e ake naag ke dom, ubare ke yoohne. ³³ Batien yaa nu e nyin maa ngad Camaarya ake beehno ke yoohn ni thiw. Abea naa awahnhe kaa apahdh nyin yea ni, e yea ngad Camaarya gihn ake ngeero maa abaahbe bang nyin. ³⁴ Noono maa apiihe ne wuuny nying ka me ledhe giikh nyin. Uwoje mow kedea kooohng nibiid yihdh nying ka me ledhe maa abahye gen arumo kedea ucube nyin ke wiih akaja gihre ukahle ngo wod weehle ne beehn ne tuu ngo yea. ³⁵ Ruuwow naa aruu pinye e kar ngiihny dolaare ariow akahle oogo maa acube gen yihr ngad wod weehle, urube keehd ngo kobe, ‘Maany ngo beer mee. Cahng duua e ngiihny arwaahnyo yihr ge ucoala yihr.’

³⁶ “Ngaa kiin yaa ni adahg, e naa wad nyin apahdh yi cing yaa kahw ni?”

³⁷ E nyin anahge ngaa maa apuohny keehd dhe yoohn loohng ake rubo kobe, “Beehda ngaan ayug gihr med yej yihr nyin.” Maa ateed Jeacuue ngo yihre kobe, “Cidhi, utiihyi wa gihn nu.”

Jeacuu Abeechn Paar Ge Maartha Ge Keehd Maarya Nyemen

³⁸ Naa a’ay Jeacuue arumo keehd jo waahdhe, e ge awahn paajo moogo, kaa abeehn dhaago me nyinge Maartha ucube Jeacuu piny ne weehno paare. ³⁹ Dhaar ni yihre anaa nyemen me nyinge Maarya. Gihn nu e Maarya anaa apiih

buud Jeacuu kun doo thaahdh tiene e lihng giij anaa rob Jeacuue robo yihr nyoge. ⁴⁰ Abea Maartha anaa ke yano e gwiir giij nyepinye e keede cog. Maa abeehn Maartha bang Jeacuu ne rob yihre kobe, “Ruohdh! Ka be ledh yi cwiinyi ge beehn nyemiiha ubahng e a be konye ke tiij ne? Robi yihre, ubeehne ne kony an?”

⁴¹ Maa abeehr Jeacuue ngo yihr Maartha kobe, “Maartha! Maartha! Yih anahg diere kedea cwiinyi be med ke nying giij me thoothd. ⁴² Ngahy ngo kejea nyepinye acielo keede e naa gihn maa athiir ne daahd. Maarya akwany gihn me e ne beer kedea gihre noono akwanye nu, ngaa muu ucahg ngo ke kahl oogo yi cinge tooro.”

Jeacuu Puohny Dhe Yoohn Kway Juog Yihr Jo Waahdhe

(Mat 6:9-13; 7:7-11)

11 ¹ Cahng man e Jeacuu anaa ka moogo kare keede e kway Juog. Batiene naa thume ke kway Juog e dhaano acielo keew jo waahdhe abeehn bange urube yihr ngo kobe, “Ruohdh, puohny wan ke dhe yooh me ngahy wane Juog kwayo beer mee wa mar Joon naa apuohny jo waahdhe.”

² Maa abeehr Jeacuue ngo yihr gen kobe, “Nea wu daahd ukwayu Juog, kea rubu kejea, ‘Abaa!

Nyingi ke wuoro.

Beehn neehn Ruohdh wan.

³ Gihn me cam wane tihn

cub yihr wan ke nying nihn.

⁴ Wii adhemuohme piny yihr wan

wa ka wii wane muu yaa atiihy

gihn me raaj rog wan piny thiow.

Wa keá meehg pahdho yihdh giij utum.’ ”

⁵ Maa abare maalo ke rob yihr gen kobe, “Nea dhaano acielo kiinu, yihre ne gome maa acea paar ngo yi diehr waahr, urube yihre kea, ‘Goma muoja keehd amune adahg, ⁶ bang gihn goma moogo aweehn paajo yihra, abea gihn me nud yihra tooro me goonga ngo keehde.’

⁷ “Wudhu paru paro nye yaage kejea ngaa nu gome noono uguoe ke jaahyo e dhe wod be yabe yihr ngo kejea, ‘Nyieh wiha raami ke nying gihn? Abea dhe wod atoaga kedea an maa nyethena nying wan ne niine?’ Noono ukweere kejea kar aj maalo tooro yihre ucube gihn apeechny gome yihre? ⁸ Roba robo yihru, kejea keehd ne kobe kejea gome kuu ayedh maalo ke nying gom gihn ne keew gen abea ke nying teege giij yug nyin e ngo udhiil yedh maalo umuoje ngo ke cam ne cohg.

⁹ “Wa gihn nu keehd Juog thiow tiihyo ke wa gihn nu. Nea wu ukwahyo keehd gihr nyepinye e gihn ngo ke cubo yihru. Kwaad gihn daahdu, e ngo dhiilu kaa yoado. Thiow nea dhe wod atuongu, e ke yabo yihru? ¹⁰ Bang gihn kwaad ngaa kwahyo e gihn ngo ke cub yihre, e ngaa daahd gihn daahde ngo dhiile kaa yoado. E ngaa tuong dhe wod, e dhe wod ke yabo yihre.

¹¹ “Wuro gihn aweehne kiinu, nea nyethiine ukwahyo yihre ke reehyo, e ngo cub thuohl yihre? ¹² Wale nea nyethiine ukwahyo ke tong jieno, e cub yiidh yihre? ¹³ Beer nea wu ge beehda nyoge me reje ni, kare nud yihru umuuyu keehd giij me beey yihr nyethenu maa Juog Wuru ge maalo ni, ngo ukweer ke cub Wahy Juog yihr yaa kwahyo yihre?”

Jeacuu Kedea Ruohdh Atiihb Ukeehg

(Mat 12:22-30; Mak 3:20-27)

¹⁴ Arumo e Jeacuu anaa ne riem atiihb ukeehg oogo maa naa rih nyin moogo maa abeehdo e be rubo. Naa a'aay atiihb ukeehge rih nyin ni, e dhe ree ayabe yabo urube. Keehdo e nyoge maa anaa cong rog gen naa nudo kaano ge abeehn ne cwaahng. ¹⁵ Abea nyoge mooge ake thubo ke rob rih Jeacuu kob gene, “Ke dhe yoohn Beeljebuul ge ruohdh atiihb ukeehge e ne rieme atiihb ukeehg oogo.” ¹⁶ Keehdo e nyoge mooge keew gen, Jeacuu atum gene maa apeechny gene ngo kejea yuge gihn me gaahy nyoge me beehn ke bang Juog.

¹⁷ Gihn nu e giij gen naa aroam gene yi cwiinyi gen nu, ge kaa angey Jeacuue maa arube yihr gen kobe, “Nye yaage beehda kare ne? Ka kwiihyu kejea tien paajo maa paahng ree kare tooro ucuunge keehdo ne tien paajo acielo me teeg ne? Beehde e dhiil pahdho e tien paan nu. E thiow ngo gihn me ngahy kejea kwaad dhe wod maa paahng yea, e dhe wod gihn nu dhiil pahdho ne? ¹⁸ Bang gihn wa kaano rubu kejea ruohdh atiihb ukeehge doo ree e keede, e dhaahre noono ucuung teeg ke ne diih? Aroba wa maano bang gihn kobu moogo atiihb ukeehge ge riema oogo rog nyoge kaa teeg mar Beeljebuul ¹⁹ Beer, nea wu urubo kejea ruohdh atiihb ukeehg e naa acub tee yihra ne riem atiihb ukeehg oogo rog nyoge, abea yaau ge riem atiihb ukeehg oogo rog nyoge ngaa e naa acub tee yihr gen? Yaa nu ge nuu uguo ngo ke robo yihru kejea gihn robu beehda toohd. ²⁰ Awaahn ni lihngu gihn teeda yihru beer mee. Tee kaa ayoado ke bang ruohdh atiihb ukeehg, abea beehda Juog Aciehg ke ngude e naa acub ngo yihra ne riem atiihb ukeehg oogo. Gihn nu nyoadh ngo yihru kejea Juog athubo ke tiij yi dhaahre keewu.

²¹ “Ngaa me teeg me kwaad giij liny giije nud, giij paare rome kaa konyo. ²² Abea nea ngaa moogo me teeg yihre ubeehno utaaje ngo e ngo uaay keehd giij liny kedea giij paare.

²³ “Ngaa tooro kura e ngaan nu padh ngada. Wale thiow kwaad ngaan be tiihyo tiehd keehd an, beehda ngaa me daahd raany giija.”

Ka Duu Atiihb Ukeehge Kii Ngo

(Mat 12:43-45)

²⁴ “Nea atiihb ukeehg caa ne beehn oogo yi kuohm ngaan arieme oogo ree, e ngo caa ne waahdh ke bang kuohn me yihdh gen tooro piih, e ngo daahd kaa me yuohme yea. Naa atoor kaa me beer maa ayoade e wihe apare ne do kare naa abeehne oogo yea. ²⁵ Ge cea ne duuo arumo, e kare naa acoon yuude e ngo acwad maa agwiir ree beer mee.

²⁶ Kaano e ngo do caahn, ucea ne kahl atiihb ukeehge abiihberiw mooge maa akaal wihe ke raahyo beere ge beehn ne piih wiih ngaan. Awaahn ni ngaan ayoad gihn me raaje bang gihn kar bodho mare yi dhoar man unahg gihn me teeg keter.”

²⁷ Noono kaano apooohde e Jeacuu urubo nu, e dhaago moogo a'aj maalo kiin nyoge ke rob e duone atihnge maalo kea, “Yaahy! Wa dhaar anyuol yihn, beehda dhaago me ree med keter. E thiw thune naa adhoodhi, ge beehda thun me rog gen med ne cohg.”

²⁸ E ngo abeehr Jeacuue abeehro yih dhaar ni kobe, “Nea kaa ngo ne cohg, e yaa lihng lum Juog umag gene giijh yi ngo beer mee, ge naa yaa rog gen med noono.”

Ka Ngej Kihd Ngad Agamloohngjuog

(Mat 12:38-42)

²⁹ Ge abeehn amahr nyoge uthoohnh gene, e akob Jeacuue yih gen kea, “Yaa upiny awaahn, ge koohdh nyoge me reje. Ge daahd uyoada gihn me gaahy nyoge uyuga ngo yih gen beere ngo niid gene niido. Abea gihn me gaahy nyoge be yug yih gen. Gihn yuga yih gen beehda kihd gihn anaa ayug ree rih Jona e naa gihn ucaala yih gen. ³⁰ Beehd e ngo ucaala ke rih gihn anaa abeehn Jonae unahge kihd gihn anaa anyoadh ngo yih yaa geen Niineba. Keehd an, ge adoohng ne dhaano utaahngo, a unahg kihd yih yaa upiny awaahn ni. ³¹ Cahng Lug Juog unahg dhaar anahg ruohdh ukoom ne maang dhaahr Ceaba e nuu ucuung yi lug ne cay wun wu ge yaa piny awaahn ni. Bang gihn dhaar ni anaa abeehno ke kur thar piny ka me baahr keter, ubeehne ne lihng loohnge giijh Caloamon ge nyinge anaa awiihj. Abea awaahn kan, ngaa me duohng keter yih Caloamon e man nyumu. ³² Cahng Lug Juog unahg yaa Niineba ge nuu ucuung yi lug ne cay wun, wu ge yaa piny awaahn ni. Bang gihn naa abeehn Jonae ne puohny yaa Niineba e puohnye ayiih gene uwii gene tiijh giijh anyoohne. Abea awaahn kan, ngaa me duohng keter yih Jona e man nyumu.”

Wong Dhaano E Naa Wong Kuohme

(Mat 5:15; 6:22, 23)

³³ “Gahng ke ngaa me ahb lama, ucube ngo kaa me ngo be niid yea wale uwume ngo piny kaa adiido. Nea beehda kaa ngo ne cohg, e ngo ngaabe ke maalo wiih baaya, beere kwaad yaa abeehn wod piny niid gene niido e ameeny beer mee. ³⁴ Nyingu ge naa gihn me wa lama me meeny koohmu. Bang gihn nea dhaano wonge kwel kede a cwiinye cang bang lum Juog e kuohme thiw ree meenye meenyo ke kare cang udoohng ne cal cal. Abea nea wong dhaano col, e keehd kuohme cang udoohng col mee. ³⁵ Nea wa gihn nu kea dhiilu rogu ke koaro, beere kwaad daahr maaj gihn ne rogu, be ne bihj udoohngu yi muudho. ³⁶ Thiw keehdo, nea kuohm dhaano ree ameenye ke kare cang, e muudho tooro keehdo. Koohmu noono ge udoohng ne giijh maa meeny rog gen cang wa kwaad gihr lama.”

Jeacuu Nyoge Atoohne Ke Nying Yaa Paarijea

(Mat 23:1-36; Mak 12:38-40)

³⁷ Naa athum Jeacuue ke rob, e ngo acuohn ngad Paarijea paare ne cam. Noono e Jeacuu ake cidho keehd nyin, naa abeehn gene paare e Jeacuu apiih wiih tharbeajo ne cam arumo. ³⁸ Batiene e Paarijea gihn ake gaahy bang gihn Jeacuu aniide e cinge keá luogo keehd piih wa ka luog cing kii ngo ge beehn nyoge ne cam ni.

³⁹ Maa arub Jeacuu Ruohdhe yihre kobe, “Maru wu yaa Paarijea, wu gwahj ngahdh kubaaye kede a cahne now, abea kii cwiinyu yi dwaar, wu nyoge me cam ngiihny nyoge keehd teeg wong kede a wu nyoge me raahju puudh. ⁴⁰ Wu nyoge me wudhu tooro! Ngaan ayug ngahdh kubaaye ni, ngahda e naa ayug yea kubaayo thiw? ⁴¹ Konyu nyoge maa angooohng, kaano e nuu udoohng ngahdh giijh nyepinye cang ne wij wij yihru.

⁴² “Wu yaa Paarijea wu nii gihn me raaj ne waany. Nyepinye koamu ke piny ne koame apaar keehd cedha maa aguohm kede a kad bey noono ukaabu koam acielo ucubu ngo piny yih Juog. Abea giijh me ne cohg me neehn dhe yoohn beehdo me beer naa abiohgrwaal ke rog maa dhe yoohn ka nhyaar rogu kii ngo wa ka daahd Juoge, ge wiiu ke piny. Nea kaa ngo e kwaad giijh nu ge ne tiijhy maa ucubu koam piny thiw keew giijh koam naa apaar.

⁴³ “Wu nii gihn me raaj ne waany wu yaa Paarijea, bang gihn maru, wu nhyaar kuohn piih giijh beey ni, ke bang yihdh kuohn wuud amaad. Kede a wu nhyaar dhe yoohn ka maahdh wun kii ngo ke bang yihdh kuohn cuug.

⁴⁴ “Wu nii gihn me raaj ne waany, bang gihn wu uroomo keehd kwaad leehde, me ngahdh gen kuu agiid. Arumo e nyoge ucaahdho ke wudh leehde giijh nu now e kwihy gene kejea leehde ne kaano.”

⁴⁵ Batiene e dhaano acielo kiin yaa apuohny keehd luub yi loohng, ngo arubo yih Jeacuu kobe, “Ngad puohny! Ge rubi wa maano, yih yeny wan thiw!” ⁴⁶ Kob Jeacuue yihre kea, “Wu nyoge me nii gihn me raaj thiw, wu yaa apuohny keehd luub yi loohng, bang gihn koohdh nyoge coohdu kaa amahr giijh me thoohdh me wa teehr me peeg, e naa kwaad gihn thielu wudh nyoge maa giijh me ge be rom gene ke tihngo. Abea giijh ngo ge be yugu beer keehd dhe yooh me konyu gen udoohng gene yoohd yih gen ke tihngo thiw.

⁴⁷ “Wu beehda nyoge maa ayaahr thiw bang gihn wun ne geer leehde giijh yaa agamloohngjuog maa anahg ge kuowo naa coon. ⁴⁸ Keehd dhe yoohn nu e ne nyoadhu ngo kejea giijh anaa atiihy ge kuowo naa acoon ge ka beehda giijh maa anhyaar thiw, bang gihn anahg ge kuowo ge naa anaahng yaa agamloohngjuog, abea wun naa yaa ageer

leehde giih gen. ⁴⁹Ke nying gihn nu e naa ka beehn Juoge noono keehd ka ngahye luube urube kejea, ‘Nyoge muu unahg yaa agamloohngjuog kedea mooge muu unahg jo oohr thiow, ge uohra yihru, abea mooge kiin gen ge unahgu e mooge keehdo ge ujoohru.’ ⁵⁰Neehn gihn nu e yaa upiny awaahn ni ge udhiil ke kihmo, ke nying giih anaa ayug ge kuow gen naa acoon rog yaa agamloohngjuog kii kaa acag Juoge ungoom, ⁵¹ne thube ke rih rem Abel, uwahdhe rih rem Jakarya, naa abeehn ne naah buud kar lam giih kweehr kedea buud Wod Juog. Ayiih dhiila kaa teedo yihru ne cohg kejea yaa upiny awaahn ni, ge udhiil ke kihmo ke nying giih nu ayug gene cang.

⁵²“Wu beehda nyoge me nii gihn me raaj, wu yaa apuohny keehd luub yi loohng bang gihn dhe yoohn ngahy giih nyepinye agahlu oogo. Abea wun ke ngudu gihn muu ungeyu utooro thiow, e kwaad yaa ne rom nyepinye ke ngeyo beere ge caa yi Dhaahr Juog, ge agahlu oogo.”

⁵³Naa a'aay Jeacuu arumo, ke wong kaano e yaa Paarijea maa yaa loohng, ater akahl gene ke rih Jeacuu. Noono uthub gene e ge daahd piny keehd dhe yooh me kwahw gene Jeacuu piny keehd kwaad gihn maa awaahj me robe now. ⁵⁴Ubeehd gene e ge koar Jeacuu piny cog, keehd kwaad gihn me mag gene dhe ke ngo kejea nea gihn muu urobe maa gihn maa awaahj.

Gihr Nying Kar Kuowo Beehda Gihn!

(Mat 10:26, 27)

12¹Kaano abeehn amahr nyoge alihbe me thoohdh umad gene wudh gen adhaahr upud gene rog gen ke jwang piny e Jeacuu akuong rob keehd jo waahdhe kobe, “Yaage kaa cubu nyingu piny beer mee ne cohg ke nying yaa Paarijea bang gihn dhe yoohn gen ne yug gene giih gen uroomo wa kan na tihy kamiira kii ngo ni. Dhe yoohn tihy gene kii ngo, beehda yug giih thudh yej rog nyoge. ²Abea nea kaa ngo, e kwaad gihn wihe anaa awum piny, udhiil ke aal maalo, e thiow luube giih anaa arob e ge kan piny, ge urob oogo ne caya unghy nyoge gen cang. ³Kwaad giih anaa arobu kii muudho ge alihng nyoge, ge wa giih maa arob kii diih kahr cahng. Kedea kwaad giih anaa arobu e ge robu kaa muong kar keedu ni ge arob kaa dhe yooh me nyoge ukwaago wa gihr ngaa me rubo ke maalo wihi wod.

Ngaan Dhiilu Tudo Ree

(Mat 10:28-31)

⁴“Wu goma, wu dhiila kaa toohno kejea wu keá tudo yihr kwaad dhaano utaahngo ge rom nahg kuohm cog abea batien naa anahge kuohm, e gihn moogo me cahge ke yugo keehdo tooro. ⁵Abea ngaan dhiilu tudo ree gen: kaa tudu ke rih Juog, ngaan ge nea dhaano anahge, e yihre ne tee thiow uthoohre ngo yi maay Jaena. Ayiih aroba yihru kejea Juog noono e naa ngaan dhiilu tudo ree. ⁶Ngahda ngahyu kejea adiid pure abiihj ngeew kaa nying ryaale ariow cog ne? Abea keehd maano e Juog wihe be wul keehd rih acielo now keew gen. ⁷E ngahda ngahyu thiow kejea keehd yiehy wudhu ke ngud gen, ge akwaan Juoge cang ne? Kea noono wu keá cahg tudo keehdo, bang gihn gihr nyingu ne maalo keter me yoohm adiid pure me thoohdh!

Kar Yiiho Wale Kweer Keehd Kriihjto

(Mat 10:32, 33; 12:32; 10:19, 20)

⁸“Dhiila kaa robo yihru ne cohg kejea kwaad ngaa rubo nyum nyoge cang kejea en beehda ngada, e a ge adoohng ne dhaano utaahngo dhiila kaa robo nyum wuohdjuog kejea ngaan nu beehde ngada. ⁹Abea ngaa kweer keehd an, ujaahye ree nyum nyoge kejea e padh ngada, e keehd an thiow ke nguda, ukweer keehd ngaan nu nyum wuohdjuog. ¹⁰Kwaad ngaa maa arob gihn me raaj riha, a ge adoohng ne dhaano utaahngo e ngo rom kaa wii piny yihre. Abea ngaa arob gihn me raaj rih Wahy Juog e adhemuohm gihr ngaan nu be rom wii ree piny yihre ne weey weey.

¹¹“Abea cahng moogo nea wu akahl kuohn luwe yihdh wuud amaade nyum ruohdhe, e wu keá nahg diere kejea wu urubo ke ne diih ne beehr luube kedea wu keá diero, kejea rogu ukonyu ke ne diih. ¹²Bang gihn kwaad giih ucuu ne robo beehda Wahy Juog e nuu kwaan gen yi wudhu.”

Ucaale Gihr Nying Maa Alony Abea Akwihj Par

¹³Kaano e nyin moogo abeehn ne rob kiin nyoge kea, “Rob ngo yihr umiha gen ruohdh, beere giih anaa awii wur wane piny yihr wan yihdh gen paahng wane paahngo keehde.” ¹⁴E gihn nu abeehr Jeacuu kobe, “Nyieh! Ngaa e naa acub an piny udoohnga ne ruohdh wale ne ngad ngol lug piny kiinu keehd umiihu do?” ¹⁵Noono maa arob Jeacuu ngo yihr nyoge cang kobe, “Yaage kaa cubu nyingu piny beer mee ne cohg ke nying giih poodh yej, bang gihn kuowo gihr dhaano utaahngo be naa yihdh kwaad giih ne yihre naa conge. Keehd me kobe kejea ngaan nu alony uneehne gihn e gihn me kony giih lonye yihre tooro.”

¹⁶Batiene e Jeacuu ucaale gihn abeehne ke ne robo yihr gen kobe, “Umodho coon nyin moogo anaa nudo maa anahg ngaa maa alony keter. Yihre anaa amahr puohdh maa acieg kaa amahr kwaad caame cang. ¹⁷Muudhe e ngo abeehn ne rob ke cwihnye kobe, ‘Yaahy! An noon ni, awaahn ni gihn e nuu utiihya? Maany amahr giiha ge acieg ka me kedha gen yea tooro.’

¹⁸“Maa abare maalo ke rob ke cwihnye kobe, ‘Mara naa aparta nuu utiihya e gen! Atuoge giiha ge dhiila kaa toar piny ke kar gen cang ne dug. Batiene e ge uduoga piny ke geero ke me nyaahn, ugeera gen doong mee. Noono amahr giiha naa acieg yihdh puohdh kedea giiha mooge thiow me ne yihra ge kana ke yihdh gen. ¹⁹Kaano e a rom rob ke cwihnya a keeda kejea, “Nyieh! Noono maahny arumo do! Amahr nyepinye ge athoohnho maa ge anyoohr yihri, run me thoohdh unahgi upiny e gihn me cahgi diero ke nyinge tooro. Beer nea wa gihn nu e yih dhiil beehdo kar bahbi now e wihi daa. Yih ucahmo gihri now umahdhi mahdho thiow keehd kuong ke med cwihnyi wa kar wihi maa atagi.”’

²⁰ “Muudhe e Juog ake rubo yihr nyin kea, ‘Yih amuohle! Ngahy ngo kejea yi bad dewaahr gihn ni tihn, wahyi ge dhiil kaa kaabo! Abea amahr giih acongi ni, ngaa e nuu udoohng gene yihre?’ ”

²¹ Maa agooy Jeacuue wiith lume noono piny kobe, “E naa kwaad kaa uyuge ree noono thiw yihr ngaa cong amahr giih me thoohdh ukoohbe kejea e alony. Abea e giih lonyo ke dhe yoohn kur Juog ge tooro yihre.”

Wu Keá Nahg Diere Keter

(Mat 6:25-34)

²² Batien gihn nu e Jeacuue arubo yihr jo waahdhe arumo kobe, “E naa gihn roba ngo yihru kejea wu keá diero ke wahyu ke nying giih camu wale ke koohmu ke nying waare giih ngaabu. ²³ Bang gihn wahy dhaano utaahngo wiithe ne maalo yihr giih cam. E thiw kuohm dhaano utaahngo wiithe ne maalo yihr waare giih ngaab. ²⁴ Maanyu winy do! Koohdhe me piidh gene tooro kedea giih me kaj gene tooro. Yihr gen tooro gale wale dune. Abea ngahda Juog e naa ngaa muodh gen ne? Ngahda kuowo maru wiithe ne maalo yihr mar winy ne? ²⁵ Keehd me nahgu rogu ke diero, e ngaa kiinu e ne rom rune ke jwaa beere be laar thoo. ²⁶ Beer, nea kare tooro yihru, me yugu kwaad gihn me thiin wa kwaad gihn nu keehd dhe yoohn diero, e gihn e ne nahg diere wun ke nying gihn me duohng me poohd kuu abeehno?”

²⁷ “Maanyu ka doong thiwe kii ngo. Ge be tiihyo maa waare me cwaahj gene tooro. Abea roba robo yihru kejea keehd Caloamon ke buur ngude yi deeh ngaab wuohbo gihre naa anaa ngahbe, e kuu anaa angahbo keehd ngaab gihn angaab Juoge thiwi acielo kiin thiwe cang kii ngo. ²⁸ Beehda Juog e naa aruug lum wa gihn nu. Lumo me tihn, e ngo nud yi puohdho abea keroo e ngo waang kii maaj. Gihn e thiin yiho gihru wa maano. ²⁹ Wu ka poohd nahg diere naah adhaahr upeehyu ke rogu kejea gihn e nuu ucamo tihn? Wale upeehyu thiw kejea, gihn e nuu maadho tihn? ³⁰ Beehda kwaad yaa beehda nyoge me kwihj Juog, gen naa yaa riem batien kwaad giih nu. Juog Wuru ge maalo ngahye kejea giih nu, ge daahdu daahdo. ³¹ Gihn nud naa adoohng gen, kuongu wudhu ke cub piny rog giih rubo ke nying dhe yoohn ka beehn Juoge unahge ruohdh nyoge kii ngo coadhi. Batiene arumo e Juog kwaad giih daahdu ge ucube yihru piny ka me laahwo now.

³² “Nye jo'a! Gihn me tudu tooro ke nyinge. Bang gihn Juog Wuru ge maalo ni, daahd ngo bang naa amihn cwihnye beere ruohdh cube cubo yihru. ³³ Kaa ngeewu kwaad giih me ne yihru oogo, cubu ngiihny ayoadu yihr nyoge maa angoohng. Wa gihn nu e naa ka uyoadu giih beey ge daahdu Paar Maalo, ge beehda giih me yihdh gen be naar. Kedea thiw ge beehda giih me rog gen be rom gene kwalo yihr ngad kahw. Kedea thiw giih me ge be rom biie ke camo.

³⁴ Bang gihn ka ne giih lony dhaane yea e naa ka beed aduune.

Ucaale Me Koar Dhaane Ree Keehd Ngo

³⁵ “Beehdu thiw e wu angahbo kedea gwiiru rogu keehd dhe yoohn ka tiihyo giihu kii ngo. E thiw dhiilu beehdo e lame giihu ge a'ahb kedea e ge uliel yi cingu. ³⁶ Beehdu wa gihr yaa tiihy me koar wur paajo gihr gen piny maa anaa aay ucea kar rob kaahny. Batiene arumo e yaa tiihy yihre ge ake piih e ge koar kar ka uduue paajo, beere nea dhe wod tuonge tuongo, e ngo laar gene kaa yabo yihre piow piow. ³⁷ Beehda gihn me beer yihr yaa tiihj giih nu, ge ne yuud wur paaje e ge ne ne koar ngo. Athiir roba robo yihru kejea wur paajo nea ubeehn paajo arumo, e waaro gihr cam ungaabe ree ucuohne yaa tiihj giithe bange ucahm gene tiehd. ³⁸ Unahg gihn me beer yihr nyoge thiw wa gihn nu, bang gihn nea ge ubeehn wur paaje ni, e ge yuude e rog gen agwiir gene, keehd ne kobe kejea beehn kii waahr wale e ngo beehn kaa akaahg piny. ³⁹ Kea noono boaru yi gihn thiw kejea nea wur paajo kar beehn ngad kahw ne kwal giih paare, nea ngahyo, e paare be nea meehg kwalo yihr ngad kahw. ⁴⁰ Thiw beehdu wa kwaad maano e rogu agwiiru, bang gihn a ge adoohng ne dhaano utaahngo a ubeehn kii caa me kar beehna kuu acub yi wudhu.”

⁴¹ Batien gihn ni arumo e Piihter Jeacuu abeehne ke ne peehnyo kea, “Ruohdh ucaale gihn ni, arobi ke yihr wan, wa keed wane ne wale ngo arobi ke yihr nyoge cang?”

Ucaale Gihr Ubaahng Tihiy Wa Kaa Ateed

⁴² Maa abeehr Jeacuue ngo kobe, “Kwaad ubaahng me ngihde e ne gaahn naa ngo ngaa me beer kedea giih nyepinye ngahye kaa gwiiru. Ubaahng me gaahn me beer wa gihn nu beehda ubaahng ateede yihre naa mage baahnge mooge beer mee kedea upaahnge caame paahngo yihr gen yi caang arob. ⁴³ Unahg gihn me beer keter yihr ubaahng tiihyo wa gihn nu, ge yuud wur paaje ngo cahng uduue. ⁴⁴ Athiir e ne roba yihru, kejea ngad paajo cwihnye umihno keraahyo udhiile tiihj paajo cang ke cubo yi cing ubaahng nu. ⁴⁵ Abea nea ubaahng awii ngad paaje paare urube ke cwihnye kejea ngad paajo be laar duuo noono uthube ke goj baahng cuow kedea maahn giih awii yi cinge kedea pahdh ne yug giih cam maa giih maadh kuong umuohle muohl. ⁴⁶ Gihn nu, e cahng duu ngad paajo ukwihy ubaahng ne weey weey, noono e ngad paajo naa lwaahd. Gihn nu e ngad paajo cwihnye urahnyo ne cohg ugooye ubaahng ce ngole ngo oogo kur yaa yihr gen toor yiho.

⁴⁷ “Kwaad ngaa tiihyo yihr wur paaje me ngahy gihn daahd wur paaje yihre kejea tiihye ngo, abea kwihye kaa atiihnyo ngo udhiil ke puohdo, udhohng keehd atuuye me teeg. ⁴⁸ Abea nea ngaa tiihyo yihr wur paajo me kwihy gihn daahd wur paaje yihre, atiihnyo gihn me padh kare e ngo dhiil kaa ngwaahno upuohde now kaa nyaa atuuye me noog. Bang gihn kwaad ngaan acub ka me laaj yihre, beehda deeh ka me laaj thiw e naa gihn me peehny yihre. Lum yea kejea ngaan cub kwaad giih me thoohdh yihre mooge me thoohdh me yoohm muu anaa yihr ngaan acub me noog yihre ni gen nuu ucub yihre.

⁴⁹ “A abeehno beere gihn me wa maaj naa ahbo rog nyoge upiny kan beere maaj gihn a'ahba ni ne maah. ⁵⁰ E thiw yihra ne raahm aduulo moogo muu uroomo keehd gihn me wa luogwahy. Abea beehda raahm me dhiila cidho kii ngo, udhiil kuohma raahm. Ke dhe yoohn nu e gihn ne yaa aduuna yi dwaar be piih nea padh maay rahmo yaa aduuna en naa ane bihj. ⁵¹ Wudhu paru paro kejea a abeehn ne kahl dohr kiin nyoge wiith piny kan ne? Gahng! Dhiila kaa robo

yihru kejea, gihn abeehna ke nyinge beehda ne paahng kiin nyoge.⁵² Arumo thube wa kaa awaahn ni uwahdhe cahng moogo, e nyoge abiihj, me ne paajo acielo, rog gen upaahng gene ne dahg. Nyoge adahg ge upaahr rog nyoge ariow kede a nyoge ariow ge upaahr rog yaa adahg ni.⁵³ Paajo acielo yea upaahnge ubeehn wuro upaahre rih waahde kede a upaahr waahde rih wahn. Dhaar beehda miho, udog rih nyaare kede a nyaakow udog rih men. E mi h dhec uow udog rih ci h waahde e ci h waahd udog rih wong, mi h cuore.

Dhe Yoohn Kwaan Kwaad Giih Buodh Rog Gen

(Mat 16:2, 3)

⁵⁴ “Yaage nea poohlo kii maalo aniidu, e ree tihnge kaa goan kun kwaar cahng piny kii ngo, ngahda e ngo guo kaa ngeyo, urub nyoge kejea kodh ucwiie ne? Gihn nu e kodh dhiil cwii.⁵⁵ Thiow keehdo, nea yamo beehna kaa kun moohl cahng kii ngo ni, ngahda e ke robo kejea piny uleehdho ne? Gihn nu e piny dhiil leehdho.⁵⁶ Jo thuudh yej! Kwaad giih yug rog gen ke bang upiny ni kede a kwaad muu yug rog gen ke bang yi maalo ge ngahyu kaa kwaano beer mee. Abee arumo muu yug rog gen yihru, yi caang awaahn ni, ge goohg yihru ke ngeyo ubahnge ge be kwaanu ke ne diih?”

Gwiiru Giihu Umodho Nyum Lug Keehd Ngad Ateru

(Mat 5:25, 26)

⁵⁷ “Gihn keree, e naa agoohg kar ngej gihn maa athiire yihru?⁵⁸ Kaano cidhu keehd ngaa amag wun nyum ruohdh daahdu dhe yooh me doohru keehd ngaan nu, e wu poohd kii yooh beere wu be kedh nyum ruohdh kede a ubeehn ruohdhe ucube wun yih r jaabidh kede a ubeehn jaabidhe keehdo, ukedhe wun yi thijin.⁵⁹ Roba robo yihru kejea kar beehnu oogo keehdo utooro, nea padh gihn akimh yihru e ne dhiilu ke cub piny utoor gihn me doohng oogo.”

Duogu Cwihnyu Caahn Ubahnge Thoo Wu Be Yoade

13¹ Nyoge mooge anudo maa ateed ngo yih r Jeacuu kejea Pilaato rem yaa Gaalili mooge maa anahg, ge alyaahbe keehd rem giih kweehr naa anaa anahg piny yih r Juog.² E gihn nu abeehr Jeacuu yih r gen arumo kobe, “Maru cuohnu kejea pahdho yi gihn me raaj beehda ke nying gihn acier Juog ne? Noono arumo kobu gihn anaa apahdh wudh goan yaa Gaalili ni nyoadh ngo kejea ge anahg nyoge me reje keew yaa Gaalili ne?³ Teeda teedo yihru, ngo padh ne maano. Abee gihn nud nea cwihnyu be duogu ke caahn bang anyoohne giihu naa atiihyu rih Juog e keehd wun thiow e wu dhiil thoo ke karu noono cang.⁴ Wale ka moogo wudhu aparu thiow kejea, yaa apaar wonge abiihjbedahg giih anaa atoor peehm me baahre wudh gen ni nyoadh ngo kejea ge anahg nyoge me reje ne puudh ukaal gene wudh yaa anaa abeed geen Jeruucalem cang ne?⁵ Teeda teedo yihru, ngo padh ne maano! Abee gihn nud nea cwihnyu be duogu ke caahn bang anyoohne giihu naa atiihyu rih Juog e keehd wun thiow e wu udhiil thoo ke karu noon cang.”

⁶ Batiene e Jeacuu ucaale gihn abeehne ke ne robo yih r nyoge kobe, “Coon umodho anudo ke dhaano me yihre anaa dhuuro maa anaa yi puohdhe. Cahng ni e ngo acaa yi puohdhe ne maany dhuuro wale ngo anyuol keehd nyethen. Abee naa acea ne cidho e bahng nyethen maa ayoad e wi h yaadh gihn ni.⁷ Gihn nu e ngo arobe yih r ngad ti h gihre kea, ‘Ke kar run adahg, e a beehna yi puohdho ne maany dhuuro wale maa anyuole keehd nyethen. Abee kihde now, nyethen ge be yoada wi h e. Nea wa gihn nu e kea ngod ngo piny, bang gihn ngo nyaahg piny ke dhieny now!’

⁸ “Maa abeehr ngad ti hje ngo yih r wur puohdho kobe, ‘Wi i ngo yihra tudi ke wong acielo. A utiihyo ree, thare ukaah, uoja ngoom me beey thare thiow.⁹ Nea ngo unyuol ke caahngo arumo, e ngo poohd unahg gihn me beer. Tooro nea ngo buu unyuol e ungod piny.’ ”

Jeacuu Dhaago Maa Abaahl Athiehdhe

¹⁰ Cahng Cabadh man keehdo, e Jeacuu anaa ake puohnyo yi wod amaad.¹¹ Batiene e dhaago moogo anudo thiow kaano maa abaahl me ree naa atiihb ukeehge. Dhaar ni abeehdo e abeehl ke kar run apaar wonge abiihjbedahg. Dhaar nu anaa abeehdo e koohre ree adole.¹² Naa aniid Jeacuu ngo e dhaar ni acuohne ke bange maa arube kejea nyiihng e ree wong maalo. Gihn nu naa abeehn dhaar arumo e ngo ake rubo yihre kea, “Dhaare! Yih alunya oogo yi atwaanyi noono!”¹³ Batiene maa apiehl Jeacuu cinge wi h dhaar arumo. Ke wong kaano e koohre ree ariihye ri ihyo udoohnge ne cad cad. Maa amuhj dhaar ni koohr Juog keter.

¹⁴ E ruohdh wod amaad cwihnye ake rahnyo bang naa niide ngo e Jeacuu dhaano athiehdhe cahng Cabadh ke ngude. Arumo e ngo ake rubo yih r nyoge naa amahdo kobe, “Yaage beehda ni h abiihjbeciel keede ge naa giih ti h nyoge yihdh gen. Ke nying gihn nu e ke na beehna nyoge ke yihdh ni h giih ni keed gen, beere nea ngaan daahd uthiehdhe e ngo ke thiehdho yihdh gen, abee padh cahng Cabadh.”

¹⁵ E abeehr Jeacuu beehro yih r nyin kea, “Kwaad ka me nahgu yaa thuudh yej kii ngo! Wu kang rogu kobu wu naa nyoge me beeye! Ngaa kiin nu e ne be lony tuud gihre wale akaja gihre cahng Cabadh, ukedhe ngo naam ne maadh?¹⁶ Abee maanyu dhaar ni beehda nyaar Abraahm ke ngude, anaa atuohy atiihb ukeehge piny keehd kar run apaar wonge abiihjbedahg. Beehda kwaad gihn noono mahne kejea ke a lunny oogo yi cing ruohdh atiihb ukeehg, keehd ne kobe kejea beehda cahng Cabadh?”

¹⁷ Naa arob Jeacuu gihn ni, e yaa anahg yaa ater keehde rog gen aniid gene e ge aduoge caahn ke dhe yoohn kaano abeehre ngo. Abee keehd maano e nyoge cwihny ge ake mihno ne cohg ke nying kwaad giih thoohdh beey naa yug Jeacuu.

Ucaale Gihr Kohnho Me Thiin Wa Wong Jaaro

(Mat 13:31, 32; Mak 4:30-32)

¹⁸ Kaano arumo e Jeacuu ake rubo e upeehyo kobe, “Dhaahr Juog neehn gihn? Kedeo ngo uroma kaa gihn? ¹⁹ Ngo uroma keehd wong jaaro ge thiin maa akaab dhaane upiidhe ngo yi puohdhe. Gihn nu e adoongo duohng mee, ubeehn baahde ukaar gene. Kaano e winy wuud gen geer gene ke wiie.”

²⁰ Keehdo e Jeacuu acahg rob ke piehj kobe, “Dhaahr Juog ucahga rom rih kwaad gihn me ngihde? ²¹ Dhaahr Juog neehn thobe maa akaab dhaage ulyaahbe ngo keehd deeh moo ce bihle ngo. Nea wahdh caahn e deeh mog abihl yaahny maalo cang.”

²² Batiene gihn nu e Jeacuu ake aay e caa geen Jeruucalem e caahdh e cor yihdh geedhe kedeo miehr mooge. Anaa acaahdho e ngo upuohnyo. ²³ Kaano keehdo e dhaano moogo Jeacuu apeehnye kobe, “Ruohdh! Unahg nyoge me noog ge naa yaa ubodh cog ne?”

E Jeacuu ake rubo kaano keehd nyoge cang kea, ²⁴ “Dhiila kaa robo yihru kejea beehn dhaane dhiile gihr ameen meeni ke yugo, beere ngaan ngo kare nud yihre ucidhe ke dhe wod gihn diiny ni. Bang gihn beehda athiir e ne roba yihru kejea nyoge me thoohdh, ge daahd cidho keehd dhe wod gihn diiny ni. Gihn nu utum gene abea ugoohg yih gen. ²⁵ Ge ubeehn wur paaje ne aj maalo utoage dhe wode, e maru unahg yi kala e nuu ucuungu yea. Noono ubuohju ke tuong dhe wod, e wu kway wonge kejea, ‘Yab dhe wod yih wan!’

“Abea wur paajo urubo yihru e nii wod alongthihn kobe, ‘Wu nyoge me kwihya. E thiow kun abeehnu kii ngo kwihya.’

²⁶ “Batiene keehdo ucahgu ke duogo yihre kobu, ‘Beehda wan ge anaa ne cam ke yihn kedeo beehda wan naa anaa ake mahdho tiehd keehd yihn. Wa yih ngaa me ngahy wane, ngahda yihn naa ke puohnyo ke bang yihdh geedhe giih wan ne?’

²⁷ “E ngo ucahge ke beehro yihru kea, ‘Wu nyoge me kwihya ne weey weey. Aayu! Coohru rogu oogo buuda kan. Wu nyoge me reje!’

²⁸ “Kaano arumo e wu uyuog ke lan ngoohng wong e lagu kaanyu kaanyo ke nying raahm, ge uniidu Abraahm kedeo Yijaag maa Jeakob kedeo wuohdjuog, e ge apiih ke med cwihny yi Dhaahr Juog. Abea wu arumo rogu uyoadu e wu athoohr oogo yi kala. ²⁹ Thiow nyoge mooge ge ubeehn e ge beehn kaa yoohn kun moohl cahng kii ngo kedeo kun kwaar cahng piny kii ngo. E mooge ge ubeehn ke kur nyum piny kedeo kur thar piny. Noono e kar piih gih gen uyoag gene kar cam yaay yi Dhaahr Juog. ³⁰ Batiene arumo e yaa anahg nyoge maa yaa dhe caahn now, ge nuu udoohng ne yaa wong maalo. Abea jo muu anahg yaa wong maalo, ge nuu udoohng ne yaa dhe caahn.”

Jeacuu Kobe Eroade Beehda Thooh

(Mat 23:37-39)

³¹ Cahng ni thiow keehdo e yaa Paarijea mooge ge anaa abeehn bang Jeacuu maa arub gene yihre kob gene, “Nyieh aay oogo kan ucidhi ka moogo! Kwihyi kejea Ruohdh Eroade daahd yihn ke naah ne?” ³² E gihn nu abeehr Jeacuu beehro yih gen kobe, “Cidhu ucuu ngo ne robo yihr thooh gihn nu kejea, a bar maalo ke riem atiihb ukeehge oogo rog nyoge. E thiow robu ngo yihre dahng kejea, abar maalo ke thiehdh nyoge tihn kedeo keroo. Abea nea yi dahw nihn e gihn anaa atiihya ke nyinge kare udoohda. ³³ Beehda kaa ngo ne cohg, kejea a dhiil bar maalo keehd tiihya tihn kedeo keroo, uwahdhe kihr kihnyo thiow. Beehda kare ne cohg kejea ngad agamloohngjuog wa an ka me thowe dom now tooro nea padh yi buur geen Jeruucalem e ne thowe yea.”

Jeacuu Ayuog Ke Nying Geen Jeruucalem

Gihn nu e Jeacuu ake rubo kobe, ³⁴ “Yih geen Jeruucalem! Yaa agamloohngjuog ge anahgi kedeo yaa aohr Juoge yihri ge abahni ke leele! A abuohj tiel me thoohdh kaa a koal yaai thaahdh baahda wa gihr jieno me boab nyethene. Abea kihde now yih akweer ke an ne weey weey. ³⁵ Maahnyu kaa awii wod Juog piny. Awaahn kan, kihda buu ucahgi ke niido keehdo uwahdhe cahng ukoohbi kejea,

‘Juog cedhree dooj ngaan abeehn ne rob ke nying Juog Ruohdh.’ ”

Jeacuu Dhaano Athiehdhe Cahng Cabadh

14 ¹ Cahng man Jeacuu anaa ne cam paar ngad Paarijea me beehda ngaa moogo thiow me duohng kiin Paarijea. Kaano e Paarijea naa anudo nying gen anaa dihg gene rih Jeacuu ne boar Jeacuu ke gihn utiihye. ² E nyin moogo anaa apiih nyum Jeacuu me ree anaa atwaany bungbung. ³ Batiene e Jeacuu yaa apuohny keehd luub yi loohng kedeo yaa Paarijea ge apeehnye peehnyo kejea, “Beehda kare, ke dhe yoohn loohng gihr paaro uthiehdh dhaano cahng Cabadh ne wale padh kare?” ⁴ Gihn nu maa aleng gene ne caaj e gihn maa abeehr gene tooro. Arumo e Jeacuu nyin atwaany ni amage maa uthiehdhe ngo uohre ngo oogo.

⁵ Keehdo e Jeacuu ge acahge kaa apeehnyo kobe, “Nea dhaano acielo kiinu yihre ne nyethiine wale muore maa apahdho yaa abuulo cahng Cabadh, e ngo be teehele oogo piow piow ke nying gihn nahge cahng Cabadh ne?” ⁶ Dahng gihn maa abeehr gene tooro yih Jeacuu.

Duog Rog Caahn Kedeo dhe yoohn Goong

⁷ Batiene kaano e Jeacuu abar maalo ke rob, bang gihn dhe yoohn kaa anaa piih yaa anaa acuohn kar cam aboare. Bang gihn aniide naa beehn nyoge, e kuohn piih giih beey ni gen naa apeem gene ke rog gen. Arumo maa arobe ngo yih gen keehd dhe yoohn ucaale kobe, ⁸ “Yaage lihngu gihn! Nea ngaa moogo dhaano acuohne paare bang nyuohm naa ayuge paajo yihre, e dhaano keá moon piny ke kwany kuohn piih maa awuobe. Bang gihn kwihy dhaane kejea

moogo e ngad paajo dhaano moogo me wiihe ne maalo yihr ngaan nu acuohne thiow. ⁹ E gihn nu arumo e ngad paajo naa acuohn gen kar gen noon ni ariow ni, caa ne beehno keehd ngade gen arumo, ce rube keehd ngaa man kejea, 'Cub kar piih gihn apiihi yea, yihr ngada gen.' Batiene e ngaan nu aj maalo kare noono udae ka moogo ke laahy wihj kedea e guohbe ayaahr thiow. ¹⁰ Abea nea beehda kaa ngo ne cohg, kejea dhaano nyoge acuohne kar cam naa ayug bang cahng nyuohm e ge beehn dhaane kuonge piih ka me ne bihdh now tudi. Arumo batiene nea ngad paajo caa ne beehno e urubo keehd ngo kejea, 'Goma! Beehn wong maalo kan ne piih.' Kaano e wiih ngaan ngo udoohng mor nyum nyoge naa apiih kaano cang. ¹¹ Bang gihn kwaad ngaan cub cwihnye yi daahd ruohdh ke nying yoad gihn me beer, e ngaan nu ree uyoade ne dhaano now me gihn me ne yihre tooro. Abea ngaan yug ree ne dhaano now, e ngaan nu ree uyoade ne ruohdh uyoade gihn me beer."

¹² Gihn nu arumo e Jeacuu adog ne rob ke nying ngad paajo naa agoong nyoge kobe, "Abea yih ngad paajo nea beehda gihn me yih daahde ucuohni nyoge paari wiih cam maa ayugi, e yih keá cuohn gome wale nyoge maa awaahde keehd yih wale nyoge maa alony. ¹³ Abea nea kare ne cohg, kejea yih daahde uyugi cam paari yihr nyoge e kea cuohni ke nyoge maa angooohng kedea nyoge me tien ge atug, yaa tien ge angool maa kwaad yaa nying ge acoor ni, gen naa yaa dhiili ke cuohno noono. ¹⁴ Nea ngo ayugi wa gihn nu, e yih nuu nahg ngaa maa adooj Juoge. Bang gihn yaa angooohng wa gihn, gihn muu uyoadi bang gen muu ucub gene yihri tooro, ne duu wiih gihri naa agoongi gen. Abea cahng ucahr yaa beey ni, goong gihri noono agoongi gen nu wiihe uduu Juoge."

¹⁵ Naa lihng nyin moogo maa anaa apiih kar cam gihn arob Jeacuu, e ake rubo kea, "Mihn cwihny beehda gihr ngaan ucam amono yi dhaahr Juog!"

Ucaale Gihr Yaay Me Duohng

¹⁶ Jeacuu ake rubo e beehr gihr nyin keehd ucaale kobe, "Coon umodho nyin moogo anaa anudo maa anaa ayug cam me duohng mee paare. Maa acuohne nyoge me thoohdh bang cam naa ayuge kejea beehn gene. ¹⁷ Naa aniide ngo e cam athum ke gwiire e ngad tiihj gihre aohre ke bang yaa anaa acuohne, kejea beehn gene bang gihn cam agwiir ree.

¹⁸ "Gihn nu yaa anaa arob lubo yihr gen, rog gen ajaahy gene jaahyo naa acielo acielo kejea kar beehno tooro yihr gen. Maa arub ngad umodhe yihr ngad tiihj naa oohr kejea, 'Nyieh, kare tooro yihra me beehna. Puohdho angeewa kedea a dhiil cidho ne maanye. Cedhree! Nea kare nud kea meehga jaahy riha.'

¹⁹ "Ngaa man keehdo acahg rob kejea, 'Nyieh, kar beehna tooro, bang gihn a angeehwo keehd mihre maa areehg naa riow me teehng ge abiihj giih ywaaj arabya gihn kahg piny keehde. Noono adaahde ucaa ne tum gen yi puohdho. Cedhree! Nea kare nud kea meehga jaahy riha.'

²⁰ "Nyin moogo acahg rob keehdo yihr nyin kejea, 'An noon ni dhaago akahla paajo ke tihn. Nea kare nud e kea meehga jaahy riha.'

²¹ "Batiene arumo maa aduu ngad tiihje ne rob gihn ayug ree yihr ngad paajo. Gihn nu e ngad paajo cwihnye ake rahnyo ke nying gihn ni ayug yaa ni ree. Noono ukobe ngo yihr ngad tiihye kea, 'Laar cidho piow piow ke bang yihdh acaare kedea ke bang yihdh yiehdhe giih keew mieh, kahl kwaad nyoge maa ngoohng maa ayoadi now, yaa tien gen atug ni kedea muu tien gen angool maa muu nying gen acoor.'

²² "Naa beehn ngad tiihje keehd nyoge, e ngo acaa ne rob keehd ngad paajo arumo kobe, 'Ruohdh! Gihn arobi yihra atiihya wa kaa ngo. Nyoge abeehno abea piny poohd kuu arumo keehd nyoge bang gihn nyoge noog.'

²³ "Batiene dahng e ngad paajo acahg rob keehd ngad tiihj gihre kobe, 'Doogi keehdo ucidhi ke bang yihdh acaare kedea ke bang yihdh yiehdhe giih caadh cang kwaad ngaa ayoadi now beehn ke ngo. Bang gihn adaahde upahng paara keehd nyoge. ²⁴ Ngahyu ngo kejea keew yaa anaa acuohna dhaano acielo kiin gen muu cahg cam mara naa agwiira ke belo utooro.' "

Ngad Batiene Dhaano Tiihy Ke Ne Diih?

(Mat 10:37, 38)

²⁵ Cahng man e amahr nyoge ge anaa ake caahdho tiehd keehd Jeacuu. Batiene e Jeacuu wiihe aloge ke bang gen maa arube kobe, ²⁶ "Yaage, aroba yihru kejea ngaa daahd udoohnge ne ngad batiene abea wahn, men, ciihe, nyethene, wuud men ke ge nyemen kedea keehd wahye be maane, e kare tooro yihre unahge ngad batiene. ²⁷ Kwaad dhaano now me cwihnye tooro uthowe ke nyinga wiih yaadh maa ariihw, e ngaan nu padh ngad batiene ne weey weey. ²⁸ Nea dhaano kiinu cwihnye ne geer wod maalo baahr mee ngahda e ngo kuong piih umodho, umaahnye ka ukaab wode yihre ke geero ne? Kedea kuong piih umodho bang ne ngahy ngo nea giih ne yihre wod rom gene kaa ageero e gihn me daag tooro. ²⁹ Bang gihn nea ge cea ne thubo keehd geer arumo ni, e ree cea ke ne yoado kejea wod ree be thume ke geero yihre. Gihn nu e kwaad yaa anaa niide e ngo thubo ke geer ni, ngo ngier gene ngiero. ³⁰ Batiene e nyoge rom rob ree kejea, 'Wa nyin wod anaa anahg gihn maa athobe beer mee ke geero abea awaahn ni maahnyu kaa ariehny wod piny yihre ke geero.'

³¹ "Thiow roma kaa robo ke dhe yooh moogo kejea beehda kwaad ruohdh me ngihde noono, ne daahd aay kea e caa ne lor ruohdh moogo me teehng wiihe ke liny, abea wiihe be kuonge ke coaro umodho? Wiihe kuonge kaa coar umodho nea kare nud yihre me rome ruohdh teehng wiihe keehd acaakere kar alihbe dhaano aduuno ge taaye taayo, abea yihre naa acaakere alihbe apaar cog. ³² Nea kare tooro me rome teehng e ngo ukwahnyo keehd nyoge me oohre bang ruohdh teehng wiihe maano e ngo poohd ne ka me baahr beere ge udoohr. ³³ Thiow keehd dhe yoohn nu, nea kwaad dhaano now me nud kiinu, me daahd ngo ubeehne batiene, ubahngge kwaad giih ne yihre cang ge be gweeye ke piny cang ke nyinga, e ngaan nu buu unahg ngada.

Ucaale Gihr Melo Maa Adoohng Bahdh

(Mat 5:13; Mak 9:50)

³⁴ “Melo beehda gihn me beer. Abea nea ngo abahnho e be rom ke yugo law keehdo. ³⁵ Gihn me kony melo gihn nu tooro. Keehd puohdho maa ayiide be wele. Ngo ngweehn cog kaa woj dom. Kea noono ya! Yabu yihdhu, nea ngaa me yihdhe nud me lihngo e kea lihngel!”

Kwaad Ucaale Gihr Nye Roomo Maa Arwaahnyo

(Mat 18:12-14)

15 ¹ Cahng man e yaa gwaay cuol kedea ‘nyoge maa awaadh paaje’ ge anaa abeehn bang Jeacuu ne lihng giih robe. ² Arumo e Paarijea kedea yaa loohng ge ake ngoan ke cwihny gen kob gene, “Nyin mare koag kaa goong yaa anyoohne now kedea nyoge maa awaadh paaje ge naa yaa ayuge ne yaae ne cahme keehd gen.”

³ Gihn nu e Jeacuu ucaale gihn abeehne ke ne robo yihr gen: ⁴ “Yaage! Nea dhaano acielo kiin nu, yihre ne roome jiehabiihj ubeehn aciele urwaahnye kiin gen, ngahda e goan muu nu ge wiie ke kaano ucea ne daahd acien man arwaahnyo? Ngo dhiile kaa daahdo uwahdhe ka uyoade ngo. ⁵ Abea ge cea ngo ne yoado arumo, ngahda e ngo thoohre kuu utoge ubiene ngo e cwihnye amihno ne? ⁶ Batiene ge beehne paajo keehd ngo, e caa ne cuohn gome kedea yaa wong akeewo kedea urobe ngo yihr gen kea, ‘Yaage! A daahd umihn cwihnyu keehd an tiehd, bang gihn roomo gihra naa arwaahnyo ngo ayoada.’ ⁷ Roba robo yihru, uneehn gihn nu thioiw Paar Maalo. Juog cwihnye umihn keter, ke nying dhaano acielo maa aduu cwihnye caahn bang anyoohne giihe. Abea mihn cwihny maa athiir utooro ke nying nyoge jiehangween wonge apaar wonge abiihj bengween maa akweer ke duu cwihny gen caahn rog anyoohne giih gen.”

Ucaale Gihr Ngiihny Demaro Apaar Maa Arwaahnyo

⁸ “Thioiw dhaago anudo me yihre anaa nying ngiihny apaar giih demaro. Maa abeehn aciele urwaahnye. Batiene e dhaar ni maaj ameenye meenyo maa adhiile yi wod ke cwado beer mee ne cohg e daahd wong demaro gihn ni. Maa ubuohje ke daahd ngo uwahdhe kaa dhiile ngo ke yoado. ⁹ Batiene e gome kedea yaa wong akeew giihe ge acuohne urobe ngo yihr gen kobe, ‘Yaage! A daahd umihn cwihnyu keehd an tiehd bang gihn wong demaro gihra acielo naa arwaahnyo ngo ayoada.’ ¹⁰ Roba robo yihru, uneehn gihn nu thioiw wuohdjuog cwihny gen umihni keter ke nying dhaano acielo maa ngaa me raaj, abea cwihnye aduoge caahn bang anyoohne giihe.”

Ucaale Gihr Nyedhoohg Me Cwihnye Tooro

¹¹ Muudhe Jeacuu abar maalo ke rob kea, “Umodho coon dhaano moogo anaa nudo me yihre anaa waahd ariow. ¹² Cahng man arumo e ngaan thiin ake rubo yihr wahn kobe, ‘Abaa! Paahng yihdh giih paajo yihr wan keehd umiia ucubi kura yihra.’ Batiene arumo e wur gen yihdh giih paajo ge apaahng paahngo yihr gen keehd umen. ¹³ Naa apaahng wur gene yihdh giih nyepinye, e batien niin me noog, e nyedhooh thiin, giihe ge aconge cango cang uayee ne ci paajo moogo maa anaa ka me baahr. Yi paan nu e ngiihny giihe ge araanye ke dhe yooh me raaj mee. ¹⁴ Muudhe naa athum ngiihny yihre cang e kahj me duohng apahdh yi paan ni cang maa angoohng keter. ¹⁵ Kaano e aci ne daahd tiihj bang ngad paan ni. Gihn nu e tiihj kwaag kudhruue e naa acub yihre. ¹⁶ Maa abang kahje nyedhoohg keter bang gihn ngaa me cub cam yihre tooro. Cam mar kudhruue e naa gihn ne muodhe ree keehd ngo abea e poohd be yahng.”

¹⁷ “Gihn nu naa aniide ngo e apiih ne rob ke cwihnye e keede kobe, ‘Amahr yaa tiihy yihr wura caame athooj ke nying gen now, adhaahr caame ge doohng piny. Abea a ge thow dom kan keehd kahj ni! ¹⁸ Ngweehn me dhiila doo bang wura paajo ucaa ne robe yihre kejea Abaa! Gihn me raaj keter e naa ayuga rihi nyum Juog! ¹⁹ Ke nying gihn nu e a kea cahg ke cuohno keehdo ne waahdi, abea yug an ne ngaa me tiihy yihri now.’ ²⁰ Batien gihn nu arumo e ree akwanye ke maalo uthube thubo ke waahdh e beehn paajo.”

“Abea e apoohde e ngo ne ka me baahr mee, e amodh wahne modho maa ayuohd cwihnye ree keter. Noono ugoohde ke bang waahde maa agaahre ngo yi koohre e ngo ciime ciimo.”

²¹ “E nyedhoohg ake rubo yihr wahn kobe, ‘Abaa! Gihn me raaj keter e naa ayuga rihi nyum Juog. Gihr nyinga tooro keehdo me cahg an ke cuohno ne waahdi.’

²² “Abea keehd maano e wahn arob ngo yihr yaa tiihj giihe kobe, ‘Yaage laaru goohd paajo piow piow ukahlu kihd waaro gihn awuob keter ni. Beehnu keehd ngo ungaabu ngo ree. Kedea codu joadh yi lweede, ungaabu wuor yi tiene thioiw. ²³ Thioiw cidhu, ukahlu muor gihn acwaadh ni. Nahgu ngo bang gihn tihn wo dhiil cam umielo e cwihnyo amihno. ²⁴ Bang gihn waahda gen anaa ke roomo yihra wa nyethiin maa anaa athow, abea awaahn ni aduu banga e ngo kuow.’ Gihn nu arumo nyoge ake cahmo, umiel gene umihn cwihny gene keter.”

²⁵ “Muudhe nye kaano anaa awahn nyedhoohge paajo nu, e umen ge duohng yihre ni anaa yi puohdho. Naa awahnhe dhe paajo, e doohn nyoge alihng lihngo e nyoge ukwaago kedea e nyoge uwahr maa e ge anaa ake miel thioiw. ²⁶ Gihn nu e ngad tiihj acielo kiin yaa tiihj giih paajo acuohne cuohno maa apeehtye ngo ke gihn yug ree paajo. ²⁷ Maa abeehr ngad tiihje ngo yihre kea, ‘Umiihu e naa aduu paajo. Ubeehn wuru unahge muor gihn acwaadh bang gihn kea umiihu aduu paajo ke yoohm ree e gihn me raaj me ne ree tooro thioiw.’

²⁸ “Nyin cwihnye ake rahnyo ukweere ke bar paajo. Maa abeehn wahne oogo bange urub wahne yihre e kway wong ngo thioiw. ²⁹ Batiene e gihn nu akway wahn wonge nu, e ngo ake rubo yihr wahn arumo kobe, ‘Abaa maahny kaa atiihya yihri ke run ni cang abea bahng cahng acielo maa adahla yea gihri. Bekihd cahng acielo maa acubi nyethiin diel ucweda ngo keehd goma ubeehn cwihny wan umihne thioiw! ³⁰ Abea naa aduu waahdi ge araany giihi urwaahnye gen rog ajabe, e muor gihn acwaadh, e naa anahgi ke nyinge!”

³¹ “Maa arub wahne keehd ngo kobe, ‘Nye waahda gihn! Wa yih beed paajo tiehd keehd an. Ngahda giih ne yihra cang kan ge beehda giih cang ne? ³² Ngahda beehda gihn maa kare ne cohg nye waahda, kejea nyoge ne dhiil miel

umihn cwihny gene ne? Bang gihn umiihu gen anaa ake roomo yihra wa nyethiin maa anaa athow, abea awaahn ni aduu banga e kuow e thiw anaa anahg ngaa maa anaa arwaahnyo abea e noono ayoad arumo nu.’ ”

Ucaale Gihir Ngad Maang Nyepinye Me Yea Ne Waal

16¹ Jeacuu acahg rob keehd jo waahdhe kobe, “Coon nyin moogo maa anaa alony anaa nudo me yihre anaa ngad maang nyepinye gihe. Maa aluom nyin yihre kejea ngo beehda ngaa muu utuuo ke gihe. ² Batiene e nyin abeehne ne cuohno urube keehd ngo kobe, ‘Nye baa gihn noono lihnga ke nyingi nu? Alihnga kejea yih utuuo ke giha. Nea wa gihn nu e kea kahl akweehn yihra uniida ka maangi giha kii ngo. Awaahn ni yih buu cahg bar maalo ke tiihy maang nyepinye giha keehdo.’

³ “Muudhe e nyin adoo ne rob ke cwihnye keede kobe, ‘Awaahn ni dhaano utiihy gihn? Bang gihn aniida awaahn ni kejea tihya ge nahga ngad maang nyepinye ni, kahl ngaan tihya yihre ke oogo yi cinga. Abea a padh ngaa me teeg. Tiihj me peeg me wa puur me roma ke leehwo tooro. Thiw nea a tum udoohnga ne ngad kwaj ke bang yihdh miehy nyoge e kuohma uyaahr. ⁴ Gihn daahda ke tihyo naa apara e gen! Beere nea a beehn oogo yi tihya arumo, e ge ucaa yihdh miehy nyoge e a ungahy gene kaa kaahno ugoong gene an thiw.’

⁵ “Batiene, e yaa akaab amihdho bang nyin tihye yih ngo ge acuohne bange naa acielo acielo maa athube ke peehny gen. Maa apeehye ngad umodho naa abeehno kobe, ‘Nyieh kar ka me ngihde e naa magi naa amihdho yihr ngaan tihya yihre ni?’

⁶ “Nyin ake rubo kejea, ‘Yihra ne kar barmiihle jiehabiihje bedahg naa gihi amaga naa amihdho.’

“Maa akoohb ngad maang nyepinye yihr nyin kea, ‘Akweehn mari gen, piih buuda kan lay cingi ugweedi gen ne jiehabiihje angween cog.’

⁷ “Ngo acahg rob keehd ngad batiene kobe, ‘Yihri naa adiih naa amagi naa amihdho?’

“Kob nyin kea, ‘Yihra ne kar cuole jiehabiihje apaar ke mog gema naa akaaba naa amihdho.’

“Kob ngad maang nyepinye yihre kejea, ‘Akweehn mari gen gweed ngo piny kejea ge jiehabiihje abiihbedahg cog naa akaabi naa amihdho.’

⁸ “Batiene gihn nu arumo naa alihng ngad paaje ngo e nyin aleeye leeyo keehd maano kobe kejea anahg ngaa maa atuug keehd gihe naa araanye umodho nu. Yaa upiny kan yihr gen ne waane keter yihr yaa beehda nyethen Juog.

⁹ Gihn daahda noono ke teedo yihru kejea kony dhaane nyoge mooge keehd gihi ungoom kan me ne yihre. Beere nea dhe yoohn gen agug arumo upiny kan, e gihir nying gen, ci dhaane ke ne yoado wong maalo yihre kun caadi paar Juog ka me gihi yea ge padh gihi me gug.

¹⁰ “Kwaad ngaan cub cwihnye ne mag nye gihi ni, me doonge ge rome kaa maango thiw. E keehdo kwaad ngaan gwaay keehd gihi thene ni, ugwaay thiw keehd gihi doong nuu acub yi cinge. ¹¹ Abea noono arumo, nea nye muu ukuom kan ge agoohg yihr dhaano ke maango, e ngaa nu ucub muu beehda adiehr ne cohg yi cing ngaan nu. ¹² E thiw nea kwaad man beehda mar ngaa moogo ni, agoohg yihri ke maa beer mee upiny kan, e ngad kee e nuu ucub mare ge poohd ne maalo yihri do?”

¹³ “Kare tooro utiihy kadaahme yihr nyoge ariow ke cwihnye acielo ne cohg. Bang gihn dhaano acielo kiin gen e nuu unhyaare kedea umaane ngaa moogo. Wale dhaano acielo e ne lum ngo wuore kedea ukweere ke wuor lum ngaa moogo. Wa gihn nu thiw kare tooro yihr dhaano unhyaare Juog kedea gihi lonyo ke cwihnye acielo muu uroomo ne tog.”

Ucaale Mooge Maa Arob Jeacuu

(Mat 11:12, 13; 5:31, 32; Mak 10:11, 12)

¹⁴ Muudhe arumo e yaa Paarijea, ge beehda kwaad nyoge thiw me nyaar ngiihny ni, naa alihng gene gihn arob Jeacuu ni, e Jeacuu acwiid gene cwiido. ¹⁵ E Jeacuu ake rubo keehd gen kobe, “Wu beehda nyoge me wu kony rogu ke dhogu ke rob kejea wu beeyo nyum nyoge. Abea Juog keede e ne ngahy kwaad gihi nii cwihny. Abea nyoge gihi riem batiene nyepinye gihi tan nying nyoge upiny kan ge beehda gihi me cwihny Juog laahm gene laahmo.

¹⁶ “Loohng Juog kedea puohny yaa agamloohngjuog, ge naa gihi anaa ake robo noono uwahdhe nye wong kaa anaa abeehn Joone ni. Abea arumo ke kaa athube ke bang Joon kaano, e Ciig Beer e rubo ke nying ka beehn Juoge uyuge nyoge ne joe, ke puohnyo yihr nyoge. E thiw nyoge cang cwihny ge anaa uyuohd bang Ciig Beer ne tiij ke tiij me ne cohg beere ge udoohng ne nyoge maa ayug Juoge ne joe thiw. ¹⁷ Nea kare ne cohg e ngo gihn me yoohd keter ubeehn maale kedea piny ugug gene. Abea loohng beehde beed kare noono agweede nu e gihn me thiin me ruy oogo ree tooro udoohng wa gihn me gihir nyinge tooro.

¹⁸ “Kwaad ngaa riem ciie kedea unyuome dhaago moogo e ngaan nu ayug adhemuohm muu uroomo kaa adhemuohm gihir ngaa maa akaab dhaago maa anyuom. E thiw nea kwaad ngaan kahl dhaago maa ariem paajo ubeehde keehd ngo, e ngaan nu ayug adhemuohm muu uroomo kaa adhemuohm gihir ngaa maa akaab dhaago maa anyuom.

Ucaale Gihir Ngad Poohd Yej

¹⁹ “Dhaano moogo thiw anaa nudo maa anahg ngaa maa alony keter. E ngo anaa abeehdo e ngaab kwaad waare me ne mihi mihi kedea cam e naa mare ne tihye paare. ²⁰ Ngaa moogo thiw maa angoohng keter anaa anudo. Anaa abeehdo e ngo beed dhe oaj gihir nyin alony ni. Abea nying nyin anahg Laajoruj. Amahr kuon ka me ledhe ge anaa anyoor ke bang yi guohbe cang. ²¹ Noono e Laajoruj anaa daahd ngo kea beere nye wey wey gihi caame, naa apahdho piny thar tharbeajo ge ne cub yihre uguume kahye keehd gen. Thiw goohy pahdh rih Laajoruj unang gene nying ka me ledhe gihe nango.

²² “Kaano arumo e Laajoruj abeehn ne thoo maa akaab wuohdjuoge ngo ukedh gene wahye ka me beer bang Abraahm. Thiin keehdo e nyin alony ake thoo thioh maa akedh wahye ka me raaj kar raahm kuohm paar maaj. ²³ Batiene arumo maa arahm kuohm nyine kwaade tooro. Abea e thoohr wonge e niid Abraahm e ngo ne ka maa acielo tiehd keehd Laajoruj. ²⁴ Gihn nu maa arube e cuohn Abraahm kobe, ‘Abraahm! Abaa Cedhree kony an! Oohr Laajoruj noono yihra ucode lweede acielo yi piih, beere duona yora yoro keehd gen. A adhaan yi kwaad deeh raahm maaj gihn kan ni!’

²⁵ “E Abraahm ake rubo keehd nyin kobe, ‘Waahto! Par wihi ne kaa anaa abeehde upiny kii ngo. Mari yih anaa beed kari me beer keehd amahr gihi lonyo yihri. Abea Laajoruj mare anahg ngad ngoohngo naa abeehde upiny. Abea awaahn ni, Laajoruj dhiil beehdo kare me ngej mee, abea yihn mari meen yih dhiil beehd kari noono nii yea nu. ²⁶ E thioh wong akeewo me thuudh nud kiino keehd wun. Kare tooro me aay dhaane bang wan kan ucea bangu kun caadi. E kare tooro thioh me aay dhaane bangu kun caadi ubeehne bang wan kan.’

²⁷ “E ngo acahg nyine kaa beehro yih Abraahm kobe, ‘Cedhree! Nea wa gihn nu, abaa Abraahm, oohr Laajoruj paar wura. ²⁸ Bang gihn yihra ne wuud miha kar ge abiih kun caadi. Teed ngo yih Laajoruj ucidhe ne toohn gen ne cohg, beere gen thioh ka me beehn gene kar raahm kan tooro.’

²⁹ “Kaano arumo e ngo acahg Abraahme kaa beehro yih nyin keehdo kobe, ‘Ngahy ngo kejea gihi rub kitaab Juoge ke nying gen ge ne bang ge wuud mihi kun caa. Gihi rob kitaab Juoge ulihng gene kedea ge utoohn gene. Kare dhiil nudo ubeehn ge wuud mihi ulihng gene gihi rob gene yih gen nea cwihny gen ne bange.’

³⁰ “Maa acahg nyine ngo ke beehro keehdo yih Abraahm kobe, ‘Abaa Abraahm! Gihn nu be rom gene ke yiho. Daahd dhaano maa athow ucahre ne rob ngo yih gen e kare nud me lihng gene gihn ngo uduu gene cwihny gen caahn bang anyoohne gihi gen.’ ³¹ Kob Abraahme kea, ‘Nea gihi teed kitaab Juoge naa agweed Moaje be lihng gene lihngo e gih ngaa maa athow ucahre buu ulihng gene thioh.’ ”

Jeacuu Nyoge Atoohne Ke Nying Nyepinye Angween

(Mat 18:6, 7, 21, 22; Mak 9:42)

17 ¹ Kob Jeacuu yih jo waahdhe, “Gihi meehg nyoge pahdho yihd gihi me reje ge padh gihi me rom rog gen gahlo. Abea unahg gihn me raaj ne waany yih ngaa umeehg gihi reje pahdho rog nyoge. ² Adhaahr ngweehn me tuohj deeh leelo yi ngud ngaan nu uthoohe yi naam duohng yih man meehge nyethiin wii luma maa ayiie pahd yi gihn me raaj. ³ Nea wa gihn nu kea koaru rogu beer mee!

“E moogo thioh nea wadu me cahng keehd yihn, ayug gihn me raaj kea cuow ngo. Abea nea anyoohne noono ayiie ree urahny cwihnye ke nyinge, kea wii ngo piny yihre. ⁴ Nea gihn me raaj ayuge rihi, keehd ne kobe kejea ayuge rihi tiel abiihberiw bad cahng acielo, abea ge tiihye gihn me raaj e ngo beehn bangi uyiie gihn raaj e ayuge rihi kedea urahny cwihnye ke nyinge, kea dhiili ngo ke wii piny yihre.”

⁵ Maa akoohb jo waahd Jeacuu, “Ngad Puohny jwag yiho mar wan yi cwihny wan, udoohnge teeg!”

⁶ E gihn nu abeehr Jeacuu beehro yih gen kobe, “Keehd me thiin yiho gihru wa wong niino, e kare nud me robu ngo yih yaadh me cuung wa acaag ne ca cuung nu kejea pudhe ree oogo ke bieye upiidhe ree yi diih naam duohng e gihn nu dhiil yaadh kaa lihngo utiie ngo.”

⁷ “Nea dhaano acielo kiinu, me yihre ne ngad tiij me tiihy yi puohdho wale maa ngad kwaag roome aduu paajo arumo ke yoohn yi puohdho, e kare nud me rub ngad tiihye yihre kejea, ‘Nyieh! Beehn arumo ucahmi?’ ⁸ Nea kare ne cohg e ngaan tiihye yihre e ne kob ngo kea, ‘Nyieh gwiir cam mara umodho kedea piih ne koar an piny nye ka cahma kedea umahdha ni.’ ⁹ Bang gihn padh kare kejea ngaa maa ngad tiij paajo koohre dhiil kaa muohyo ke nying tiij gihn tiihye? ¹⁰ Neehn ka bahng koohr ngad tiij paajo be muohj ke nying tiihye e wu thioh nea gihi arob Juoge yihru ne tiihyo ge ayugu cang, e kea koohbu kejea, ‘Wa yaa tiij now, gih nying wan tooro. Gihn atiih wane beehda tiij me wan ne tiihy ngo.’ ”

Yaa Dhoob Apaar Ge Athiehdh Jeacuu

¹¹ Jeacuu anaa wihi waahdhe e beehn geen Jeruucalem abea ngo akaahn kiin piny Camaarya keehd piny Gaalili.

¹² Ge adoohnge cahng keehd paajo moogo ni, e ngo ake roohmo ne tieg keehd cuow apaar me rog gen naa dhoobo. Maa acuung gene ka me baahr ke Jeacuu. ¹³ Batiene e Jeacuu aluohng gene luohngo e doohn gen atihng gene maalo kob gene, “Jeacuu Ruohd wan! Maahny kaa angoohng nying wane kii ngo do!”

¹⁴ Naa aniid Jeacuu ngoohng nying gen, e ake rubo yih gen kobe, “Beer kea noono cidhu unyoahdu rogu yih yaa lam gihi kweehr yih Juog.” Gihn nu ge acaahd gene caahdho e ngo aci gene ne yoado e dhoobo a'aay oogo rog gen beehde.

¹⁵ Kaano e dhaano acielo kiin gen, naa aniide ngo e dhoohbe a'aay oogo ree, e aduu bang Jeacuu, e caahd e muohj koohr Juog e duone atihng maalo. ¹⁶ Abea naa awahnhe bang Jeacuu, e ree athoohe ke thaahd tien ngo. Nyin ngo thioh anahg ngad Camaarya.

¹⁷ Maa apeehty Jeacuu ngo kobe, “Ngahda wu anahg nyoge apaar wu naa athiehdh ne? Abea nyoge abiih bengween mooge ge naa kee? ¹⁸ Keehd dhaano acielo keede now kiin gen me duu ne muohj koohr Juog tooro ne unahge kaa aley gihn e keede e naa aduu ne muohj koohr Juog ne?” ¹⁹ Maa arob Jeacuu ngo yih ngad Camaarya kobe, “Aj maalo. Cidhi ke yoohni, yiho mari naa nii cwihnyi e naa ayug kuohmi udoohnge cang mee.”

Ruohdh Juog Beehn Ke Ne Diih?

(Mat 24:23-28, 37-41)

²⁰ Cahng man keehdo e Paarijea ge anaa ne peehny Jeacuu kob gene, “Beehn Juog ne Ruohdh beehn ke ne diih?” Maa abeehr Jeacuu ngo kobe, “Beehn Juog ne ruohdh be beehn e ngo uneehno yihr nyoge. ²¹ Wale thiw be beehn keehd dhe yooh me robe kedea unyoadhe kejea, ‘E aman kan ni,’ wale kejea, ‘E ne caad kun ca.’ Ree be yuge wa maano bang gihn beehn Juog naa yi cwihnyu kaano alongthihn.”

²² Batiene maa akoohb Jeacuu yihr jo waahdhe kea, “Cahng muu uyuog cwihnyu ne cohg ubeehn. Udwaan kejea keehd cahng acielo now e ne wii yihru uniidu ngo keew nihn beehna a ge adoohng ne dhaano utaahngo. Abea ngo buu uniidu ke nyingu. ²³ E nyoge thiw ge urubo yihru kob gene, ‘Yaage cidhu kun ca e ne caad kun caa nu.’ Wale ‘Beehn kan e aman kan ni.’ Nea nyoge urubo wa maano e rogu keá laangu ke ngweey dhieny. Beehdu now karu. ²⁴ Bang gihn cahng beehna a ge adoohng ne dhaano utaahngo uke roomo keehd kwaad gihn na maahny kodh, ne bliny bliny kii diih maalo ni, e ngo kag yi maalo ke kun ke kun. ²⁵ Abea kuohma udhiil raahm umodho yihdh giith me thoohdh nyum kwaad giith ni uyug rog gen cang kedea ukweer yaa beed upiny kane ke an.

²⁶ “Beehna a, ge adoohng ne dhaano utaahngo ngo uroom kaa nihn abeehn aboare gihr Nooh yea. ²⁷ Yihdh nihn nu, nyoge wudh gen anaa athoohr gene piny ne bahrahj now e ge yug giith cam, giith maadh kuong kedea yug kahnye ke bang yihdh miehr uwahdhe yi cahng ayedh Noohe yi yaahne keehd joe. Batiene naa abeehn aboare e nyoge ake thoo utoor ngaa maa adoohng.

²⁸ “Gihn nu, beehda gihn muu uke roomo ke gihn anaa yug ree yi caang Lod. Nyoge ge anaa ke cahmo kedea umahdh gene mahdho now. Mooge ge anaa ayug giith ngiew now. Mooge dahng ge anaa ne puur yihdh puohdh gen. Mooge ge anaa ne ngeew nyepinye oogo. E mooge keehdo ge anaa ne geer wuude yihr gen. ²⁹ Nyoge wudh gen anaa acub gene ne tiij giith gen noon ni now, e wudh gen anaa athoohr gene piny. Noono naa awahnh cahng aay Lode, e kwaad maaj moogo me wa maay leelo abeehn ne cwii wudh nyoge ke maalo maa awoje wudh nyoge uwaang nyoge uthow gene cang.

³⁰ “Aroba kejea beehda gihn muu uneehn giith nu thiw, cahng unyoadh an ge adoohng ne dhaano utaahngo. ³¹ Cahng ubeehna kwaad ngaan ujoae piny e ne wiith wod keá cahg rihng piny ne kaab gihre maa awiie wod. Thiw kwaad ngaan ajoee piny yi puohdho keá rihng paajo ne kaab gihre me ne paajo. ³² Paru wudhu ke ne gihn anaa yug ree rih ciih Lod. ³³ Ke nying gihn nu ngaan daahd ukonye wahye, e ngaan nu wahye ge urwaahnyo. Abea ngaan meehg wahye rwaahnyo, e nuu ukony wahye. ³⁴ Ateed gihn maa athiir yihru kejea, caang duua yea nea nyoge ariow ge abudo ka maa acielo e dhaano acielo e nuu ukaab abea ngaa man uwii piny. ³⁵ Maahn ariow thiw ge uyuud e ge uraah wiith paahm acielo, dhaano acielo e nuu ukaab abea ngaa maan uwii piny. ³⁶ Thiw cuow ariow, ge uyuud e ge nii puohdho, dhaano acielo ukaab abea ngaa man uwii piny.”

³⁷ E jo waahdh, Jeacuu apeehny gene peehnyo kob gene, “Gihn ni ree uyuge kar piny kee?” Maa abeehr Jeacuu ngo yihr gen kobe, “Coar maa acudhe wudh gen mad gene ke ka maa athow laahye yea.”

Ucaale Gihr Dhaago Keehd Ngaa Maa Gaadi

18 ¹ Muudhe e Jeacuu ucaale moogo acahge kaa robo yihr jo waahdhe e puohny gen beere ge be dhaahr yi kway gen. ² Noono maa arobe ngo yihr gen kobe, “Umodho coon, gaadi moogo anaa anudo yi geew, anahg ngaa me be tud rih Juog. Thiw anahg ngaa me wiith thih rih dhaano utaahngo. ³ Gulo anaa anudo thiw yi geen ni acielo. Gulo na kwaay beehn bang gaadi gihn ni, e daahd dhe yooh me yuge gihn maa ne cohg yihre ke nying ngad ater gihre. Maa arube arumo yihr gaadi kobe, ‘Cedhree, konya! Yih akwaya yug gihn me ne cohg yihra ke nying ngad ater gihra gen joohr an ni.’

⁴ “Ka me laaj keter abar e gaadi wiith dhaar beehde wane wano. Gahng ke gihn maa ayuge yihr ngo. Dhe caahn arumo e gaadi acaa ne par wiith e keede maa arube ke cwihnye kobe, ‘An noon ni awaahn ni, riha ngahya kejea a padh ngaa me tud rih Juog e thiw riha ngahya kejea wiith thih rih kwaad dhaano utaahngo. ⁵ Abea keehd maano thih wiith nu, awaahn ni gun ni kuohma acuude. Bang gihn kwaaye ke beehn banga keede e raam wiith ke yug anyiinyo riha ke deeh ka me laaj. Ke nying gihn nu e gihn maa athiir maa ne cohg dhiila kaa yugo yihre. Bang gihn nea gihn maa athiir ne cohg be yuga yugo yihre, e bar maalo ke cuud kuohma.’”

⁶ Maa abar Jeacuu maalo ke rob kobe, “Boaru yea gihn arob gaadi! Keehd maano kobe kejea beehda dhaano me wiith thih ke yug gihn maa athiir yihr nyoge nu ⁷ wa gihn nu, e Juog thiw kare utoor yihre ugwiire kwaad gihn maa ne cohg yihr kwaad yaa beehda nyoge maa joe naa anhyaare ne? Ngahda gihn ngo cube cubo yihr gen nea ge bar maalo ke peehny Juog ne? Kare tooro ubeehn Juoge ubeehde e ukweer ke cub gihn buohj gene ke kway ngo ke dewaahr kedea decahngo. ⁸ Dhiila kaa robo yihru kejea Juog gihn me ne cohg udhiile ke yugo yihr gen piow piow. Abea keehd maano, e a ge adoohng ne dhaano utaahngo ge uduua piny kan cahng moogo, e nyoge me yihr gen ne yiitho ge uyuud e ge nud ungoom kan ne?”

Ngad Paarijea Keehd Ngad Gwaay Cuol

⁹ Batiene e Jeacuu ucaale moogo acahge kaa kwaano e ngo rubo kaa nying kwaad nyoge maa anahg cwihny gene, keehd dhe yoohn ka pah gene kii ngo. Bang gihn wudh gen par gene paro kejea ge nyoge me beeye. Arumo, e kwaad dhaano cang ngo cwiid gene cwiido kedea ungier gene koohm nyoge mooge ngiero thiw. Kob Jeacuu kea, ¹⁰ “Nyoge ariow ge anaa aci yi Wod Juog ne kway Juog, ngad Paarijea kedea ngad gwaay cuol. ¹¹ Ngad Paarijea athubo ke kwaj e ucuungo e puoj ree keede kobe, ‘Juog! Koohri udhiila ke amuohjo bang gihn a be neehn nyoge mooge maa yaa maahr

kedea acamo. A padh ngad kaab maahn nyoge, e be room keehd ngad gwaay cuol gihn ca. ¹² Keew nihn cahng Juog e abiihberiw ni, nihn ariow ge beehde e ge kwahnya ke oogo ukweehra cam yihdh gen kedea giha cang ne beehn yihra, yihdh ge toga ke piny naa apaar ucuba acielo cubo yihri kiin apaar gihi nu.'

¹³ "Abea ngad gwaay cuol acuungo ka me baahr mee, e acuungo e wihe akuule piny. Noono maa athube e kway Juog, abea e diehl koohre thiw ke cinge e urubo kobe, 'Juog ngwaahn an. Mara abeehda ngaa me raaj now!'"

¹⁴ "Arob gihn maa athiir yihru, ngad gwaay cuol ado paare e ngaa me Juog cwihnye amihno ree, abea padh ngad Paarijea gihn. Bang gihn kwaad ngaan cub cwihnye yi daahd ruohdh ke nying yoad gihn me beer, e ngaan nu ree uyoade ne dhaano now me gihn me ne yihre tooro. Abea ngaan yug ree ne dhaano now e ngaan nu ree uyoade ne ruohdh uyoade gihn me beer."

Jeacuu Nyethen Me Thene Adooje

(Mat 19:13-15; Mak 10:13-16)

¹⁵ Nyoge thiw nyethen gen anaa akahl gene bang Jeacuu beere cinge cube ke wudh gen udooje gen. Naa aniid jo waahdhe gihn ayug nyoge ni, e nyethen agahl gene ke oogo ne kahl bang Jeacuu. ¹⁶ Gihn nu e Jeacuu jo waahdhe acuowe cuowo maa arube yih gen kobe, "Ge keá mahnu! Weehgu ge beehno, bang gihn kwaad nyoge maa ayiho kedea me gaahn Juog me neehn nyethen ge ne wudh gen ne maalo Paar Juog. ¹⁷ A arob athiir yihru, ngaa me be lor Juog ke cwihnye cang wa ka lore nyethen, e Paar Juog be kuonge ke yoado."

Nyin Maa Alony

(Mat 19:16-30; Mak 10:17-31)

¹⁸ Ruohdh moogo, Jeacuu apeehe kobe, "Ngad Puohny me beer, gihn e nuu uyuga beere kar kuowo me guge tooro yoado yoado?"

¹⁹ Maa abeehr Jeacuu ngo kobe, "Gihn e ne cuohni an ne ngaa me beer ke nyinge? Ngaa me beer tooro upiny kan nea padh Juog keede, e naa ngaan beer cog. ²⁰ Ngahda loohng Juog ge ngahyi ne? 'Cihih ngaa moogo keá kaabi. Dhaano keá nahgi. Gihr ngaa moogo keá kwali. Gihn maa toohd keá tahr piny rih ngaa moogo now ke dhieny. Wuor wuru kedea miihu.'"

²¹ E nyin ake koohbo, "Giih ni ge amaa ke coon kii thihno gihra."

²² Naa alihng Jeacuu kaa abeehr nyine gihre kii ngo, e ngo ake rubo yihre kobe, "Nyepiny acielo cog e naa adoohng e ngo kuu atihyi. Do paajo ungeewi gihih nud yihri oogo cang kedea uyoadi ngiihny ayoadi upaahngi gen yih nyoge maa angoohe beere gihih lonyo ge yoadi ke Paar Juog kedea ubeehni unahgi ngad batiena."

²³ Naa alihng nyine gihn ni arob Jeacuu yihre, e cwihnye arahnyo bang gihn anahg ngaa maa alony keter. ²⁴ Gihn nu e Jeacuu amaahny bange maa arube kea, "Ngahyu ngo kejea ngaa maa alony ci yi Dhaahr Juog teeg yihre ubare. ²⁵ Adhaahr ngweehn roab amana yi libra wa mar libra ke keadh yihr mar yaa alony ne mono Paar Juog."

²⁶ Yaa alihng gihn arob Jeacuu, ge apeehe kob gene, "Unahg kwaad ngaa me ngihde e nuu urom ree ke boadh?"

²⁷ Maa abeehr Jeacuu ngo yih gen kobe, "Kwaad gihn me teeg me goohg dhaano utaahng ke tihiyo gihn nu Juog be goohge."

²⁸ Arumo e Piihter ake rubo kobe, "Giih wan ge awii wane piny, ubeehn wane batieni."

²⁹ E ngo arob Jeacuu yih gen kobe, "Athiir e ne teeda yihru. Dhaano maa awii paare piny wale maa awii cihe piny wale maa awii wud men piny wale maa awii wahn piny kedea men wale maa awii nyethene piny udoohngo ne ngaa maa amag Juog, ³⁰ e ngaan nu gihih me thoohdh uyoade upiny kan maa gihn me yoohm wudh muu nu cang kedea kuowo yi Dhaahr Juog ke nying run cang ngo uyoade."

³¹ Maa akaab Jeacuu jo oohr ge apaar wonge ariow ni, urube keehd gen kobe, "Wo aman ci geen Jeruucalem! Kwaad gihih anaa agweed yaa agamloohngjuoge piny ke nyinga a ge adoohng ne dhaano utaahng gihih nu ge upahdh kar gen wa kaano agweed gen nu. ³² Bang gihn a ubeehn gene ne cubo yi cing aleye. Kuohma uyaahl gene kedea ge unguud riha. ³³ A upuohd gene ke ngeero kedea unahg gene an. Abea a ucahr yi dahg nihn."

³⁴ Abea gihih arobe ni bahng gihn maa aboar gene yihdh gen, bang gihn lum yihdh gihih ni kuu anaa arob yih jo waahdh. Noono e gihn anaa adaahd Jeacuu ke teedo yih gen yea ngo kuu angey gene ne weey weey.

Jeacuu Ngaa Maa Acuor Athiehdhe

(Mat 20:29-34; Mak 10:46-52)

³⁵ Naa adoohng Jeacuu cahng keehd geen Jeriiko, e dhaano maa acoor anaa pihi thaahng yooh. Anaa apihi kaano e gihre anahg kwaj e ne na akwahye kwahyo bang nyoge. ³⁶ Naa alihng doohn nyoge gihih thoohdh e ge ubeehno ke bang yi yooh, e ngo ake peehe kejea beehda gihn e ne yug ree. ³⁷ Maa arobe yihre naa, beehda Jeacuu ngad Naajaread e ne kahnh ke kaano.

³⁸ Noono e nyin duone atihng maalo kobe, "Jeacuu! Waahd Deabid ngeer yeyi banga!"

³⁹ E ngo abeehn yaa anaa wong maalo naa ane buude ke ne cuowo kejea lenge. Abea e kaa ajwage duone noono ke tihg maalo maa arube keehdo kobe, "Waahd Deabid ngeer yeyi banga!"

⁴⁰ Batien robe noono e Jeacuu yea waahdhe amage maa ucuunge, urobe ngo kejea kahl nyin bange. Abea ge anaa adoohng cahng arumo e nyin apeehe Jeacuu peeheyo kobe, ⁴¹ "Yih daahd ngo utihya gihn yihri?"

Maa abeehr ngo yih Jeacuu kobe, "Ruohdh, a daahde beere nea kare nud yihri kea thiehdh wonga uyahbe." ⁴² E ngo abeehr Jeacuu beehro yihre kobe, "Yab wongi ree uniidi piny, bang gihn beehda yihih gihih e naa aboadh yih!" ⁴³ Noono ke wong kaano e nying nyin ake yahbo maa acidhe ke batien Jeacuu e buodh ngo e wuor Juog. Nyoge thiw naa aniid gene gihn ni, e Juog awuor gene wuoro.

Jeacuu Ge Keehd Jaciihw

19¹ Batiene arumo e Jeacuu anaa beehno e caahdh kaa waahdhe maa acore yi geen Jeriiko. ² E nyin moogo me nyinge Jaciihw anahg ngaa maa alony keter bang gihn e naa anahg ruohdh yaa gwaay cuol. ³ Kede a thiw ngo anaa beehdo e daahd dhe yooh me niide Jeacuu. Abea dhe yooh maa anaa ayoad e atooro maa aniide ngo bang gihn nyoge giijh anaa ke caahdho tiehd keehd Jeacuu ge anaa thoohdho. E thiw Jaciihw anaa anahg ngaa me ciege. ⁴ Arumo batiene naa amodhe ngo wa gihn nu kejea ka me niide Jeacuu tooro nea e ucuungo kiin nyoge kaano, e amoon wong maalo ke ngweej, uyedhe wiij yaadh maa anaa thaahng yooh beere Jeacuu niid niido beer mee. Bang gihn anaa angahye kejea Jeacuu ukahnho ke thar yaadh gihn ni anaa ayedhe wiij ngo.

⁵ Gihn nu arumo naa awahn Jeacuue thar yaadh e Jeacuu ke ngude e naa amaahny maalo bang Jaciihw maa arube yihr ngo kobe, "Jaciihw, yih aniida laar beehn piny. A beehda weehno paari tihn noono." ⁶ Batiene arumo e ngo ala ar yiijnh piny wiij yaadh ubeehne ke bang Jeacuu e cwihnye amihno ne cohg.

⁷ Gihn nu e angey nyoge ngeyo kejea Jeacuu kaa abeehn paar Jaciihw ne cam. Arumo maa athub nyoge cang ke ngoan ke cwihny gen kob gene, "Nyin abeehn paar ngaa me raaj ke ne gihn, adhaahr unahge weehno gihre ke ne diih?"

⁸ Noono e Jaciihw ayedh maalo maa acunge urube yihr Jeacuu kobe, "Ruohdh! Goan giija cang giijh ne yihra ni, ge dhiila kaa paahngo ucuba mooge yihr nyoge maa angoohng. Kede a thiw nea kwaad dhaano me gihre anaa cama, e ngo dhiila kaa coalo yihre ukaale wiij gihn acama tiel angween."

⁹ Maa abeehr Jeacuue ngo yihre kobe, "Kar bodho abeehn wudh yaa paan kan tihn ke kar gen. Beehda kare bang gihn ngad paan ni thiw beehda kwaar Abraahm ke ngude. ¹⁰ Bang gihn a, ge adoohng ne dhaano utaahngo a abeehno upiny kan, a abeehn ne daahd yaa arwaahnyo, uboadha gen thiw."

Ruohdh Maa Awii Ngiihny Piny Yihr Yaa Tiihj

(Mat 25:14-30)

¹¹ Maano e nyoge ge lihng gihn arob Jeacuue ni, e Jeacuu abar maalo ke rob keehd ucaale naa aniide ngo kejea ngo adoohng cahng ke geen Jeruucalem. E thiw bang gihn nyoge wudh ge anaa apar gene kejea ka beehn Juog ne luny yaa Yijarael oogo yi cing yaa mahn giijh gen, ngo adoohng cahng. ¹² Maa arub Jeacuue kobe, "Yaage! Dhaano maa anahg waahd ruohdh anaa abeehn ne aay e ngo caa paajo moogo beere ngo ke kwanyo ne ruohdh yea. Nea ngo ke kwanyo ne ruohdh e uduuo. ¹³ Abea e poohde e kuu a'aay nu e yaa tiihj giije apaar ge akuonge ke cuohno bange. Naa abeehn gene bange, e ngiihny ge akwaane yi cing gen kejea na low gene thaajir ke yugo ke ngiihny nu, uwahdhe ka uduue.

¹⁴ "Abea nyin ni anaa abeehde e ngo anaa amaan paaje keter. Arumo e yaa paajo nyoge mooge abeehn gene ke ne oohr batiene nyin ne rob ngo kejea ge be daahd uyug nyin ne ruohdh.

¹⁵ "Naa aci nyine ne duuo, e aduuo e ayug ne ruohdh. Batiene e yaa tiihj giije naa acube ngiihny yihr gen ge acuohne ke bange ne nyoadh ngiihny ayoad gene yi thaajir.

¹⁶ "Gihn nu e ngad umodho abeehn urube yihr ruohdh kejea, 'Ruohdh a alog tiihj keehd ngiihny awii piny yihra ukaar wudh gene tiel apaar.'

¹⁷ "Maa abeehr ruohdhe ngo kobe, 'Yih aniida ne ngad tiihya me beer keter. Yih gaahna gaahno bang naa angahyi gihn thiin naa acuba yihri ke maa. Awaahn ni yih ruohdh wudh geedhe apaar.'

¹⁸ "Keehdo e ngaa man acahg beehn wong maalo maa arube keehd ruohdh kobe, 'Ruohdh! Ngiihny naa acubi yihra, ge acahg koad keehd abiihj mooge keehdo.'

¹⁹ "E ngo acahg ruohdhe kaa beehro yihr nyin kobe, 'Beer! Yih acuba wudh geedhe abiihj ne ruohdh!'

²⁰ "Batiene e dahg yaa tiihj giije ake beehno maa arube yihr ruohdh kobe, 'Ruohdh ngiihny giijh naa acubi yihra ge gen. Ge anaa abahya keehd jwaahd waaro ugoohla ge piny, ²¹ bang gihn yih beehda ngaa me raaj, caahn e a atud ke nying gihn ngahya kejea yih beehda ngaa me poodh yeyi akuohng keter. Beehda gihn me ke robo kejea mari, gihn me padh gihri kobi nahge gihri. E kar piny me dhe kweeyi kii com yea, kobi nahge gihri me yihn ne kaj ngo.'

²² "Gihn nu maa abeehr ruohdhe ngo yihre kobe, 'Nyieh! Ngahy ngo kejea yih luga kaa lumi naa abeehn oogo yi dhii. Bang gihn aniida ne cohg kejea yih ka beehda ngaa me raaj ne ciidh ciidh! Wa kaano arobi ngo ke dhii upari ngo ke wiiji kejea yeya poodh kede a urobi ngo kejea kwaad gihn me cinga kaa jag ree e naa gihn roaja kejea beehda mara. E thiw kobi puohdho me kaa dooyo beehda e naa mara ne daahda ke kaya. ²³ Beehda gihn e naa amahn yihn ke cub ngiihny yihr yaa beeng unyuol gene yihra ke mooge beere ge ukaar yihra unahg gene jwahg?' ²⁴ Maa arobe ngo yihr nyoge naa ake cuung cang kobe, 'Kahlu ngiihny noono oogo yi cinge ucub gen yihr ngad tiihya ge wudh ngiihnye akaar tiel apaar.'

²⁵ "Muudhe e ngo abeehr yaa anaa ake cuunge yihr ruohdh kob gene, 'Abea nye ruohdh, wa nyin nu ngiihny giije wudh ge akaar tiel apaar!'

²⁶ "Maa abeehr ruohdhe ngo yihr gen kobe, 'Kwaad ngaa yihre ne nyepiny e mooge me thoohdh udhay wiij man nud yihre. Abea ngaa toor gihr nyepinye yihre, keehd gihn anaa yihre, ukaab udoohng ke cinge now.' ²⁷ Maa acahg ruohdhe ngo ke robo keehdo kobe, 'Kahlu yaa anaa akweer keehd an kob gene ge be daahd an udoohnga ne ruohdh, beehnu keehd gen yihra, unahgu gen nyuma kan.'"

Ngad Boadh Nyoge Awahn Jeruucalem

(Mat 21:1-11; Mak 11:1-11; Jon 12:12-19)

²⁸ Batiene kaa arob Jeacuue gihn ni, e ngo ake aay umoone wong maalo nyum nyoge e ngo caa geen Jeruucalem. ²⁹ Naa awahnhe buud paan cuohn ne Bedhpeag kede a paan cuohn ne Bathany, wiij good Ulihbe, e nyoge ariow kiin jo

waahdhe ge aohre ke wong maalo nyume kobe, ³⁰“Cidhu paan cuudi nyumu abea ge wahdhu, e akaja, me dhaano kuu akuong paahr wihe uyoadu e ngo amag piny. Goonyu ngo ukahlu ngo yihra kan. ³¹Nea wu ke peehnyo kejea goonyu ke ne gihn, kea rubu kejea, ‘Ruohdh e ne daahd ngo.’”

³²Gihn nu arumo e yaa ni ge apahdh yooh maa ayoad gene giih nyepinye wa kwaad ka arob Jeacuu ngo yih gen. ³³Kaa athub gene ke goony akaja arumo, e ngad akaja ake rubo yih gen kobe, “Gihn e ne goonyu nyaa akahnya ke nyinge?”

³⁴E ngo abeehr gene beehro yih nyin kob gene, “Beehda ruohdh e ne daahd ngo!”

³⁵Batiene e ngo akahl gene kahlo yih Jeacuu. Maa apeedh gene waay gen wihi nyaa akahny ni arumo, uthany gene tien Jeacuu ke maalo upaahr Jeacuu ke wihe. ³⁶Abea nye kaano anaa acaahdh Jeacuu caahdho keehd akaja nu, e nyoge waay gen apeedh gene piny ke bang yi yooh.

³⁷Ge awahn Jeacuu ka me cahng ke kaa beehn yoohe uluunge piny ke wihi good ulihb e amahr jo waahdhe cang ge athubo e doohn gen atihng gene maalo e ge poong Juog ke nying amahr giih teeg thoohdh naa aniid gene ke nying gen.

Ge ake wahr ne ngaano,

“Juog! ³⁸Dooj Juoge ruohdh ge abeehno ke yoohn Paar Maalo.

Juog doohr mare aohre,

yihro ke maalo noono dhiilo nyinge ke wuoro!”

³⁹E yaa Paarijea naa anudo kiin akuud nyoge ge ake rubo yih Jeacuu kob gene, “Ngad Puohny cuow jo waahdhi uleng gene!” ⁴⁰Maa abeehr Jeacuu ngo yih gen kobe, “Yaage ateed gihn maa athiir yihru kejea nea ge ulengo e leele ge ukwaago!”

Jeacuu Ayuog Ke Nying Geen Jeruucalem

⁴¹Naa awahn Jeacuu ka me cahng mee keehd geen Jeruucalem kedea naa amaanye ngo uboare ngo beer mee, e piih wonge ake wojo kaano. ⁴²Noono e ngo ake rubo kobe, “Jeruucalem! Koba nea kwaad giih anaa agwiir Juoge yihri ke nying kar doohr gihri, ge nii ngahyo tihn, e ngo ne nahg gihn me ne beero! Abea maahny kaa kan Juoge giih ngo yihri, dhe yooh me niidi gen tooro keehdo! ⁴³Abea cahng anaa acub Juoge piny ke nyingi ni, ngo ubeehn yihri cahng moogo, ubeehn jo mahn ke yihn uciel gene yihn piny ke ngahy roog. Kedea thiw yih ukoy gene oogo kar keedi, udiehl gene dhog yiehdhe cang oogo yihri. Ka me thiin muu uwii gene naa apuogo yihri utooro. ⁴⁴Yaa mahn giihi yih uthuohm gene piny cang ne jog jogi, utoor wong leelo acielo muu uwii gene piny e ngo kuu ajog gene. Leel man upahdh wihi wad gen, utoor kihd leelo keehdo me cuung e keede ne weey weey. E joi thiw ge unahg cang, bang gihn yih akweer keehd an, a ngaan anaa aohr Juoge bang ubeehna ne boadh yihn.”

Yaa Ngiew Ge Ariem Jeacuu Oogo Yi Laaro Gihri Wod Juog

(Mat 21:12-17; Mak 11:15-19; Jon 2:13-22)

⁴⁵Kaano e Jeacuu amon yi laaro gihri Wod Juog Jeruucalem, uthube thubo ke riem yaa thaajire oogo yi goan laaro.

⁴⁶Kaano e ge rieme e ngo urubo thiw keehd gen kobe, “Ngo beehda gihn maa agweed yi kitaab Juog kejea,

‘Wod Juog beehda kar kwaj yih Juog cog,
abea e aman ayugu ne kar yaa kahw!’”

⁴⁷Ubar Jeacuu ke maalo ke puohny gihre ke nying nihn e puohny nyoge yi laaro gihri Wod Juog. Batiene arumo e jo doong yaa lam kedea yaa loohng kedea jo doonge paajo, ge ake mahdo beere dhe yooh daahd gene daahdo unahg gene Jeacuu. ⁴⁸Abea e dhe yooh maa ayoad gene tooro, bang gihn nyoge wudh ge anaa acub gene piny ne cohng ne lihng giih Jeacuu naa arobe robo.

Luubo Ke Nying Ruohdh Jeacuu

(Mat 21:23-27; Mak 11:27-33)

20 ¹Cahng man keehdo, e Jeacuu anaa yi laaro gihri Wod Juog e puohny Ciig Beer yih nyoge, e jo doong yaa lam kedea yaa loohng kedea jo doong paajo ge abeehn bang Jeacuu. Kob gene, ²“Teeg mari noono ngaa e naa acube yihri. Tee gihn riemi yaa ngeehw oogo yi laaro gihri Wod Juog?”

³Maa abeehr Jeacuu ngo yih gen kea, “Thiw a daahd upeehnya wun. Robu ngo yihra do, ⁴luogwahy mar Joon gihn anaa acube yih nyoge ni, teege noono anaa acube luogwahy anaa ayoad paar maalo wale ke bang dhaano utahngo?”

⁵Kaano e ge ake thubo ke rob ke rog gen kob gen, “Awaahn ni, nea wo urubo yihre kejea tee ayoad ke bang Juog e ngo duoge duogo kobe, ‘Abea gihn e bahng lum Joon kuu anaa ayiiho.’ ⁶Abea nea wo urubo kejea tee ayoad ke bang dhaano utahngo, e lwaag cahg pahdh rogo ubahn gene won keehd leele, bang gihn beehde ngo ngahy gene kejea Joon anahg agamloohngjuog me duohng.”

⁷Gihn nu e ngo abeehr gene yih Jeacuu kob gene, “Ngo kwihj wane.” ⁸E ngo abeehr Jeacuu beehro thiw yih gen kobe, “A thiw ngaa acub tee yihra ngo be roba yihru.”

Ucaale Ke Nying Yaa Tiihy Giih Me Reje

(Mat 21:33-46; Mak 12:1-12)

⁹Keehdo e Jeacuu ake thubo ke rob yih nyoge kuu ucaale, “Anaa anudo ke nyin moogo maa anaa apiih yen yi puohdho gihre. Maa acube puohdho yih nyoge mooge utiihy gene yea. Batiene e ngo abeehn ne aay ucea kar weel kaa me baahr maa acea ne ceng thiw duug. ¹⁰Abea ge abeehn pinye ne ciegh arumo, e dhaano acielo kiin yaa tiih

giihe aohre ke bang yaa anaa acube yi puohdho ni. Ngo aohre beere e caa ne kahno yihre keehd goan caame yihdh giih acieg yi puohdho. Abea yaa anaa yi puohdho ni, ngaan aohre apuohd gene maa ariem gene ngo oogo ke cinge now. ¹¹ E wur puohdho ngad tiijh gihre moogo acahge kaa oohr bang yaa ni keehdo. E nyin acahg gene kaa joothro maa arieme gene ngo oogo ke cinge now thiow. ¹² Keehdo dahng e wur puohdho poohd be dhaahr maa aohre dahw gen keehdo. Abea yi dhoar ni e yaa tiijh ngwiilo akedh gene ke rih ngaa ni anaa aohr ni. Maa ariem gene ngo oogo thiow kun caadi.

¹³ “Kaano arumo naa aniid wur puohdhe ngo e ake pahro ke cwihnye e urubo e keede kobe, ‘Awaahn ni, gihn e nuu utiihya keehd yaa ni! Moogo e waahda ke ngude ge nyethiin yeya ni naa anhyaara e nuu uohra. Moogo e ke nying gihn nahge waahda, kuohme uwuor gene, ubahng cing gen buu ujag gene ree.’

¹⁴ “Abea ge aniid yaa tiijhe waahd ngad puohdho, e ge ake rubo ke rog gen kob gene, ‘E naa waahd ngaa udoohng ne lag piny ni e gihn beehn. Nahgo ngo beere puohdho gihn udoohngo ne gihro.’ ¹⁵ Noono maa aywaay gene ngo toohg puohdho ne naah kun nu.

“Nea maru, e gihn e nuu yug wur puohdhe rog yaa ayug kwaad gihn raaj wa maano ree? ¹⁶ Ngo teehng wudh gen unahg gen cang kedea ucube puohdhe yihr nyoge mooge.”

Naa aliing nyoge gihn ni arumo e ge ake gaahy maa arub gene kob gene, “Yaahy! Gihn ni ree keá tiihye.”

¹⁷ E Jeacuu amaahny bang gen kaano ne cohg maa arube kejea, “Abea yi lum anaa agweed arumo beehda gihn ne cohg? Gihn anaa agweed yi kitaab Juog kejea,

‘Kaaw gihn akweer yaa geere keehde
e naa adoohng ne meehn wod!’

¹⁸ Kwaad ngaa upahdh wiih leen nu, e naa ngaan utoar ne jog jogi. E kwaad ngaan upahdh leen nu wiihe, e naa ngaan unyonge ne kud kudi.”

Rob Ke Nying Gwaay Cuol Yihr Jaah Roama

(Mat 22:15-22; Mak 12:13-17)

¹⁹ Kaano e yaa loohng kedea jo doong yaa lam giih kweehr, ge anaa adaahd dhe yooh me mag gene Jeacuu, bang gihn ngo abeehn gene ne ngeyo kejea kwaad ucaale giih arobe, ge arobe kaa nying gen. Abea dhe yooh me mag gene ngo abeehn ne goohg yihr gen, bang gihn ge atud yihr nyoge.

²⁰ Ne koar Jeacuu piny e nyoge mooge akoog gene beere ge beehn bang Jeacuu, e rog gen anahg gene piny wa nyoge me beeyo me yihdh gen cang keehd ngo. Ngo agaahn gene kejea Jeacuu urubo ke gihn me meehg ngo mago yihr gen beere ngo luom gene luomo yihr yaa ruohdhe giih geen Jeruucalem kedea yihr muudihr gihr yaa Roama.

²¹ Kaano arumo maa abeehn yaa anahg rog gen piny bang Jeacuu ne peehny ngo kob gene, “Ngad Puohny beehda gihn me ngahy wane kejea yih puohny kedea yih rob giih maa athere. Thiow kiin nyoge ge be kwanyi abea mari puohny lum Juog ke dhe yooh maa adiehr. ²² Rob ngo yihr wan do! Beehda gihn maa arob loohng Juoge yihro kejea gwaaj cuol yihr Jaah Roama ne wale ngo amahne?”

²³ Abea e gihn anaa adaahd gene ne cohg, yi ngo amodh Jeacuu modho piow piow. Noono maa arube yihr gen kobe, ²⁴ “Nyoadhu wong grihj yihra uniida ngo! Cuuro gihr ngaa kedea nying ngaa ge naa agweed ngahy grihj gihn?”

²⁵ Maa abeehr gene ngo kejea, “Beehda cuuro kedea nying Jaah Roama.” Kob Jeacuu yihr gen, “Beer cubu kwaad gihn beehda gihr Jaah Roama yihr Jaah Roama kedea cubu gihr Juog yihr Juog.”

²⁶ Dhe yooh maa ayoad gene atooro maa amag gene dhe Jeacuu keehd ngo nyum nyoge kaano. Noono e ge ake lengo bang gihn ge acwaahng ke dhe yoohn kaa abeehr Jeacuu gihn apeechny gen.

Rob Ke Nying Gihn Meehg Juoge Nyoge Cahro

(Mat 22:23-33; Mak 12:18-27)

²⁷ Keehdo e yaa Caaducean, ge na rubo kejea nyoge maa athow ka me cahg gene cahro keehdo tooro, ge anaa abeehn bang Jeacuu maa apeechny gene ngo kob gene, ²⁸ “Ngad Puohny, anaa arob loohng Moaje kejea, ‘Nea dhaano umen athow, uwiie ciithe piny abea nyethiin tooro yihr gen e ngaan umen athow ciih umen geere geero beere yea ngo nyuole nyuole.’ ²⁹ Anudo ke wuud meehe abiihberiw. Ngaa duohng gen anaa abeehn ne nyuohm maa thowe e yihre tooro nyethiin. ³⁰ Maa abeehn ngad batiene ugeere ciih umen ucahge thoo e nyethiin tooro kiin gen. ³¹ Maa acahg dahw gene do wod keehd dhaago maa athowe thiow e nyethiin tooro. Ne naang wa maano uwahdhe kaa athum gene cang ke thoo kar gen noono abiihberiw, e bahng ngaa maa anyuol keehd nyethiin ke dhaar ni keew gen ne weey weey. ³² Dhe caahn arumo e dhaago ree acahge kaa mad piny thiow. ³³ Nea ka robe kejea nyoge ge ucahro batien thon gen, e dhaar ni unahg ciih ngaa keew gen noono abiihberiw bang gihn ge aci wod keehde cang?”

³⁴ Noono e ngo abeehr Jeacuu beehro yihr gen kobe, “Ngahyu ngo kejea cuow kedea maahn me poohd kuow upiny kan, ge naa yaa nyoothmo ke rog gen. ³⁵ Abea padh cuow kedea maahn giih ucahr keehdo. E thiow gen noono ge naa cuow kedea maahn giih miehr keehd kwaad kar kuowo gihn ne wong maalo ni, nyuohm beehda gihn me tooro ke nying gen keehdo. ³⁶ Bang gihn ge be cahg thoo, thoo padh gihr gen. Ge beehda nyoge muu uroomo keehd wuohdjuog kedea ge adoohng ne nyoge maa nyethen Juog. ³⁷ Wa gihn nu anaa anyoadh Moaje kejea,

‘Nyoge maa athow ge dhiil cahro batien thoo.’

Robe noono yoad ke kaa anaa arube ke nying kaa aniide bungo e uwaang. Moaje anaa arubo kejea Juog beehda Juog wuor Abraahme kedea Yijaag kedea Jeakob. ³⁸ Juog ge niidu ni yaage padh Juog nyoge me tooro wale nyoge maa athow, bang gihn nea yihr Juog e ngaa maa athow tooro. Nyoge beehda nyoge me kuow cang yihre.”

³⁹ Gihn nu arumo e nyoge mooge maa yaa loohng doohn gen atihng gene ke maalo kiin nyoge kun caa e ge arubo kob gene, “Ngad Puohny gihn nu angahyi ke beehro beer mee!” ⁴⁰ Gihn nu maa atud gene arumo utoor ngaa maa acahg Jeacuu ke peehnyo keehd piehj gih waane keehdo.

Ngad Boadh Nyoge Beehda Kwaar Deabid Ke Ne Diih?

(Mat 22:41-46; Mak 12:35-37)

⁴¹ Kaano e ge apeehty Jeacuu peehnyo kobe, “Beehn ke ne diih kejea ngaan akob kejea e nuu ubeehn ne boadhe nyoge ni, unahg ngaa me beehda kwaar Deabid?” ⁴² Bang gihn keehd Deabid ke ngude e ngaan nu arob anaa acuohne kea ngo beehda ruohdh yihre thiw. Wa kwaan kaa anaa arobe ngo yi kitaab wahr kejea,

‘Juog Ruohdha arubo yih Ruohdha kea,

“Pihi ukwiihya kan

⁴³ uwahdhe ka uyuga yaa mahni ne upahm thaahdh tieni.”’

⁴⁴ Deabid kwaan cahge cuohno ne ‘ruohdh’ yihre ke ne diih?”

⁴⁵ Nye kaano anaa alihng nyoge lihng nu, e Jeacuu ake rubo keehd jo waahdhe kobe, ⁴⁶ “Cubu wudhu piny yaage ukoaru rogu beer mee thiw ke nying yaa loohng ubahnghe dhe yoohn gen noono beehd gene kii ngo be ngooru. Bang gihn mar gen ge nhyaar waahdh ke kiin nyoge keehd thoohn waay gen noono bahy nu. E thiw mar gen, ge nhyaar dhe yoohn maahdh nyoge ke bang yi cuug e nyoge wudh gen kuul gene ke piny yih gen. E thiw keehdo, kwaan kuohn pihi giih acub wong maalo yihdh wuud amaade ni, gen naa giih nhyaar gene noono ne kuohn pihi yih gen. E dahng, kwaan kuohn beey kuohn mahd nyoge yihdh gen kar cam, ge naa giih nhyaar gene ke kwanyo upiih gene yihdh gen. ⁴⁷ Ge nyoge me nhyaar cam giih gule kedea kwaj duug yi Wod Juog ne kang nying nyoge abea toohd now kway gen noono yea apuogo. Juog ge ukihme ke deeh ukihm me teeg.”

Muuy Gulo Maa Angoohng Apuoj Jeacuu

(Mak 12:41-44)

21 ¹ Noono arumo Jeacuu wihe atihng maalo maa aniide yaa alony e ge thoohr ngiihny yi caanduug yi wod Juog. ² Dhaago maa gulo maa angooohng aniide thiw e athoohr wong grihj cog. ³ Kaano e Jeacuu ake rubo kobe, “Gihn maa athiir ne cohg e ne teeda yihru, gulo gihn angooohng ni e naa muuyo keraahyo ukaale muuy amahr yaa nu cang. ⁴ Bang gihn yaa ni cang ge amuuyo ke yihdh ngiihny gen me thoohdh, abea gulo gihn mar dhe ke ngude e gih cahng nu, e naa athoohre yi caanduug.”

Thuohm Geen Jeruucalem Piny

(Mat 24:1, 2; Mak 13:1, 2)

⁵ Nye kaano keehdo e nyoge mooge ge ake thubo ke rob e ge puoj Wod Juog ke nying dhe yoohn geer naa ageere ke wuohbo, keehd thoohn leele kedea amahr giih acub yea naa amuode keehd gen ne giih muuyo yih Juog. Maa arub Jeacuu kejea, ⁶ “Giih ni kan niidu ni, cahng acielo moogo ubeehn muu utuohm Wod Juog piny cang utoor wong leelo acielo muu udoohng wihi wad gen!”

Ka Thub Giih Me Reje Kii Ngo

(Mat 24:3-14; Mak 13:3-13)

⁷ Keehdo maa apeehty gene kejea, “Ngad Puohny! Weehne e nuu ubeehn gihn ni uyuge ree?”

⁸ Maa abeehr Jeacuu ngo yih gen kobe, “Cubu cwihty piny beer mee ubahnghe rogu be meehgu dwaahngo. Bang gihn amahr nyoge me dwaahng wun ke nying giih uyug rog gen ge ubeehn ke batiene e ge rubo kaa nyinga e ngaa man ukoohbo kea, ‘A naa en.’ E thiw ge urubo kejea, ‘Cahng ngo awahnho arumo.’ Wu keá cidho ke batien kwaan yaa nu rubo wa kwaan maano. ⁹ Thiw linye bang gen ulihngu kedea dhog awahnho bangu ke nying linye mooge me ne kuohn me bahye. Abea yihdhu keá baadh bang gihn giih nu rog gen kuong gene kaa tiihyo umodho e caang gug piny poohd kuu awahnho.

¹⁰ “Paajo yea upahw ne dahg ubeehn yaa tien paajo acielo ukag gene ke rog gen kedea dhaahre giih wihi piny ge ukag naa arwaadh ke rog gen. ¹¹ Amahr ayahng ngoom me thoohdh rog gen uyug gene ke bang kuohn me thoohdh. Kahj me duohng upahdh rog nyoge kedea kwaan atwaanye mooge ge upahdh rog nyoge ke yihdh kuohn me thoohdh. Kwaan giih me teeg yea maalo thiw rog gen uyug gene uniid gen ke bang yi maalo.

¹² “Abea umodho e giih ngo rog gen poohd kuu uyug gene, e cing unaa wudhu uyug giih ajohr rogu keter. E nyoge wu ukedh gene kuohn luwe giih gen kedea ukedh gene wun yi karkoohn. Wu ukedh gene nyum ruohdhe kedea nyum maamuure giih paajo. Giih nu cang ge uyug gene rogu wa maano kaa nying gihn nahgu nyoge maa jo'a ni. ¹³ Cahng nu, e naa ka urubu ke nying Ciig Beer ne cohg. ¹⁴ Nea wa gihn nu e wu keá na guo moon piny kejea wu upahro ke dhe yoohn ka ukonyu rogu ke leehbu kii ngo. ¹⁵ Bang gihn dhe yoohn ka urubu kii ngo kedea ka unghy luube beehro kii ngo thiw, unahg a e nuu ucub ngo yihru, beere dhe yooh me beehn yaa ater giihu ucahg gene giih mooge ke robo rogu keehdo tooro. Dhog gen e nuu utal ne kwaan giih urobu. ¹⁶ Abea dhe yoohn kar luom me duohng e nuu unud ke nyingu. Ge weehgu kedea wuud meehu maa kwaan nyoge maa awaahde keehd wun ge nuu ucahg wun ke luomo. Maa nyoge maa gome keehd wun thiw wu uluom gene. Nyoge mooge kiinu dahng ge unahg gene. ¹⁷ Wu umaan nyoge cang ke nyinga. ¹⁸ Abea keehd maano e keehd wong yiehno acielo now buu ne tag piny yihru. ¹⁹ Dhe yoohn kuow maru me beer, ngo uyoadu kaa dhe yoohn ka guumu kii ngo yihdh giih me teeg.

²⁰ “Abea nea ge niidu ngo arumo e Jeruucalem atieg yaa deaje piny cang, kea ngahyu ngo kejea kar ka rahny giith geen Jeruucalame kii ngo awahnho. ²¹ Kaano arumo kea beehn yaa beed Judea, goohd gene ke ngweej ne pahno yihdh bung yihdh goode. E thiow beehn kwaad yaa muu beed yi buur geew ni, aay gene. Abea kwaad yaa muu abeehn oogo yi buur geew ni, ge keá cahg do geew. ²² Bang giith nihn nu ge nuu unahg nihn ubeehn Juoge ucuowe nyoge wa kwaad kaano anaa arob kitaab Juoge ngo kii ngo nu ke nying giith reje naa ayug gene. ²³ Abea yihdh nihn nu ngo unahg giith me teeg rog maahn muu yaje kedea maahn me dhuohdho keehd nyethen. Bang giith muum wiij upahdh ungoom keter. Maa deeh cuow Juog me teeg upahdh rog nyoge ne cohg. ²⁴ Nyoge mooge ge unaahng e ge coob kaa pale, e nyoge mooge dahng ge ukedh miehrg mooge udoohng gene ne baahng yihdh gen. Noono arumo e kwaad yaa kwihy Juog, Jeruucalem ke buur ngude ngo unyon gene piny ke tien gen. Ge ubeehdo yea uwahdhe ka uthum gene nihn acub piny yihrg gen.

²⁵ “E thiow kwaad kihd giith mooge rog gen uyug gene kii maalo kii wong cahng kun caadi kedea kii wong dwaahy kedea ke nying ciehr. Wudh nyoge une cohg ke nying kwaad giith ni thoohdh yug rog gen ni, wa kwaad giith ngoar kedea giith maahr ke bang yi naam duohng. ²⁶ Nyoge ge amag lwahre utud gene ne joad uluy nyoge luyo bang lwahr naa apahdh rog gen arumo. Nyoge koohm gen une kuohj une gene lwaj ke nying kwaad giith doong ayug rog gen yihrg nyoge ke bang wiith piny cang. Giith beed bang yi maalo rog gen udhuohb gene cang ke kar gen ne dug. ²⁷ Noono e a ge adoohng ne dhaano utaahngo uniid nyoge arumo e a beehn kaa yi poohlo ke maalo, e a beehn kaa deeh tee kedea e wiitha amoar. ²⁸ Arumo kaano nea kwaad giith nu ge uthubo ke yug rog gen, kea maahnyu e wudhu tihngu ke maalo, bang giith kar ka ukonyu wahyu kii ngo adoohng cahng ke beehno.”

²⁹ Maa arobe ucaale giith yihrg gen kobe, “Maahnyu ke rih dhuuro! Kedea rih kwaad yaadh cang, ³⁰ nea ge thub gene ke lodho keehd booge me nyaahn ni, e giith nu ngo guo kaa angeyo kejea beehn oohro adoohng cahng. ³¹ Neehn giith nu thiow, nea kwaad giith ateeda yihru kan rog gen yug gen yugo, kea ngahyu ngo kejea ka beehn Juoge ne kony nyoge, uyug Juoge gen ne joe, e naa awahnho arumo.

³² “Adiehr, e ne roba yihru. Wu yaa nud awaahn ni wu buu uthow e giith aroba yihru rog gen poohd kuu atiihy gene.

³³ Maalo kedea piny kan ge utooro abea luma ree utiinge kare.

³⁴ “Abea giith nud gen, dhiilu wudhu ke koaro ubahng giith kar kuowo maru wudhu be nyoan gene, ugaalu kaa maadh kuong kedea ke daahd giith adeehju cwihnyu rog gen wiith piny kan. Noono ubeehn nye wong kaano uaahle wun piny e rogu kuu agwiiru ke nyinge. ³⁵ Bang giith kwaad ka muu udoohng piny naa apuogo now tooro. Kwaad giith nu ge beehda giith muu ubeehn rog thaahye cang ke bang wiith piny cang ne dug. ³⁶ Dhiilu beehdo e rogu agwiiru, ukwayu Juog kwayo, beere Juog wu konye konyo ucube teeg cwihny mare ge beer yihru, beere wu ubodho yihdh kwaad giith ubeehn ne tiij rog gen wiith ngoom. E thiow keehdo beere wu kony Juoge konyo, unghayu cuungo keehd dhe yoohn kar kuowo maru maa ne cohg, nyuma a ge adoohng ne dhaano yi beehn mara nuu ubeehna.”

³⁷ Noono arumo ke nying nihn e Jeacuu anaa abeehde e kwaay puohny yi laaro gihr Wod Juog. Abea nea ge yuudh cahng ni e ngo beehn oogo geen Jeruucalem, ucea ne daahd kar budo yihdh miehrg giith dhe oogo yi geew me ne ka me cahng keehd good Uliihbe. ³⁸ Arumo nea ge ruu piny ke nyango keehdo, e ngo duu Jeruucalem. Kaano keehdo, e nyoge ge cahg waahd bange yi laaro gihr Wod Juog gihr Jeruucalem, beere ge beehn ne lihng giith puohnye nyoge keehd gen.

Kaa Agweehg Nahg Jeacuu

(Mat 26:1-5; Mak 14:1, 2; Jon 11:45-53)

22 ¹ Keehdo e yaay gihr ka cam amono me bahdh me nyinge Yaan Amono anaa adoohng cahng. ² Kaano e jo doong yaa lam giith kweehr kedea yaa loohng dhe yooh anaa adaahd gene beere Jeacuu nahg gene naah. Abea e giith nu ayug gene kaa piny bang giith ge atud yihrg nyoge. ³ Muudhe e kaano thiow, ruohdh atiihb ukeehge abeehn rih Juudo Yijkaarid ukedhe giith me raaj yi cwihnye. Juudo anahg dhaano acielo kiin jo oohr giith Jeacuu ge apaar wonge ariow ni. ⁴ Giith nu arumo e Juudo anaa aloaj ucea ne rob keehd jo doong yaa lam kedea jaabidhe giith acaakere giith koar Wod Juog beere dhe yoohn ka luome Jeacuu kii ngo nyoadhe nyoadho yihrg gen. ⁵ Batiene e cwihny yaa ni ake mihno ne cohg. Noono ugwiir gene dhe yoohn kar ngiihny giith cub yihrg Juudo ne giith akum thog. ⁶ Maa ayiih Juodoe gihr gen noono, ubeehne ke ne daahd ka unyoadhe kar Jeacuu kii ngo e yuge kaa piny maano e nyoge tooro.

Jeacuu Maa Yaae Ge Gwiir Ka Yug Gene Yaay Yea

(Mat 26:17-25; Mak 14:12-21; Jon 13:21-30)

⁷ Kaano e cahng ka cam amono me bahdh abeehno ge beehda cahng nahg nye roomo gihr Yaan Amono. ⁸ Giith nu e Jeacuu, Piihter kedea Joon ge aohre kobe, “Cidhu ne gwiir cam cahng Yaan Amono yihro ucahmo.” ⁹ Batiene e Jeacuu apeehny gene peehnyo kob gene, “Kee e ne daahdi nuu ugwiir wane cam yea?”

¹⁰ E ngo abeehr Jeacuue beehro yihrg gen kobe, “Cidhu abea ge wahdhu yi buur geew ne ngio, e dhaano uyoadu, ngaa me kaahn dag piih. Buodhu ngo uwahdhe ka ucidhu keehde tiehd paan cea yea. ¹¹ Robu ngo yihrg ngad paan nu kejea, ‘Arob ngad puohnye kejea, “Wod weehle naa agwiiru ne kee beere beehn ne cam Yaan Amono yea keehd jo waahdhe?”’ ¹² Wod cam me laaj maa agwiir unyoadhe yihru wod maalo kun caadi. Gwiiru giith nye pinye yea bang cam yihro.”

¹³ Giith nu arumo naa acidh gene, e ge yuud giith ni ateed Jeacuue yihrg gen wa kwaad kaa anaa ateede gen kii ngo, noono arumo e giith nyepinye ge agwiir gene gwiiru ke nying Yaan Amono.

¹⁴ Naa abeehn kar came arumo, e Jeacuu ake piih wiith tharbeany cam tiehd keehd jo waahdhe. ¹⁵ Batiene maa arube yihrg gen kejea, “Bange anaa ayuoga keter yaage, beere Yaan Amono giith ni, naa ayugo umodho keehd wun tiehd nye ka poohde e raahm gihra kuu abeehn riha ni. ¹⁶ Abea adiehr roba robo yihrg kejea Yaan Amono me wa giith ni muu ucahga camo keehd wun keehdo tooro nea padh cahng ukobe kejea lum giith ne yi Yaan Amono e naa ayug ree, beere Juog nyoge giith adoohng ne joe ni ge mage mago.”

¹⁷ Batiene robe noono e Jeacuu kubaayo akaabe kaabo maa amuohje koohr Juog urube kejea, "Kaabu gihn, upaahngu ngo ke rogu. ¹⁸ Awaahn ni ngo roba robo yihru kejea koongo me wa gihn buu ucahga ke maadho keehdo nea padh cahng adoohng Juoge ne ruohdh kii ngo e naa abeehno."

¹⁹ Keehdo e Jeacuu amono acahge kaa kaabo, abea naa athume ke muohj koohr Juog, e amono atoye toyo upaahnge ngo yih gen e urubo kobe, "Gihn ni beehda kuohma maa gihn muu ulam piny ke nyingu. Yugu ngo wa maano uparu an keehd ngo."

²⁰ Dahng keehd dhe yooh ni keehdo naa athum cam, e kubaayo acahng Jeacuu kaa kaabo urube kobe, "Kubaayo gihn beehda e naa dhe yoohn ka beehn Juoge uyuge anweehd me nyaahn keehd nyoge. Dhe yoohn anweehd gihn nu uyug Juoge kaa rema, ge uwoj piny ke nyingu ni."

²¹ "Abea be niidu ne! Wa ngaan uluom an nud kan keehd an tiehd wiith tharbeajo. ²² A ge adoohng ne dhaano utaahngo, a uthow wa kaa akob naa ree uyuge abea ngaa luom an ge adoohng ne dhaano utaahngo unaa yi gihn me raaj ne waany."

²³ Arumo maa athub jo oohr ke rob e ge peehny rog gen kob gene kejea, "Ngaa e nuu uyug kwaad gihn raaj wa gihn nu?"

²⁴ Thioh peehm ree anaa ayuge kiin gen kejea ngaa kiin gen e naa ngaa duohng gen. ²⁵ Maa arob Jeacuu ngo yih gen kea, "Yaage ruohdhe giith upiny kan ge nyoge me kwihj lum Juog ni, paajo mag gene yih nyoge kaa dhe yoohn tiel kedea kaa dhe yoohn bahng now. Abea keehd maan amag gene nyoge keehd dhe yoohn bahng wa maano nu, e ge poohd cuohn nyoge cuohn ne gome giith gen. ²⁶ Abea nea maru e padh ne maano. Nea kare ne cohg e ngaan akob kejea e naa ngaan wiith ne maalo, ne duohng yihru cang, yuge ree wa e naa ngad dhe caahn ge thiin kiin nu, e naa acub ne ruohdh nahge en naa ngaa tiith yihru. ²⁷ Nea maru, e ngaa e ne duohng? Ngaan apiih kar bahbe ne cam ne? Wale ngaan cub cam nyum ngaa apiih kar bahbe? Ngahda ngaan apiih kar bahbe ne? Abea maanyu an kaa ayuga riha kiinu ne ngaan cub cam nyumu. ²⁸ Wu gen naa yaa acuung ngahya ne cohg yihdh giith teeg naa aguuma. ²⁹ Abea awaahn ni, teeg mara naa acub Juog Wura yihra ni, ngo acuba yihru. ³⁰ Yuga yugo wa gihn nu beere cahng moogo, e wu beehn ne piih ucahmu umahdhu keehd an tiehd wiith koom ruohdha ge adoohnga ne ngaa maa ruohdh wiith. Wu upiith thioh ne ruohdhe wudh koome unahge wun nuu ungol luwe giith dhog wuude giith yaa Yijarael ge apaar wonge ariow piny."

³¹ "Cimoan! Atiith ukeehg wu anaa adaahde beere wu nea kuoro wa gih ngaa me kuor beel? ³² Abea Juog akwaya ke nyingi yih Cimoan, udoohngi teeg ubahngge yiho gihri yea be duoge caahn. Nea cwihnyi aduui banga kea na cahg cwihny yaai ke ciithmo keehdo udoohng cwihny gene teeg thioh!"

³³ Gihn nu e ngo abeehr Piihtere beehro yih Jeacuu kobe, "Ruohdh nea beehda kaa ngo, kea a daahde thioh udhiila cidho keehd yih ni karkoohn wale nea gihn ngo beehda naahg kejea yih ke naah e a dhiil kaa naah thioh uthowa keehd yih tiehd."

³⁴ E gihn nu acahng Jeacuu kaa duogo yih Piihter kobe, "Piihter, adiehr e ne roba yihri. Tih noon ni yi dewaahy tih maano e uthuonjieno poohd kuu akoohg e yih ukweer ke an tiel adahg kejea a kwihy."

Mapada kedea Joohng Cingo Maa Pala

³⁵ Batiene e Jeacuu jo waahdhe ge apeehnye kobe, "Do nye yaage, ge anaa aohra wun ne cahng, mapade kedea jooge maa wuoy tiel maa anaa akaahnu ge anaa anudo ne? E thioh ne gihn maa anaa adaag yihru ne?"

E ngo abeehr gene beehro yih Jeacuu kob gene, "Bahng gihn maa anaa adaag."

³⁶ Kob Jeacuu kea, "Beer kea noono awaahn ni, nea ngaan yihre ne mapada wale yihre ne joogo e kea beehne keehd ngo thioh. Abea ngaa toor pale yihre, ngeewe waahre oogo, ungeehwe yihre keehd pala acielo, ³⁷ bang gihn aroba yihru kejea giith anaa agweed yi kitaab Juog ni, e rubo kejea,

'Ngaan anaa arob,

nyoge utiithy ree keehd dhe yooh me wa e naa ngaa me raaj.'

Gihn nu arob kitaabe ke nyinga nu,

ree udhiile kaa ngo wa kaano agweede nu."

³⁸ Noono e jo waahdh Jeacuu ge ake rubo yihre kob gene, "Maahny! Pale ariow amuu yih wan!" Maa abeehr Jeacuu ngo kobe, "Kea kwihyu loo wa gihn nu yaage."

Jeacuu Aci Ne Kway Juog Wiith Good Uliihbe

(Mat 26:36-46; Mak 14:32-42)

³⁹ Batiene maa a'aay Jeacuu ucea wiith Good Uliihbe, bang gihn beehda gihre me na kwaaye kaa yugo. Thioh jo waahdhe ge anaa acidho ke batiene. ⁴⁰ Naa awahn Jeacuu kaa ngo arumo, e ngo ake rubo keehd gen kobe, "Yaage! Kwahyu Juog beere wu be tum atiith ukeehge." ⁴¹ Gihn nu e anyiig wong maalo kar keede, ka me cahng mee keehd gen, me rom doohdo keehd abahdo ke leelo. Noono maa arunge cuunge piny uthube ke kway Juog e urubo kobe, ⁴² "Abaa Wura! Nea kare nud, e raahm gihn kea meehg wahn riha! Mare meen padh wa kwaad ka daahd cwihny ngo, abea beehda kar cwihny me daahdi." ⁴³ (Noono e wuohnjuog abeehn bange ke maalo beere e beehn ne ciith cwihny Jeacuu umage cwihny teeg.) ⁴⁴ Kaano anieng raahm aduule ree keter nu, e ngo acahng kwaj keehd leehd cwihny maa ne kwahge thuudh ree e toon piny wa remo.

⁴⁵ Naa a'aje maalo piny kar kwaj e ngo abeehn bang jo waahdhe, e ge ayuude e ge aneno, bang gihn keehd gen thioh koohm gen anaa athyaay keter bang gihn ge anaa amag raahm aduule thioh. ⁴⁶ Batiene e Jeacuu ake rubo keehd

gen kobe, “Yaage gihn e ne niinu? Yedhu maalo ukwayu Juog unghayu cuungu teeg mee yihdh giijh utum ge beehn wudhu ni.”

Jeacuu Amag

(Mat 26:47-56; Mak 14:43-50; Jon 18:3-11)

⁴⁷ Kaano anaa apoohd Jeacuu e urubo keehd jo waahdhe nu, e akuud nyoge anaa acaahj bang gen. Juudo e naa abeehno keehd gen, Juudo anaa kiin jo waahdh Jeacuu ge apaar wonge ariow ni. Noono ubar Juudo ke bang Jeacuu ne kew uciime Jeacuu ciimo yi thaahnge. ⁴⁸ Maa arob Jeacuue ngo yihre kobe, “Juudo! A ge adoohng ne dhaano utaahngo, a ne luomi kaa ciimmo ge aciimi an ne?”

⁴⁹ Abea gihn nu naa aniid jo waahdhe ngo e ree aloge ne gihn me raaj muon, e Jeacuu apeechny gene peechnyo kob gene, “Ruohdh! Wal wane pale giijh wan ne?” ⁵⁰ Kaano e dhaano acielo kiin gen pahle ayuohdhe ke oogo ungole yih kwiihj gihr ubaahng me tiihyo paar ngaa duohng yaa lam. Yih ngo angole piny ne thiib.

⁵¹ Jeacuu ake rubo yihre kobe, “Athum! Kwaad gihn nu keá tiijh keehdo.”

Batiene maa agweele yihy nyin atoohng ni, uthiehdhe ngo ke wong kaano.

⁵² Gihn nu e Jeacuu acaa ne rob keehd jo doong yaa lam giijh kweehr piny kedea acaakere giijh koar Wod Juog piny ni maa jo doong paajo naa abeehno kobe, “Nye yaage, beehda gihn ne cohng e naa abeehnu banga e wu kaahn pale kedea belunge kii cingu? A beehda ngaa maa apaahr dom rih akuumo yihru ne? ⁵³ Wa a na kwaay beehdo keehd wun tiehd yi Wod Juog ke nying nihn, gihn e naa agoohg dhe yoohe yihru maa anaa amagu an? Beer, tihn beehda cahngu utiihyu kwaad gihru ne tiihyo riha, bang gihn piny poohd beehda gihr atiihb ukeehg utiihy gene.”

Piihter Ree Ajaahye Kejea Jeacuu Kwihye

(Mat 26:57, 58, 69-75; Mak 14:53, 54, 66-72; Jon 18:12-18, 25-27)

⁵⁴ Batiene arumo e Jeacuu akaab gene kaabo maa abeehn gene keehd ngo paar ngaan duohng yaa lam giijh kweehr e Piihter ake cidho thioh e ge buodhe kaa nye ka me lied mee. ⁵⁵ Abea naa a'ahb maaj yi diehr kala. Kedea ubeehn nyoge upiih gene ne oohyo e Piihter ree amade ke bang gen ne oohyo thioh. ⁵⁶ Nyaakow me tiihyo paajo Piihter aniide e apiih. Gihn nu e ngo amaanye beer mee maa arube ke nying Piihter kobe, “Nyin ni beehda ngad Jeacuu thioh!”

⁵⁷ Maa apeechny Piihtere kobe, “Ngadi ge robi ni kwihya!”

⁵⁸ Batiene ka me thiin keehdo e nyin moogo Piihter acahge kaa niido maa arube kobe, “Yih beehda ngad gen thioh.” E gihn nu abeehr Piihtere beehro kobe, “Nyiehl! A padh ngad gen!”

⁵⁹ Batiene caa acielo e nyin moogo keehdo gihn ni acahge kaa niingo kobe, “Adiehr now. Nyin ni beehda ngad gen ne cohng thioh, bang gihn ngo beehda ngad Gaalili ke ngude.”

⁶⁰ Maa acahng Piihtere peechny kobe, “Nyiehl! Gihri noono arobi nu kwihya ne weey weey.” Ke wong kaano e uthuonjieno ake koohg adhaahr e Piihter apoohdo e ngo urubo. ⁶¹ Muudhe e Jeacuu wihe aloge umaahnye bang Piihter. Noono maa apare gihn anaa arob Jeacuue yihre, “Tihn noon ni, yi dewaahy tihn maano e thuo jieno poohd kuu akoohg e yih ukweer ke an tiel adahg kejea a kwihyi.” ⁶² Maa athub Piihtere ke lalo ke keej yej naa angeye deeh awuohj gihn atiihye.

⁶³ Arumo e yaa anaa acub Jeacuu yi cing gen ne koar ngo piny kuohm Jeacuu amaahd gene kaa ngiero udhohng gene ngo dhohngo thioh. ⁶⁴ Kaano e wong Jeacuu atuohy gene maa athub gene ke peechny ngo kob gene, “Nyiehl! Caar ngaan agooj yihn?” ⁶⁵ Maa arub gene yi kuohm Jeacuu keehd giijh mooge me reje e ge yaahl kuohme.

Jeacuu Ne Nyum Akuud Judea

(Mat 26:59-66; Mak 14:55-64; Jon 18:19-24)

⁶⁶ Ke nyango naa aruu piny, e akuud jo doong paajo maa jo doong yaa lam maa yaa loohng wudh ge acong gene congo. Noono maa akahl Jeacuu nyum lug gihr gen arumo.

⁶⁷ Maa apeechny gene kob gene, “Nea yihn naa Kriihjto kea rob ngo yihr wan!”

Maa abeehr Jeacuue ngo yihr gen kobe, “Keehd ne roba ngo yihru, e padh gihn muu uyiihu. ⁶⁸ Kedea nea wu peechnya peechnyo, e wu ukweer ke beehre yihra. ⁶⁹ Abea keehd maano, thube ke wong kan awaahn ni, a ge adoohng ne dhaano utaahngo, a upiih wiijh koom ruohdh ukwiihy Juog.”

⁷⁰ Noono arumo e Jeacuu acahng gene ka peechnyo ke kar gen cang kob gene, “Beehda yih naa Waahd Juog ne?” Maa abeehre ngo kejea, “Ne cohng keree yea kaa ayoadu!” ⁷¹ Maa arub gene arumo kob gene, “Abea gihn, e ne cahgo ke daahdo keehdo? Wa gihn ngo noono aliingho e beehn oogo kii dhe wa kaano arobe ngo nu!”

23 ¹ Batiene e amahr dhaano utaahngo gihn anaa amahdo a'aj maalo ukahl gene Jeacuu nyum Pilaato ge muudiihr.

Jeacuu Akehth Nyum Pilaato Yi Lug

² Batiene e ge athub ke rob kwaad giijh aluom gene Jeacuu ke nying gen yihr Maamuur Pilaato e ge urubo kob gene, “Nyin ni ayoahd wane e ngo cood wudh jo paajo yihr wan. Ngo ukweer kejea cuol keá gwaaj ucube yihr Jaah Roama. Arubo thioh kejea en ke ngude en naa ruohdh arob naa ubeehn ni.”

³ Batiene e Pilaato Jeacuu apeechny peechnyo kobe, “Yih naa Ruohdh gihr yaa Judea ne?”

Maa abeehr Jeacuue ngo yihr Pilaato kobe, “Yih naa arob ngo ke dhii!”

⁴ E Pilaato ake rubo keehd jo doong yaa lam maa nyoge cang kea, “Yaage! Awuohj maa ayoada rih nyin tooro.”

⁵ Kaano e Pilaato ayong gene yongo keter e ge urubo yihre kob gene, “Beehda nyin me wudh nyoge araanye keehd puohny mare ke bang yi Judea cang, thube ke Gaalili ne caadi ubeehne paajo kan yihr wan.”

⁶ E Pilaato gih gen naa arob gene abeehne ke ne lihngo arumo. Noono maa apeehe nye gen kejea Jeacuu beehda ngad Gaalili ne. ⁷ Maa arob gene ngo yihre kejea Jeacuu beehda ngad dhaahr Eroade. Kaano e Jeacuu abeehn Pilaate ke ne oohr bang Eroade. Yi caang nu thioh ke ngude Eroade kaa anaa abeehn geen Jeruucalem.

Jeacuu Akedh Nyum Eroade Yi Lug

⁸ Naa akahl Jeacuu nyum Eroade arumo e cwihnye ake mihno ne cohg bang gihn aniide Jeacuu ni. Cwihnye amihno bang gihn bang Jeacuu na ulihngo yihre ke deeh ka me laaj kedea ugaahne ngo thioh kejea ka moogo e Jeacuu deeh gihn me gaahy nyoge ne yuge buude kaano. ⁹ Gihn nu maa ayane ke peehe nye Jeacuu kaano ne cohg. Abea kihde now gihn maa abeehr Jeacuu yihre Eroade tooro ne weey weey. ¹⁰ Noono e yaa doonge nyum yaa lam kedea yaa loohng ge anaa adhal ke rob giih me doonge me teeg rih Jeacuu. ¹¹ Keehdo Eroade kedea acaakere gihe, gihe ajohr mooge me reje me keehne abeehn gene ke ne yugo rih Jeacuu. Eroade Jeacuu ameehge ngaabo keehd kwaad waaro maa awuob kedea ucahge Jeacuu ke oohr bang Pilaato. ¹² Cahng nu e naa kaa abeehn gome kiin Pilaato ge keehd Eroade bang gihn ge anaa abeehdo e ge akeehg ke rog gen.

Kaa Akihm Jeacuu Ke Thoo Arumo

(Mat 27:15-26; Mak 15:6-15; Jon 18:39-19:16)

¹³ Batiene e Pilaato wudh jo doong yaa lam kedea ruohdh paajo maa nyoge mooge, ge acongo ¹⁴ maa arube yih gen kobe, "Nyin akahlu yihra kejea ngo beehda ngaa me raaj, me raany wudh yaa paajo yihru. Abea naa amaanya yi gihn akahlu ngo banga ke nyinge, e gihn me raaj maa aniida tooro ree, wa kwaad ka arobu ni kejea ngo ayug gihn me raaj. ¹⁵ E thioh keehd Eroade ke ngude, gihn maa ayoade rih Jeacuu tooro maa awuohj. Ke nying gihn nu naa gihn adhiile Jeacuu ke duu banga noono. Maahnyu arumo, awaahn ni gihn me raaj maa ayuge me kihme thoo ke nyinge tooro ne weey weey. ¹⁶ Nea wa gihn nu, e cuow now e nuu ucuowe, abea ngo dhiila kaa lonyo."

¹⁷⁻¹⁸ Naa athum Pilaate ke rob gihn ni, e nyoge ajuohj moogo agooy gene ke piny, e ge urubo keehd Pilaato kob gene, "Nea yih daahde kejea ulunyi dhaano oogo ke nying wan, kea lunyi Barabaj oogo abea nyin keá lonyi kahl cingi oogo ree beere ngo ke naah. Kaano e dhaano acielo ake lony oogo yihre ge ke nying yaay." ¹⁹ (Barabaj anahg ngaa maa anaa amag kaa nying kwaad alyaahb maa anaa ayug ree yi buur geew thioh dhaano anaa anahge.)

²⁰ Batiene keehdo e Pilaato acahg rob keehd nyoge, mare ngahde kejea gihre ulihng gene ulunye Jeacuu oogo ubahng be nahg. ²¹ Abea ka gahng. Nyoge acahg kwaago keehdo e ge urubo kob gene, "Meehg nyin naah yihre wan ke dhe yoohn gure wiith yaadh maa ariihw!"

²² Yi dahg gen keehdo e Pilaato acahg rob keehd gen kobe, "Kaa nying gihn noono koohbu kejea nahge? Gihn noono raaj ge awuohje ne? Gihn me raaj maa atiihye me nahge ke nyinge tooro maa ayoada yi guohbe. Nea wa gihn nu e cuow now e nuu ucuowa ngo abea ngo dhiila kaa lonyo."

²³ Nyoge wudh ge aciehg gene e ge rubo e doohn gen atihng gene maalo kob gene dhiil Jeacuu ke naah e gur wiith yaadh maa ariihw. Maa agoohg gene Pilaato yi gihn nu arumo keehd dhe yoohn kwaago naa akwaag gene ukaale toohge. ²⁴ Noono ubeehn Pilaate ulwaaye lum nu yi cing gen wa ka daahd gene kejea dhiil Jeacuu ke naah. ²⁵ Gihn ni e naa kaa abeehn Pilaate, ugoonye cinge rih Jeacuu beere ngo ke naah wa kar cwihny gen naa adaahd gene. Abea Barabaj ngaa raaj naa adaahd gene kejea lunye oogo e naa aluny Pilaate oogo yihre gen neehn kar cwihny gen naa adaahd gene.

Jeacuu Agur Rih Yaadh Maa Ariihw

(Mat 27:32-44; Mak 15:21-32; Jon 19:17-27)

²⁶ Batiene gihn nu e acaakere ge a'aay keehd Jeacuu e ngo piej gene piejo. Abea ge anaa acaahdh gene caahdho ni, e ge ake roohmo keehd Cimoan ngad Ciriinha maa anaa abeehn geen Jeruucalem. Batiene e acaakere yaadh gihn ariihw naa abien Jeacuu e bieno alaw gene kuu utog Cimoane, ucaahdh Cimoane caahdho e bien ngo ke batiene Jeacuu.

²⁷ Gihn nu maa abeehn amahr nyoge me thoohdh maa awaahd gene e ge buodh Jeacuu. Maahn me thoohdh thioh ge anaa anudo maa anaa ne yuog bang Jeacuu. ²⁸ Kaano e Jeacuu wiithe aloge ke bang maahn gihe anaa ake yuog maa arube yihre gen kobe, "Nyetheamaahn Jeruucalem, gihn keree e ne yuogu, gihn me yuogu tooro ke nyinga, yuogu kaa nyingu wu keedu kedea yuogu kaa nying nyethenu. ²⁹ Bang gihn cahng moogo ubeehn muu urub nyoge kejea, 'Dhaar agaahg, maa dhaar kuu anaa akuong nyuol, maahn gihe nu ge ne rog gen umed. E thioh maahn gihe thun gen kuu akuong nyethiine ke dhootho ge ne rog gen umed thioh!' ³⁰ Thioh dahng unahg cahng nu,

'E nuu urub nyoge yihre goode kejea,

"Goode, pahdhu wudh wan ukanu wan." '

³¹ Abea nea ge naa gihe atiihy nyoge riha noono a ngaan beer neehn kwaad yaadh me thej ni, gihn nuu uyug gene rog yaa beehda nyoge me reje, ge room keehd yen maa atal ni?"

³² Nyoge ariow mooge ge anaa anudo maa anaa ayug awuohj. Ge anaa apiehj ne naah thioh tiehd keehd Jeacuu.

³³ Batiene e nyoge awaahn kar piny me cuohn ne paan wiith dhaano. Maa abeehn nyoge ugur gene Jeacuu wiith yaadh maa ariihw arumo. Thioh yaa ni ariow ni ge anaa agur wudh yen muu gen ucing Jeacuu, ngaa man ucaame kedea ngaa man ukwihiye. ³⁴ Kaano e Jeacuu ake rubo kejea, "Abaa Wura wii lubo piny yihre yaa ni apaan an, bang gihn, gihn ni ayug gene ni, lum nii ngo kwihy gene." Arumo maa abeehn acaakere maa athoohr gene thalo wudh waay Jeacuu upaahng gene gen ke rog gen.

³⁵ Nyoge me thoohdh anudo maa anaa ake cuungo e ge many Jeacuu. Abea e ruohdhe gihe Judea kuohm Jeacuu anaa abuy gene buyo e ge urubo ree kob gene, "Nea mare kea e beehda ngaa me kony nyoge mooge kea noono konye ree nea ngo beehda Ngad Boadh nyoge maa akwany Juoge."

³⁶ Keehdo kaano maa abeehn acaakere ubuy gene kuohm Jeacuu thiow maa acub gene koongo me waj yih Jeacuu
³⁷ maano e ge urubo yihre kob gene, “Nea yihn naa Ruohdh Judea, kea kony rihi.” ³⁸ Gihn moogo maa agweed ucube
taahr nyum Jeacuu rih yaadh gihn agure wiihe ni anaa anudo. Ngo anaa gweed naa, |sc“RUOHDH YAA JUDEA.”|d

³⁹ Kaano e dhaano acielo kiin yaa ariow ge anaa agur wiih yaadh maa arihw buud Jeacuu arubo thiow rih Jeacuu
kobe, “Nea yihn naa Kriihjto do, kea kony rihi beere keehd wan e wa konyi konyo thiow.”

⁴⁰ Abea e mar ngaa man goan ucing kun arob ngo yihr nyin arubo kobe, “Nyieh! Kuohmi be tud ke ne gihn rih Juog?
Ngahda wo nywaag ukihm acielo keehd en tiehd ne? ⁴¹ Abea tien mare gihn? Nea beehda gihn maa kaa ngo ne cohg, e
maro wo akihm kaa nying awuohj maa atiihyo. Abea mare gihn? Beehda ngaa me yea tar now. Gihn maa ayuge me raaj
tooro.”

⁴² Keehdo ubeehn nyin ni uloge dheer ke bang Jeacuu urube keehd ngo kobe, “Jeacuu nea yih wahdh kar ruohdhi kea
naa konya thiow!”

⁴³ Maa abeehr Jeacuu ngo yihr nyin arumo kobe, “Adiehr muon! Roba robo yihri kejea tihn noon ni wo unaa ka maa
acielo paar Juog keehd yihn tiehd.”

Thon Jeacuu

(Mat 27:45-56; Mak 15:33-41; Jon 19:28-30)

⁴⁴ Kaano maa abeehn deeh muudho umoale wiih paajo piny cang ne cihdh cihdhi. Naa athube e cahng nii diehr wihj
uwahdhe kaa alaaahng cahng e gihn me neehn tooro ⁴⁵ bang gihn cahng kuu anaa ke lier. Kaano e waaro gihn anaa
apaahng kur Dhe Wod ke kur Dhe Tiel yi Wod Juog, yea ayiej ree piny ne dahg naa ariow.

⁴⁶ Kaano e Jeacuu amaahr piny ke lalo e duone atihng maalo keter kobe, “Abaa! Wahya ge awiia yi cingi.” Naa arobe
gihn ni e ake thoo.

⁴⁷ Naa aniid jaabidhe gihn ni ayug ree ni, e Juog awuore wuoro keter e ngo urubo kobe, “Ngo kaa anaa anahg gihn
maa adiehr ne cohg! Nyin kaa anahg ngaa me yea tar athiir muon!” ⁴⁸ Batiene e amahr dhaano utaahngo naa abeehn
ne maahnyo, kaa aniid gene kwaad gihn ni ayug ree ni, e ge apahdh yooh e ge aay e ge teeng koohdh gen yih rahny
cwihty. ⁴⁹ Abea, amahr yaa angahy Jeacuu kedea maahn giijh anaa ake caahdho tiehd keehd Jeacuu, kaa anaa
apoohe e ngo ne Gaalili ni, ge noono cang, ge acuungo ka me baahr, e ge maany giijh nu atiihy rog gen.

Jeacuu Kuohme Akan

(Mat 27:57-61; Mak 15:42-47; Jon 19:38-42)

⁵⁰ Kaano e nyin moogo anudo me nyinge Jocebe maa abeehno ke geewe me cuohn ne geen Arihmathea yi Judea.
Ngo anahg ngad Akuud Judea kedea thiow anahg ngaa me beer keter. Tiene anaa tooro yihdh kwaad giijh ni anaa ayug
yaa Akuud Judea rih Jeacuu ni. ⁵¹ E thiow anahg ngaa maa anaa abeehdo e koar dhe yoohn ka beehn Juoge ukonye
nyoge kii ngo. ⁵² Noono e Jocebe, acaa bang Pilaato ne rob keehd Pilaato beere kuohm Jeacuu meehg kaabo yihre
ubeehne ngo ne kano. ⁵³ Abea naa ayiijh Pilaate ngo yihre, e Jocebe kuohm Jeacuu akahle ke piny wiih yaadh atudo
naa agure wiihe, ubahje keehd waahr thoo ucea ngo ne piehl yi wod leelo maa abeehdo e agwiir ne kar kan kuohm yaa
paar gen. Thiow wod gihn akane kuohm Jeacuu yea ni, kihd dhaano maa athow kuu akuong ke kano yea. ⁵⁴ Cahng ni,
anahg gwiihdo bang gihn ruuwow beehda Cahng Cabadh e bahng nyoge be tiihyo yea.

⁵⁵ Maahn giijh anaa ake caahdho keehd Jeacuu nye kaa anaa apoohe Gaalili ni, batien Jocebe abeehn gene ne
buodho kaano akane kuohm Jeacuu nu. Noono maa aniid gene kaa akan Jocebe kuohm Jeacuu yea. ⁵⁶ Muudhe kaano
maa aay gene ne dog miehy gen ne gwiir mahdhe me ngwaahy bang doar kuohm Jeacuu keehd gen. Maahn kuu acahg
duu kar liel keehdo bang gihn ruuwow gihr cahng nu anaa anahg cahng Cabadh bang ne yug gihr lum loohng ke nying
cahng Cabadh ne cohg.

Liel Yea Apuogo Kedea Rob Wuohdjuog

(Mat 28:1-10; Mak 16:1-8; Jon 20:1-10)

24 ¹ Ke nyang coon, yi Cahng Juog arumo e maahn rog gen atihng gene tihngo e ge caa ne lieh liel e mahdhe me
ngwaahy naa agwiir gene kaahn gene kaahno. ² Naa awahdh gene kar liel arumo, e leelo me duohng mee gihn
anaa aloohr dhe liel keehd ngo ayuud gene e ngo aloohr oogo. ³ Kaano umon gene kii loohro. Naa acidh gene yea, e
kuohm Jeacuu Ruohdh ayuud gene e ngo tooro kaa naa apiehle yea. ⁴ Ucuung gene kaano yi wod loohro, e wudh gen
ane dihl ke kwaad gihn ayug ree. Yi wong kaano e nyoge ariow maa angaab waare me ne mihl mihl ge anaa caahj bang
gen. ⁵ Keehdo e maahn giijh wudh gen akuul gene ke piny, e ge amag lwahre ne cohg. E yaa ni ge ake rubo yihr maahn
giijh kejea, “Yaage, ke nying gihn e ne daahdu ngaa me kuow kiin nyoge maa athow? ⁶ Ngaan daahdu ni tooro kan
keehdo! Ngo acahr. Paru wudhu ne giijh anaa arobe yihru ge apoohe e ngo ne Gaalili ni. Ngo anaa arobe yihru kejea,
⁷ ‘A ge adoohng ne dhaano utaahngo, a dhiil kaa cub yi cing yaa anyoohne. Thiow, a ubeehn gene ne gur wiih yaadh
maa arihw. Abea yi dahg nihn arumo, e a ucahro.’” ⁸ Muudhe kaano arumo e kwaad giijh anaa arobe muon yihr gen, ge
abeehn maahn giijh ni ke ne paro cang ke kar gen.

⁹ Batiene maa a'aay gene kar liel beere ge caa ne kwaan thaahdh giijh aniid gene naa ayug rog gen yihr jo oohr kar
ge apaar wonge acielo kedea nyoge mooge maa anudo keehd gen thiow. ¹⁰ Maahn anaa aci kar liel anahg Maarya
Madaleana, Joana maa Maarya miih Jeamij. Ge noono kedea maahn mooge maa anudo tiehd keehd gen, gen naa arob
giijh ayug rog gen kar liel yihr jo waahdh. ¹¹ E jo waahdh ge abeehn ne kweer ke yih gihn arob maahne yihr gen. ¹² Abea
kaano e Piihter apaahr maalo ugoohde ke kar liel beere caa ne maany gihn ayug ree ne cohg. Naa awahdhe kar loohro
e agong piny, ulwaahng wonge yi loohro e waare me tar now ge naa aniide piny, abea kuohm dhaano naa anaa abahj
keehd gen keá niido. Maa a'aay Piihtere e dheer atal ne kwaad gihn ni atiihy ree ni.

Yaaj Ariow Maa Aci Paan Cuohn Ne Emaaw

(Mak 16:12, 13)

¹³ Yi cahng ni acielo ni, e nyoge ariow mooge maa anaa anahg jo waahdh giij Jeacuu thiow, rog gen atihng gene ne ci paajo me nyinge Emaaw. Paan ngo thiow keewe keehd Jeruucalem beehda kar meale abiihberiw. ¹⁴ Ge anaa acaahdho, e ge coar wudh gen ke kwaad luube giij ni atiihy rog gen ni. ¹⁵ Gihn nu, e Jeacuu ke ngude ree amahde ke keew gen unywaag gene yooh tiehd. ¹⁶ Abea keehd maano aniid gene Jeacuu nu, e ngo agoohg yihr gen ke ngeyo.

¹⁷ Noono maa apeechny Jeacuue gen kejea, "Nye yaage, wu caahdhi e wu rob gihn ke bang yi yooh?"

Kaano e ge ake cuungo ne ngahg, maano e kaan nying gen rog gen alog gene bang raahj aduulo. ¹⁸ E dhaano acielo kiin gen me nyinge Keliopaj Jeacuu apeechny peehnyo kobe, "Beehda yihn naa aweehno me ngihde yi geen Jeruucalem e kwihj kwaad giij atiihy rog gen yihdh ni?"

¹⁹ Maa abeehr Jeacuue ngo yihre kobe, "Beehda giij me ngihde noon ni ayug rog gen ge kwihya ni?" Maa abeehr Keliopaje ngo keehdo kee, "Beehde kwaad giij anaa ayug rog gen rih Jeacuu ge ka kwihyi ne? Jeacuu ge beehda ngad Naajaread ni, anaa anahg kwaad ngaa maa ngad lum Juog. E thiow ngo abeehde e ngahy Juoge kedea unghy nyoge ngo thiow cang bang gihn ngo anahg ngaa me teeg keehd kwaad giij atiihye kedea keehd dhe yoohn puohny mare.

²⁰ Abea jo doonge giij paajo yaa lam giij kweehr kedea ruohdh paar wan ge abeehn ne aj maalo umag gene Jeacuu maa acub gene ngo ne kihmo ke thoo, ugur gene ngo wiij yaadh maa ariihw. ²¹ E thiow anahg ngaan anaa agaahn wane gaahno kejea ne nahg en ke ngude, e ne nahg ngaan ne luny yaa Yijarael oogo yi bahng noono. Abea tihh ke ngude, e naa adahw nihn batien kaa yug giij ni rog gen. ²² Thiow, maahn mooge kiin yaa akuude giij wan maa anaa amool kar liene ne ci ne maany ngo cwihny wan ameehg gene baadh ²³ bang gihn naa aduu gene arob gene yihr nyoge kejea kuohm ngo kuu ayoad gene. Abea wuohdjuog ariow gen naa aniid gene. Maa arub gene yihr maahn kejea Jeacuu adoohng ne ngaa me kuow bang gihn ngo acahr. ²⁴ Dahng nyoge mooge kiin yaa akuud wan, ge abeehn ne cidho kar liel ne maany gihn ayug ree. Athiir muon ge anaa awahdh gene thiow e ngo ayuud gene e gihn maa adiehr wa kwaad kaa arob maahne ngo, abea Jeacuu kuu aniid gene."

²⁵ E Jeacuu ake rubo keehd gen arumo kea, "Wa wu beehda kwaad nyoge maa abeehl ne cohg! Wudhu ka teeg ne cohg wa maano, ge bahng kwaad giij anaa arob yaa agamloohngjuoge cang ke kwaan gen be laaru ke yiho wa gihn ne? ²⁶ Ngahda anaa anahg gihn maa ateed kejea Jeacuu Ngad Boadh nyoge naa arob kejea ngo ubeehn uboadhe nyoge kuohme udhiil raahm yihdh kwaad giij ayug rog gen cang ne dug uthowe ne? Beere ngo udoohngo ne ngaa me yihre ne teeg Juog arumo keehd ruohdh mare ne?" ²⁷ Batiene maa athub Jeacuue ke kwaan yihdh kwaad giij anaa agweed piny yi loohng Juog naa arob ke nyinge arumo beehd wa kaa gweed gen yi loohng mar Moaje maa thiow kwaad luube giij anaa agweed yaa loohng Juoge maa akwaane gen piny yihr gen cang ke kwaan gen.

²⁸ Muudhe arumo e ge aguo wahn buud paan anaa abeehn gene yea. Jeacuu kaano keehdo, ree anaa ayuge wa kwaad ngaa muu ubar keehd waahdhe. ²⁹ Maa amahn gene ngo e ter gene tero kejea kea bar. Urob gene ngo yihre kejea, "Ka me bari tooro, bang gihn cahng ayuudho beehne uburi keehd wan tiehd." Kaano arumo e naa abar Jeacuue keehd gen tiehd ne piih.

³⁰ Kaa apiih Jeacuue wiij tharbeajo keehd gen ni, e amono akaabe maa amuohje koohr Juog, utoye amono maa apaahng ngo yihr gen. ³¹ Naa apaahng ngo ne ngio, e wudh gen ake yahbo arumo e naa kaa angey gene Jeacuu. Nye wong kaano thiow e Jeacuu anaa amad yihr gen, ubahng ngo kuu acahg gene ke niido keehdo. ³² Maa arub gene ke rog gen kob gene, "Gihn awaahn ni e naa agoohge yihro ke ngeyo, abea kar ngeye adoohng wa ngo anaa abeehn yi cwihnyo kaano arube rubo yihro e kwaane thaahdh luube yihro yi yooh giij nii kitaab Juog?"

³³ Ke wong kaano uaj gene ke maalo uay gene aay ke waahdh uduu gene Jeruucalem keehdo. Naa awahn gene e amahr yaa anaa anudo naa amad wudh gen ka maa acielo keehd jo waahdh Jeacuu e ge ake rubo yihr yaa abeehno kar ge ariow kejea, ³⁴ "Ruohdho kaa acahr athiir muon ne cohg! Adhaahr ree anyoadhe yihr Piihter!" ³⁵ Maa athub gene ke kwaan gihn ayug ree yi yooh yihr gen kedea ukwaan gene dhe yoohn kaa abeehn gene ne ngeyo ngo ge atoare amono nyum gen.

Jeacuu Ree Anyoadhe Yihr Jo Waahdhe

(Mat 28:16-20; Mak 16:14-18; Jon 20:19-23; Tiihy 1:6-8)

³⁶ Nye kaano anaa apoohd gene e ge rob giij ni ke rog gen nu, e Jeacuu anaa lwaahd ucuunge keew gen maa arube yihr gen kobe, "Maahdhu rihu ya! Dooj mar Juog acuba yihru." ³⁷ Maa apahw gene oogo umag lwahre gen kwaade tooro, bang gihn mar gen cuohn gene kejea atiihbe ge naa aniid gene. ³⁸ Kaano e Jeacuu ake rubo keehd gen kea, "Gihn e naa abuogu yihra ke nyinge? E thiow gihn e ne bahng ngo be yiho ke cwihnyu kejea beehda an e gihn niido ni?" ³⁹ Maanyu cinga kedea tiena. Beehda an ke nguda e gihn niido ni! Gweelu cinga beere an ngeyo thiow kejea atiihbe me kuohme nud wa dhaano utaahngo beehde tooro."

⁴⁰ Athiir muon e cinge kedea tiene ge anyoadhe nyoadho yihr gen. ⁴¹ Abea keehd maano, e cwihny gen apoohdo e udaag ke nying mihn cwihny gen. Maa apeechny Jeacuue kobe, "Ne cam me nud yihru ne?" ⁴² E nye goan reehyo maa athaal acub gene yihre. ⁴³ Maa akaab Jeacuue ngo ucame ngo nyum gen.

⁴⁴ Jeacuu arobo yihr gen kobe, "Giij ni rog gen ayug gene wa kwaad kaa anaa aroba yihru umodho ge apoohde e a ubeehdo tiehd keehd wun. Kwaad giij anaa agweed yi kitaab loohng gihr Moaje ni kedea muu anaa agweed yaa agamloohngjuoge ni maa muu ne yihdh kitaabe giij Wahy Apoong Juog. Kwaad giij nu cang ge anaa anahg giij me ne dhiil rog gen ke tiihyo wa kaano anaa agweed gen piny unahg gene athere ne cohg."

⁴⁵ Muudhe e wudh gen ayab Jeacuue yabo beere luube giih anaa yi kitaab Juog ngey gene ngeyo. ⁴⁶ Maa ateede ngo yihir gen kobe, "Gihn e naa gihn agweed yi kitaab Juog ke nyinga kejea Kriihjto ne thow udhiile cahro yi dahg nihn.

⁴⁷ Thiow anaa agweed ke nyinga kejea dhe yoohn ka ubeehn nyoge urahny cwihny gene bang anyoohne giih gen kedea kar wii anyoohne piny yihir gen thiow, luub nu dhe yoohn gen dhiilu kaa puohnyo yihir kwaad nyoge cang ne dug wiih piny, thube ke geen Jeruucalem. ⁴⁸ Wun naa cuude giiha ke nying giih ni ayug rog gen ni. ⁴⁹ Abea thiow roba robo yihru kejea ngaan anaa aceg Wura piny, ngo uohra yihru. E thiow wu keá aay, dhiilu beehdo kan Jeruucalem, uwahdhe ka ubeehn tee gihn roba ni ke yoohn maalo upiie wudhu."

Jeacuu Ayedh Maalo

(Mak 16:19, 20; Tiihy 1:9-11)

⁵⁰ Keehdo arumo e ngo ake aay keehd jo waahdhe, uwahdhe kaa abeehn gene paajo moogo me cuohn ne Bathany. Kaano e Jeacuue cinge ge atihnge ke maalo udooje jo waahdhe cang. ⁵¹ Ge adooje gen dooje e ge awiie piny utihnge Paar Maalo. ⁵² Batien e ngo adoar gene doaro arumo uduu gene Jeruucalem, maano e cwihny gen adoohng med kwaade tooro, ⁵³ ubeehd gene e ge kwaay ci yi Wod Juog ne wuor Juog.

24:45 24:25-27, 32; Jon 20:9 **24:46** 9:21-22; Mat 26:56; Mak 14:49; 1Kor 15:3-4; Tiihy 17:2-3; 28:23

24:47 3:3; Tiihy 1:8; 5:31; 11:18; 17:30-31; 20:21; Rom 15:19 **24:48-49** Tiihy 5:32; Jon 15:26-27

24:48 Tiihy 1:8, 22; 2:32; 3:15; 4:33; 10:39-41; 13:31 **24:49** 4:18 **24:50-51** 9:51; Mak 16:19; Tiihy 1:9; 3:21

24:52 Tiihy 1:12; Jon 14:28; 16:22